

**The Presbyterian Church of India
ZOU PRESBYTERIAN CHURCH SYNOD**



**KHRISTIAN THUGINPITE
(SENIOR ZILLAI BU)
(REVISED & ENLARGE)**

Rev. Dr. Hangpi Manlun

**The Presbyterian Church of India
ZOU PRESBYTERIAN CHURCH SYNOD**



**KHRISTIAN THUGINPITE
(SENIOR ZILLAI BU)
(REVISED & ENLARGE)**

Rev. Dr. Hangpi Manlun

**KHRISTIAN THUGINPITE
(SENIOR ZILLAI BU)
(REVISED & ENLARGE)**

Publications:

1st Edition – 2004

2nd Edition-2019

3rd Edition-2021

KHRISTIAN THUGINPITE
Rev. Dr. Hangpi Manlun

Published by

The Zou Presbyterian Church Synod
Zomi Colony, Churachandpur - 795128

Printed at

K. PYAR'S MICRO ENTERPRISE
Churachandpur, Manipur

THUMAPUI

Amasapen in, kum 2022-tan a hattuumte hing mapui a, Tahsa leh Hagau a hing vangbuohtu i Pasian tung ah lungdam thu i gen masa uhi.

Zou Presbyterian Church Synod khawmpi in Senior zillai “Khristian Thugin Zillaibu” a beitah ziehin, Revise bawlding a pha sah ahi. Tualeh, mawpuo ding a guot ka hibangin zawthei a ang umtah ziehin hingma puitu i bieh Pasian min ka phat hi. (Vide Ist Sunday School Committee R/No. 1, dated 11/2/2020 & 17th Session Annexure-8, R/No.3, leh 18th Session Annexure-8, R/No.6, 2021).

Tualeh, tami laibu khu 48th Session, Manipur Gam Presbytery Khawmpi, 2003, R/No. 23- in apuosah bangin, kum 2004- in, “Senior Pawl zildingin” mawpuohna pieh a ka um bangin kana bawl hi. Tami laibu khu tuni dawngin a kizangtou lai hi.

Tam laibu bawlna a hing kithuopi Office Staff-te leh lawm-le-paite tung ah zong lungdam thu ka gen hi. Mangpa’n tam laibu guoljawl in, i thuginte uh Zillaite’n i thei ua gindan tuomtuom lah a kipat thudih, thuman i thei ua i zuitheina diing u’leh Thutah i thei na diing un hing guoljawlta hen.

- Rev. Dr. Hangpi Manlun

HATTUOM THUGIN SAWMTE

THUMAPUI

India gam Presbyterian Hattuum (PCI) in bul-le-baal a anei Hattuumte thugin zousie pomdet in; adieh in Wales gam Presbyterian thugin khu Pasian thu kizilsahna leh puonzahna hoitah hia pomdet in, Hattuum a ding leh Pasian thuzilna muntea ching a pomdet kawm in a nuoi a thuginte puonkhietna khu; a Pastorte, Sawлтаhte leh Upate'n a neidet ua a hinsuopi ding un apom hi.

THUGINPI-I

Laisiengthou: Thuhun Lui leh Thuhun Tha khu Pasian thu lamdang ngailou ginna leh nnasep teena dihpeen khu ahi.

THUGINPI-II

Pasian khat bou a um a, ama bou khu bieh ding ahi. Amakhu Hagau ahi, Amathu a hing um, hagau dangte toh kibanglou, lamdangtheilou, kumtawn a um, a hiina kikhellou, pilna, silbawltheina, sienthouna, dihtatna, hoina, thutah leh itna khu ahi.

THUGINPI-III

Pasian ah mihing thum a um a, Pa, Tapa, leh Hagau Siengthou ahi ua, tam mihing thumte khu Pasian khat, hiina kibang, silbawltheina leh loupina kibang ahi uhi.

THUGINPI-IV

Pasian Van, Lei leh a sung a sil um zousie siempa khu'n, mihing pasal leh numei, ama lim-le-meel suun in a na siem a, pilna, dihtatna leh sienthouna ah a na siem hi. Mi zousie kipatna bulpi kibang nei unau ahi uhi.

THUGINPI-V

Mihing ama diteel in Pasian daan thupieh a na botsie a, tuachi'n siemmawtanna leh sietna ah a na kiphumlut uhi. Tuachin mihingte siemmaw atanna, sietna leh khelna a kipatin hundam a, a um ua, kumtawn hinna anei theina ding un aйна lamdang ngailou jieh in a tapa tang neisun vannuoi ah ahing sawl hi. Ama ah bou mihingte'n hundamna a nga thei uhi. Tuachi'n a kumtawn Tapa khu mihing dihtatvawt leh Pasianhiina dihtahvawt nei in mihing a hing suoh a, bangchihtanin mihing khat ahi veve hi. Ama khu Hagau Siengthou silbawltheina jieh in ang kizil a nungah siengthou Mari in ahing a, hinanlezong khelna neilou ahi. Tawnkhielta mihingte jieh in Ama'n Pasian lungdamna ding in leh Pasian leh mihingkilemsah ding in Ama ngel khu kithoina dihtah leh nuolbei ina hing kipekchie hi. Singlaamte tung ah a shi a, vui in a um a, tuachi'n a ni thum ni'n shina kipat a thoukiata hi. Van ah katouin Pasian zietlam ah a tou a, a mipite a ding in thu a ngen zing hi. Tuachi'n mishite kaithou a leitung a thukhen ding in aangpeikia ding hi.

THUGINPI-VI

Hagau Siengthou, Pa leh Tapa a hing kipan khu'n mihingte hundamna tang ding in a siem a, a tawnkhielnate leh a dinmunuh zau a huoi daan kitheichiensah hi. Khrist khu a Mangpa leh hundampa apom thei ngei ding in pui in A thunun a, tuachi adihtatna lam a ga nei ding in amau a lamkai hi.

THUGINPI-VII

Pasian in Khrist ah mihingte hundamna bukim leh manbei khua pie hi. A khelnate uh kisia a, Mangpa leh hundampa a pomkip ding in, kingiemkhietna hinkhuo leh siengthou, Pasian deilam hinkhuo ama a hing kilang bang a hinkho nei ding in a siem hi. Koizong Khrist gingta a, a thu jui tapou khu hutdam ahia, khel ngaidamna, siemtansahna, Pasian ta hiina, sunggil a Hagau Siengthou teenpina jieh in sienthouna leh kumtawn loupina atangta hi. Gingtute ngel in hutdam kitheichetna a tang thei uhi. A lungsietna nnasep ah khu'n Hagau Siengthou vanzah khu Thu leh thuhun, sakramentte leh Thugetna ahi.

THUGINPI-VIII

Sakramen Khrist in a siemte khu: Baptisma leh Mangpa nitah ann ahi. Baptisma khu Pa, Tapa leh Hagau Siengthou min atui a kisilna ahia, khum khu Khrist toh kipumkhatna, HagauSiengthou a hin kilamdanna leh kisiemthana leh Mangpa a i kipiehkhetna etsahna ahi. Tamkhu i khelna kisia a, Khrist a ginna jieh a hundampa a pomte leh a tate bou tansah ding ahi.

THUGINPI-IX

Hattuum kipawlkhawmna a pumkhat a um khawm khu gingtute nnasep ahi a, Sakramen leh Khrist ziatan daan dangte, daan dangte, daan thupieh zui siem, thumna nei zing, Mangpani nit siengthou, biehna nei ding a kimutuokhawm, thugen ngaikhetna, Pasian in a guoljawl dungzui a silpiehte pie a, Khrist toh kibahna hagama hinkhuo amau ua muthei a uma, mite tung a zong nei a, vannuoi buppi a Khrist leenggam khanletna ding a nnasep leh loupitah a ama hing kilah hun ngahzing a um khu gingtute nasep ahi.

THUGINPI-X

Ni tawpni chieng in mishite kaithaw in umva un, a hinkhuo uh hoi leh hoiloute tung ah a nnasep uh dungjui in a tung uah thukhenna umta va. Gingloute leh migiloute khu siemmawtansah a um in a khelnate uh jieh in gawt in umtava uh. Hinanlezong Khrist gingta a, a thupieh sang mite khu dopkaanga um in loupina ah loplut in umtava uh.

APOSTOLTE THUGIN

Bangkimbawlthei, Pa Pasian,
Lei leh Van siempa khu ka gingta hi.
A tapa neisun Jesu Khrist,
i Mangpa Jesu Khrist zong ka gingta hi.
Ama khu Hagau Siengthou in a gaisah a,
Mari in nungah a hilai in a hingkhie hi.
Pontia Pilat in huoisetah in a thuoh gimsah a,
Singlamte ah kilbeh in a um hi.
A shita a, phum in a um a, Mishikhuo ah a vahaw a,
Nithum ni'n mishi lah a pat a thoukiata hi.
Van ah katoukia in, Bangkim bawlthei,
Pa Pasian zietlam ah a touta hi.
Khuna pat in hing kumsuhkia va'n
Mishi leh mihing vaihawmsah ding in.
Tuachi'n Hagau Siengthou ka gingta a,
Mi zousie a ding a Hattuom siengthou um zong ka gingta hi.
Mi siengthou kipawlukhawmna zong ka gingta hi.
Khel ngaidamna ka gingta a,
Tahsa thawkiana ka gingta a,
Kumtawn a hinna toh, Amen.!!



BUNG - I

KHRISTIAN THUGIN GENNA KAMTENGTE, BIBLE, HATTUOM LEH THUGIN KIZOP DANTE

Thuchiin:

“Thugin siengthou in a deite khu mite hil in”. (Tita 2:1)

1). Thugin umzie:

‘Thugin’ chi khu gendan tuomtuom a um thei a, ahivang in a taangpi in i sui diing uhi. Thugin chi khu Latin ham in ‘credo’ chi a kipat a lah ahi a, tuakhu ahileh thuhilna amaw zilsahna (teaching) china ahi. Ahin a umzie ahileh ‘Ka gingta’ (I believe) china ahi. Tualeh, Sapham in ‘doctrine’ amaw ‘creed’ a kichi uhi. Greek ham in ‘dogma or ‘pisteuein’ a chi uhi. Tualeh, thugin khu thudih leh hoi, sahkhuo leh hinkhuo puihuoina diing a mi’n thudih ahi chi-a, a pomdet u’khu ahi. Jack Rogers in “Thugin khu zilsahna in a kentel thu a hi a, Khristiante a dingin Pasian thu in ang zilsahte khu ahi” a chi hi.

Tualeh, sahkhuo zousie’n thugin a nei chiet ua, ei Khristiante thugin a lamdan tuomna khu mihing pilna in a bawl khiet ahi sih a, leitung a Mangpa Jesu Khrist tungtawn a Pasian kipuonna (God’s self disclosure)-apat a hing piengkhe ahi. Pasian leh a hundamna puonna khu Khrist ah bukimtah in ang kilangta hi. Tuakhu, Bible (Pasian thu)-ah i mu uhi. Tuaziehin, thugin kingahna pen (source of authority)- khu Bible ahi.

Atomkimin, Thugin genna kammal tuomtuomte lah ah a poimaw diehte ahi uh leh Doctrine- khu ‘Kizilsahna’ china ahi. Khristiante kizilshana leh gindan pumpi genna diing a zah ahi. Tualeh, Dogma- khu ‘Eima lama hina ang nei jie a i gintat/ahinahi chia i pom’ uh china ahi. Tuabanah, Creed- khu Thuchiin/Thuvon chinate ahi uhi.

2). Thugin hing pienkhieh dan.

Hattuum ang din chillai a kipatin, a thupawm ding leh a kingahna dingin ‘Thu’ anei ngal uhi. Tua a thu kingahna uh khu ‘Thugin’ ahi. Hattuum dinchil lai a, a thugin masa pen uh ahileh, “Jesu khu Mangpen” a hi chi ahi. Hun hing pei tou zelzelin, hattuumten zilsahna chituomtuom a nei chietua, tuaziehin hattuumte a kingahna ding u’leh zui dingun thugin tuomtuomte ang piengkhie hi. Azieh ahileh, hattuumten kingahna ding leh zuiding a poimaw uhi.

3). Thugin puonkhiehna (Confession).

Hattuum chin teng in, i Thugin ding ua i pawm u’leh zui ding i neichiet uhi. Tuabang ma in, eima hattuum peidan leh Pasian thu i pawmdan u’toh kituoh a gelkhieh/siemkhieh khu “Thugin puonkhieh” (confession of faith) a kichi hi. Gam tuomtuom leh hattuum chin tengin zong amauh tenna leh hindan toh kituohin, Thugin puonkhieh a nei chiet uhi. Etsahna’n ei Presbyterian Church of India (PCI)- in thugin puonkhieh sawm (Ten Articles of Faith)- i neite uh bang in, hattuum pawl tuomtuomten zong amau hattuum ah thugin tuomtuom aneite uh genna ahi deu pen hi.

4). Khristian Thugin poimawnate i suiding uhi.

4.i). Thugin dih leh hoi nei ban ah thei khu tahsa-le-hagau a ding a khanletna ahi. Azieh ahileh, Bible thu dih theisiemna lampi ah gingtute a pui hi. Thugin khu theichien a, hinpi diing a zil ding ahi. 4.ii). Tuabang, ahichiengin thugin ziltu/theitu hinkhuo khu hattuum leh Pasian dei bangin ang khanglien in zahthei ang hiding uhi. 4.iii). Pasian thu (Theology)- dihtah thei dingin gingtute a pui/panpi hi. Tuabanah, hattuumte zong a kipum khat sah hi. Tua leh thugin dihin zilsahna dihlou leh silbawl (practice) dihlou lah ah hattuumte a vengbit hi. 4.iv). Thugin in gingtute leitung sil leh hattuum silte khentel theina a neisah hi. Tuabanah, thugin khun zilsahna dih leh zilsahna dihlou theisiem dingin gingtute a panpi hi. Tualeh, hattuum a luttha dingte zong kung ah hattuum dinna zieh zong a theisah hi.

5). Bible, Hattuum leh Thugin kizopdan.

Bible, Hattuum leh Thuginte khu khau zangthum a kihul khawm bang ahi uhi. Hattuumte khu thugin siemtu leh zuitute ahi uhi. Tualeh, thugin in hattuum mite kalsuon ding dan ahi a, a langkhat lamah hattuumte khu thugin kemptute zong ahi uhi.

Gingtute hagau hinkhuo khu Pasian a kipat a i mu uh leh i tanchiet uh ahi. Thuginte khu Bible tungton a, a dihthei pen ding a kisiem chiet hi. Tuabanah, Bible, hattuum leh Hagau hinkhuo khu a kizawm chiet ua, tuakhu, thugin kingahna bulpi zong ahi uhi. Tuaziehin, thugin in Bible zilsahna leh mimalte hagau hinkhuo khu a ngaisah lou ngaisih hi.

Tuabanah, gingtute hinkhuo supichingtu leh khangsahtute khu Bible, Thugin leh Hattuumte ahi uhi. Tami thumte khu Pasian kipuonna a zah ahi ua, khat toisang a, a dang khat ngai nep tuomthei zong ahisih uhi. Ahin, hattuum leh thuginte maimai ngaisang a mani hagau hinkhuo ding ngaisahlou a um adih tuom dieh sih hi. Tuabang ma in, Bible leh hagau hinkhuote maimai mgaisah a, hattuum ngaisah kia lou khu a dih tuom dieh sih hi. Tuaziehin, gingu hinkhuo ah Bible zilsahnate, Hattuum leh a kivaihawmnate leh Thuginte khu a kizawm sieng uhi. Tuaziehin, hei pen e khat ngai poimaw agengen a, adangte ngainep gen khu a dihsih hi. Tuanah sang a pawmkhawm siem sawm a, pankhawm sah ding a hi uhi. Tua hileh, tahsa-le-hagau ah zong i khang un i pichingthei ding uhi.

6). Thugin hoi khu Hagau hinkhuo a diing in ann hoitah ahi:

Thugin hoitah nei a zui khu hagau lam-le-tahsa lam a ding in khanna diing a haguulam ann hoitah ahi hi. Tualeh, thugin (doctrine) theina in ginna ah ang khangliensah diing a, tuaban ah Hagau hinkhuo ah hausatna zong ang pe diing hi. Hattuum khen khat ngelin nichin hun chin in Pasian gam nnasep ding leh Khristian hinkhuo pichinna ding a kizilsah sangin, amauh thuginte maimai kihilin un a atangkoupi ua, alien aneu-in a lungtang uah a thugin uh hoidan leh midangte a, ahoilou dan chi a tuzing uhi. Tuaziehin, eima thugen hoi tah a theina in gindan tuomtuomte a kipatin ang vengbit ding hi.

6). Thukhum sin leh laigieltu thukup.

Eite khun i doctrine-te u'khu thei kisawmlouin, i kim i pan ua midangte tawndan leh hinate bang ingaisang zaw uh a bangta hi. I doctrine leh i kipuoi huoidante uh i ngaisahlou laisia uh tahsa hagau a i khang tahtah sih ding uhi. Tuabanah, gingu piching leh Hattuum piching zong i kichithei sih ding hi.

Azieh ahileh, thugin hing kipat dantah khu Pasion leh gingu kikal a kilepna ahi. Pasion in gingu khu ahoup i a, gingu in Pasion khu a dawng hi. Tuajiehin, thugin dih zuina khu Pasion toh i kal ang siem hoi banah, gingu-le-gingu kikal leh leitung toh i kal tanpha ah zong angpui hoi hi. Bangteng hinanleh, i Bible u'khu i kiteena uh leh i zui diing pen uh hileh buoinate leh peikhielna bei in i peidih zing diing uhi.

Dohnate:

- 1). Thugin umzie bang e?
- 2). Thugin kingah bulpi khu bang e?
- 3). Thugin puonkhiehna (Confession) umzie bang e?
- 4). Khristian Thugin poimawnate bangbangte e?
- 5). Bible, Hattuum leh Thugin kizopdan tawmkim in gen in?
- 6). Thugin hoi khu Hagau lam hinkhuo a a diing in apoimawna gen in?

.....

BUNG- 2

HATTUOM DIN CHILLAI A KHAWMPITE A THUGIN TUOMTUOMTE ANA SIEMKHIEH DAN UH

Thuchiin ding:

‘Hinanleh nang pen in thugin dihtah toh kituoh thute genin’ (Tita 2:1).

1). Thumapui:

I gensa bangun Thuginte khu ang pawng um mai ahisih ua, masanglai a gingtute khun amauh hinkhuo ua Pasian thu amudan u’toh kituoh leh Laisiengthou tungton a ang bawlkhieuh uh ahi. Tualeh, ahun leh amun dungzui in, khawmpi tuomtuomte tungton a Thugin hing kisiemte isui ding uhi. Tuate:

2.i). Jerusalem Khawmpi.

Pentekost nua-in, Jentail-ten Jesu Khrist ang gingta un ang pwmta uhi. Khrsitianten, a din mun uh a suhchieng uh ang ngaita hi. Tuachin, Jerusalem ah khawmpi a neita uhi. A thupuosah uh a hileh, “Tuaziehin, Jentailte lah a Pasian lam a hing kiheite khu subuoi dalei chi ka ngaidan ahi. Milim biehn, sil buo nehte, kingaina siengloute, hehlup sa leh sisan nehte, tawpsan ding in a kung uah laigiel lei ka chi zaw hi” a chi uhi (Nasepte 15:19-20).

2.ii). Naisia Khawmpi.

Tami khawmpi aneina zieh uh ahileh, Aria kichipa zilsahna a genchien nuom ziehuh ahi. Aria in, “Jesu khu Pasian silsiem khat leh ahi a, Pasian toh a kikim/kibang sih” chiin a zilsah hi. Lengpa Constantine khu Khristian ang hitahin, Khristiante lah a Aria zilsahna zieh a buoina umte a suvengta hi. Tuachin, thugin bawl ding in khawmpi a nei ua, Constantine in, “Hattuum sung a kilemlouna khu kidouna sang in a zau um zaw” a chi va-ia hi.

2.iii). Apostolte Puonkhieh Thugin.

Awle, ‘Apostol Thugin’ i mumasahna pen uh ahileh AD 390- a Milan khawmpi-a, Synod khawmpi aneilai un, Pope ‘Siricius’ kungah Apostol Thugin (Symbolum Apostolorum)-gelthaw un a thawt uhi. A gintat dan un, Milan Bishop Ambrose gel hidingin a gingta uhi. Ambrose khu German mi, mi thupitah khat tapa ahi a, laisiem leh dan thei mi zong ahi.

Tualeh, Apostolte Thugin genzauna (exposition) khu T. Rufinus (A.D. 345-410)-vellai a mipan a geldan in, Thugin hing pienkhieh dan tambangin i mu uhi. Mangpa Jesu Van a akatounua ni sawm (10)-ah khun Judate ging/zau a nuazuite a umkhawmlaiun, Mangpa khun a kung uah Hamuonna thu a tung sah hi. Ahing tuntahin, meikuong bangin a tungsah a ham chituomtuomte theithei na zong anei uhi. Tuachin, nuazui sawm-le-nite (12)-te khun thugin (thuvon)-a puongkhieta uhi. Tambang un:

Peter-in: “Bangkim bawlthei, Pa Pasian, Lei leh Van siempa khu ka gingta hi” achi hi.

Andru-in: “Atap neisun Jesu Khrist, i Mangpa Jesu Khrist zong ka gingta hi” a chi hi.

Jakob-in: “Ama khu Hagau Siengthou in a gaisah a, Mari in nungah a hilaiin a hingkhie hi” a chi hi.

Johan-in: “Pontia Pilatin huoisietahin a thuoh gimsah a, Singlamte ah kilbehin a um a, A shita a, phumin a um a” a chi hi.

Thomas-in: “Mi shi khuo ah avahaw a, Nithum ni’n mishi lah a pat a thoukiata hi” a chi hi.

Jakob-in: “Van ah katou kia in, Bangkim bawlthei, Pa Pasian zietlang ah a touta hi” a chi hi.

Philip-in: “Khuna patin hing kuksuh kia va’n, mishi leh mihing vaihawmsah dingin” a chi hi.

Bartholomai-in: “Tuachi’n Hagau Siengthou ka gingta a” a chi hi.

Matthiu-in: “Mi zousie a ding a Hattuom Siengthou um zong ka gingta hi. Mi siengthoute kipawlkhawmna zong ka gingta hi” a chi hi.

Simon-in: “Khel ngaidamna ka gingta hi” a chi hi.

Thaddai-in: “Tahsa thawkiana ka gingta a” a chi hi.

Mathia-in: “Kumtawn a hinna toh Amen” chiin a khumsinta uhi.

2.iv). Athanasia thu vawn.

Tam, ‘Athanasia Thuvawn’ (Athanasian Creed)-chi a hattuumte’n i kipiehsawn zelzel uh khu kum zabi 4-na hunlai a, Pasian Khat a Mihing Thum um (Trinity) thugin leh Jesu Khrist Pasian ahina thugin kembittu minthang, Egypt gam a Alexandria khuo Bishop, Athanasia (296-373)-in a ang guonggal tou ahi. Tami Thugin in ‘Pasian khat a Mihing thum (Trinity) thugin leh Khrist hina (nature)-thuginte tawmnou khat in a ahilchien in a puongkhie’ hi.

2.v). Chalcedon Thuvawn.

Hattuum masaten, ‘Chalcedon Thuvawn’ (Chalcedonian Creed)-chi a, i zui/kipiehtou zelzel u’khu kum AD 451-a, Chalcedon khuo (tua Turkey gam a umta), Hattuum khawmpi lien li veina (4)-in Khrist hina (nature) tungtang a zilsahna dihlou umte genchetna ding leh dawnna ding in a pawmta hi. Tami, Thugin in, ‘Khrist khun hina chini (mihing ahina leh Pasian ahina)- mi khat a umkhawm anei a, tuachin ginna dih khu a puongkhie’ uhi. Aumzie ahileh, Mangpa Jesu khu za-a-za (100%) Pasian hinna nei ahibangin za-a-za (100%)-mazong mihing hina nei ahina genchetna ahi.

2.vi). Westminster Confession (Thugin).

Tami thugin hing kipat dan ahileh, June 12, 1643-in, England leengnu/kumpinu solkalin, Hattuum kivaipuoh dan leh Pasian biehdan leptuohna ding leh zilsahna dihlou leh thugin hilchet dan dihloute suhtuohna dingin Pasian ging/zau mite kimukhawmna (Assembly)-neina dingin Dan a siem hi. Tuachin, July 1, 1643 akipat March 25, 1652, sung in ‘Westminster Abbey Assembly of Divines’ a siemkhieh ahi. Tuachin, tami thugin a siem/bawl tungun, Pastor mi za-le-sawmni leh khat (121), mipi (lay men)-Parliament member mi sawmthum (30), leh Scottist khawmpi simtu (observer), mi guh (6)-ten tami thugin a siem uhi.

Tami Assambly khu ‘Church of England’ thugin bieh dan bawlhoi na ding leh Pasian Lai-sien-thou toh kituohlou zousie suhbei a, Parliament-in a hatkhawm a kibawl ahi. Tualeh, thuginte, biehnate dante leh Hattuum kivawn/kepdante khu a siemphat ban uah, thu kidawngtuo a bawlsieng ding chi in theitopin pan anala uhi. Tualeh, tami thugin khu Pasian Lai-sien-thou pawm zousie in zong angaisang uhi. Scotch mi khat, Thomas Carlyle in, thu kidawng

masa pen, ‘Mihingte i umna zieh uh bang e? chi donna khu ‘Pasian patawi ding leh Ama a kipah zing ding’ chite khu “I hing upat deueu ua, kumtawn kotkhah bul a idin leh ka naupan lai a kana zilte ka lungtang sung ah ang kilang deudeu hi” a chi hi.

Tuabanah, John Calvin, zilsahna dung zui a thugin a puonkhieh ahiziehin zong, tuni dawngin Presbyterian Hattuumten thugin bulpi pen khat in i neita uhi. Tami thugin bawlina a mi tam pen khu Presbyterian hattuumte ahi uhi. Tuabanah, tami Assembly ah hattuum pawl tuomtuom lamkai- Episcopalian pawlte, Presbyterian pawlte, Independent pawlte leh pawl tuomtuomte zong a jau uhi.

3). Pasian thu gen chienna (Theology).

Theology khu Grik ham a, ‘Theos’ chi leh ‘Logos,’ apat a Sapham a Theology a kichi hi. Tualeh, ‘Theos’ khu Pasian china ahi a, ‘Logos’ khu thu china ahi. Atawmkimin, Theology khu “Lungsim leh ngaituona chintah zang/mang a Pasian thu zilna leh genchetna’ ahi. A khen chiengin, ‘Thugin’ chi-a lekhieh leh zah hun zong a um hi. Ahin, Theology i chi chiengun, Pasian tungtang maimai zilna ahisih a, Pasian tungtang ahithe i tan a suina, mihing leh a silsiem dangte toh a kichimatna leh adangdangte zong a huop hi.

Tualeh, ginglou mi mipil leh siem Plato leh ama sangshie/ zilsahtu, Socrates-in zong theologia chi khu Grikte Pasian (gods)-te tungtang genna in anazang khinta uhi. Hattuum masate hun lai a, puitu, Clement of Alexandria leh Origente hun lai a kipatin Theology chi kamteng khu Trinity tungtang leh Mangpa Jesu tungtang genna in zong ana zang/mangta uhi. Tamna i gen nuom ahileh, ‘Theology leh Thuginte’ zong kikhenthei lou leh kizop ahidan uh i gen nuom uh ahipen hi.

Dohnate:

- 1). Jerusalem Khawmpi thupuosah bang e?
- 2). Bangzieh a Nicia Khawmpi anei uh e? Lengpa Constantine panlah dan tawmkimin gen in?
- 3). Apostolte (Puonkhieh) Thugin tawmkim in gen in?
- 4). Chalcedon Thugin in a puosah bang e?
- 5). Westminster Confession (Thugin) a bawldan uh gen in?
- 4). Theology bang china e?

.....

BUNG – 3

BIBLE MIN UMZIE, PASIAN HUHAKHUM AHIDAN, KIKHENDAN LEH ATUPTTE

Thuchiin ding:

*“Laisiengthou zousie, Pasion huhahkhum ahia, thutah kihilna
adiing mawng ahi. Dihlounate phawh in khelnate sudih in hindan
hoi theina diing in thu apie hi’ (II Tim. 3:16).*

1). Bible min umzie:

“Bible” chi umzie khu Greek ham a ‘Biblion’ leh ‘Biblio’ chite apat a lah ahi a, a umzie khu ‘laibute’ china amaw ‘laizuolpi’ chinate ahi uhi. Bu khat sang a tamzaw genna ahileh ‘Ta bablia’ ‘laibute’ a kichi hi. Ahinlah, Thuhun Lui ah Bible chi kammal zahkhah in a umsih a, ‘Pasion laibu’ ‘Laisienghtoute’ ‘Laibute’ chi-a gen ahi uhi (Dan. 9:2; Mak. 1:56; 3:48; 12:9).

Kumzabi 5-na ah, Greek Hattuum puitute’n ‘Biblia’ chi khu Khristiante Pasion laibu pumpi genna in anazangta uhi. Tualeh, Latin ham zangte’n zong tam ‘Bablia’ ana zui uhi. Bible chi khu laibu khat sang a tamzaw ahi a, Bible bupumpi genna in a hing kizangta hi. Tualeh, Thuhun Lui bute khu Thuhun Tha ah khun Pasion laibu (Mat. 21:42). Pasion lai/thu (Mat. 22:23), Laisiengthoute (Rom. 1:2; II Tim. 3:15)-chite ahi uhi. Tuabanah, a sung a thute jiehin laibu dang zousie sang in a tungnung in aloupizaw a, ‘Bible’ chia i gen mai in zong Khristiante sakhuo bu ahi chi’ i thei ngal uhi. Tualeh, mihingte kung a silpieh thupi pen khu Khrist leh Hagau Siengthou banah, a thumna khu Bible ahi a kichi hi. Laibu kimangte lahlah ah Bible khu a upa/tah pen a, tualeh, leitung pumpi a laibu kizuoh tam pen leh doudalna tuoh pen chilei zong i chi khiel sih ding uhi. Rome

leng/kumpi Voltaire in zong ahunlaiin, khawvel pumpi-a Bible zousie haltum sieng a suhbei ding chin pan nasatahin anala hi. Ahin, ana lawsam a, tunin, Bible khu khawvel a laibu kizuoh tam pen leh silbawltheipen in gingtute hileh ginglouten zong angai chiet uhi.

2). Hagau mi leh mi thupiten Bible hina leh manphat dan a gente.

2.i). Mi minthang, Sir Walter Scotta in, adamlaiin laibu tampi khat a gel a, zong Library ah laibu tuomtuom a koikhawm hi. Ahin a shiding kuonin ama tanchin gieltu pa John Gibson Lockharta kung ah, “Laibu khat hing pie in a chi hi. Lockharta khun a thugen leh a laibu gen khu a theizou sih a, Pu, aw bang laibu pen e kang pieh ding a chin a dawngta hi. Aman leitung ah laibu khat maimai a um a, tuakhu BIBLE ahi” achi khum hi. 2.ii). J.W. Chapmanin, “Bible khu na pilna dingin sim/zal in. Na bitna dingin gingta in len, na sienthoua dingin zui/mangin; guntahin zil inlen, a thute gingta kawmin thum inlen, zong na zang/mang ngal ding hi. Banah, chiemte inlen midangte zong pesawn in” a chi hi. 2.iii). Andrw Jackson in, “Bible khu i gam vaihawmna kingahna ahi” a chi hi. 2.iv). USA President lui, George Washingtonin, “Bible jaulou/tellouin hoitah leh dihtahin leitung vai a kihawmthei sih” a chi hi. 2.v). Alfred Tennysonin, “Bible sim khu pilna muna (education)- a ching mongmong hi” a chi hi. Tamte ban ah gending tamtah zong a umding hi.

3). Bible Pasian huhakhum umzie:

I Bible uh Pasian huhakhum ahi chi khu, (II Tim. 3:16)- ah, imu ua, “Laisiengthou zousie Pasian huhakhum ahi a, thutah kihilna diing mawng ahi. Dihloute phawh in, khielte sudih in, hindan ahoi theina diing in thu apie hi” chi imu uhi. Tam thu panpitu hoitah khat khu Job 32:8 ah “Hinanlezong bangkim bawlthei Pasian Hagau khu mite tung ah hing tung in pilna a pie a” chi imu uhi. Tamte banah, Bible khu Pasian huhakhum ahi chi ngaidan hing kipatna bul ahileh Genesis 2:7 ah, “Mangpa Pasian in hinna hu a nahkuo ah ahu ahakhum a, tuachi in mipa khun hinna a hing neita hi” chi ahi. Tuabangma in, ‘Pasian khu Bible ah mihingte hinna petu ahithu ang hil hi’ chi imu uhi. Tualeh, (II Peter 1:21)-ah “Ajiehpén, Jawlneite thugen khu mihing ngaidan a hing kipan mai ahisih a, mite khu Hagau Siengthou in a thunun a, tuachi in Pasian a hing kipan thute khu a gen leng uhi” chi zong i mu uhi. Bible Pasian huhakhum ahi

chi umzie khu Bible gieltute'n Pasian Hagau puina toh a giel uhi china ahi pen a, tualeh Pasian huhakhum chi pen "Pasian Hagau in zong a suhing" china zong ahi.

4). Bible sung kikhen dan leh gieltute:

Ei Protestante pawmdanin, Bible khu laibu 66- kigawm ahi. Thuhun Lui ah bu 39- a um a, Thuhun Tha ah bu 27- a um uhi. A tangpi a hisapin bawng/Bung umzat Thuhun Lui ah 929 aum a, Thuhun Tha ah 260- aum a, a kigawmin bung 1189 a um hi. Tualeh, tang umzat ahileh Thuhun Tha ah tang 23214, aum ua, Thuhun Tha ah 7958, a um a, a kigawmin 31172-vel umding a hisap ahi uhi.

Agieltute khu Jawlneite, Leengte, Doctorte, sie-dawngte, lengpa tapate, laphuoh siemte, mipilte (philosophers) leh a lah ua khenkhatte ahileh laisiemlou ngasaman mi leh adangdangte ahi uhi. Mi tuomtuom sawmli (40)-vel in kum 1600- sung vingveng a gel uhi. Tualeh, gelna mun leh hunte zong akibang sih ua, akhente khu akigel hun kum 1000- val bang kikh/kigamla ua, hinanle u'zong kikum kal leh kituohlou chiding mawngmawng zong um keilouin, mikhat gel/khut suoh abang uhi. Azieh ahileh a gelsahtute lungsung a nnasem leh theisahtu khu Pasian ahiziehi. A geltute sil suhlah utte zong akibang chiet ua, tuajiehin, akituohlou/kumkal khasih uhi. Paul in tam bang in agen hi, "Laisiengthou zousie, Pasian huhakhum ahi a, thutah kihilna adiing mawng ahi. Dihlounate phawh in khelnate sudih in hindan hoi theina diing in thu apie hi' (II Tim. 3:16) ah a chi hi.

6). Bible a Laibu umte khen dan tangpite:

I Bible uh khu atangpiin, Thuhun Lui leh Thuhun Tha-te khu lawmpi nga (5) in a kikhen uhi. Tuate:

6.1). Thuhun Lui bute:

6.1.i). Mosi laibute, khu 'Pentateuch' a kichi hi. Tuate ahileh, Genesis apat Deutronomy tan ahi ua, Bu nga (5) apha uhi. 6.1.ii). Tangthu/ mi gelna Laibute ahi u'leh Joshua apat Esther tan Bu Sawmleni (12) ahi uhi. 6.1.iii). Labute Job apat Solomon late Bu nga (5)-ahi uhi. 6.1.iv). Jawlnei liente Isai apat Daniel tan Bu nga (5)-ahi uhi. 6.1.v). Jawlnei neu/mengte Hosia apat Malaki tan Bu sawmleni (12)-ahi uhi. Tualeh, Thuhun Lui laibu khu a kigawm un-Bu sawmthum-le-kuo (39) ahi uhi.

6.2). Thuhun Tha bute:

6.2.i). Khantanhoi bute Mathiu apat Johan-tan Bu li (4)-ahi uhi. 6.2.ii). Hattuum kipatna bu Nasepte (1). 6.2.iii). Paul laihahte, Romte apat Philimon tan, Bu Sawm-le-thum (13)-ahi uhi. 6.2.iv). Laibu dangte Hebrai apat Juda tan Bu giet (8)-ahi uhi. 6.2.v). Mangmuna/ Kihilna Bu khat (1) chite ahi uhi. Akigawm un-Bu sawm ni-le-sagi (27)- ahi uhi.

8). Atangpi a Bible in agente/suhlat asawmte:

I Bible in a tangpi a suhlat tupte/sawmte i theilou zieh un, buoina tamtah i tuohlawthei uhi. Bible in suichetna toh kituoh (Scientific)- in sil a suisawm sih a, tualeh, thu-leh-laa hoi tahtah leh khangthute kizom ditdet in zong a sut sawm diehsih hi. Ahin, i Bible in a suhlat asawm/tup tangpita ahileh Pasian in mihingte (Israelte /hattuomte)- te hinkhuo a hundamna nna asepdante, apuidante leh a itdante suhlat asawm hi chi lei ichi khiel sihdang uhi. Tuabanah, i Bible in suhlat atup thupi pen khu Hundamna thu ahi. Mihingte hundamna a poimawna jieh uh, hundam diing a Pasian in a bawl dante a genna ahitangpi hi. Bible in suhlat asawm thupite theichet kiphamaw a, theikhelkhah khu sil khohvawt ahidiing hi.

Tualeh, Etsahna dingin, Leitung nungahte leh Pasian tapate kipawl in hah-le-suon anei thu uh imu uhi (Gen. 6:1-4). Tuabanah, Melkisedek thute (Heb. 7:1-3) ah imu uhi. Tam thute in suhlat a sawm u'khu ahileh, amasa pen in, khelna huoisietdan a genlah ut ahi a, a nina pen in, Khrist khu Siempu bukim ahidante a gen ut ahi deu pen hi.

Tamte ban ah, Thuhun Lui khun dan thute a gen a, Thuhun Tha in itna/lungsietna thu a gen hi. Thuhun Lui in abul apan a, Thuhun Tha in asubukimta hi. Thuhun Lui khu Sinai Muol lah ah akiviel a, Thuhun Tha ahileh Kalvari ah akinga hi. Thuhun Lui khu Mosi toh akijop hi Thuhun Tha ahileh Jesu Khrist toh akijop hi. Thuhun Lui khu alim ahia, Thuhun Tha ahileh atahtah/abukimin in ang kilang hi.

11). Agieltupa thukup:

Tualeh, Bible Bu 66-umte khu Pasion huhakhum a i pom sihlele Hattuum dihi kihitheilou diing hi. Tuaziehin, tulai a Bible 66-sang a tamzaw ahisihi leh tawmzaw pomte tohi i thugin uhi kibang sihi china ahimai hi.

Dohnate:

- 1). Bible chi thuteng khu bang ham a kipat a hing kilahdoh e?
- 2). Bible Pasion huhakhum umzie bang e?
- 3). Bible gelna in hun bangtan a lut ei? Mi bangzaten a gel uhi e?
- 4). Thuhun Lui leh Thuhun Tha ten Bawng/Bung bangza a nei uoi?
- 5). Atangpi a Thuhun Lui leh Thuhun Tha ten genlah asawmte gen in?

.....

BUNG - 4

BIBLE GEL MASAHNA HAMKAMTE LEH ALEKHIEHNA TUOMTUOMTE

Thuchiin:

*“Ka thu khu meikuong bang ahia, tuachieng in suong satnathei
Sehpi toh kibang ahi hi” - Jeremai 23:29.*

1). Thumapui:

I Bible uh tulaitah a inei/zah bang ua achil apat a Pasian in a mite kung a Van akipat ang khiehsuh/houpi bang phiel a ngaidan nei tulai gingtute lah ah atam hi. Tambang ngaidan khu adih sih a, i Bible u’khu ham tuomtuom apat a hing kiletkhie a, kum tamtah zou nua in i Bible uh i nei thei pan uh ahi chi i theisiemna diing un ang kipatdan i sui diing uhi.

2). Bible kigelmasahna hamte:

Bible gelna diing a ham akizangte khu Hebrai, Aramic, Greek leh Latin hamte in ang kigel masa uhi. Thuhun Lui khu Hebrai ham a gelmasah pen ahi. Thuhun Tha khu Greek ham a gel masah pen ahi. Tam atung a ham li (4)-te a tomkim in i sui diing uhi.

2.i). Hebrai ham:

‘Hebrai’ ham a, a thuteng umzie khu ‘Eber’ chi apat lahkhiat ahi. A umziehtah khu ‘Kaantu, makheltu’ (The one who passes over)-china ahi. Tualeh, Hebrai ham hing kipatdan khu Sem hahte hamzah apat a hing kila ahi. Israel leh Judate’n a zang uhi. Suria gam Mallam Tuipi pieu a teengte, Phonikite leh Moabte ham toh zong kinaina anei hi. Bible ah ‘Kanante ham’ (Joshua 19:18) chite ‘Juda ham’ (I Leengte 18:26) chite in gel ahi.

Hebrai ham ah Consonant (amatang a gingtheilou thuteng), zietlam apat in veilamnaw in agiel uhi. Achiil in, vowel a nei sih ua, ahivang in, Juda laisiemte'n AD, Kumzabi guh (6)-vel in ang siemkheta uhi. Tuachin, Thuhun Lui Bible khu Hebrai ham a gel masah pen ahi.

2.ii). Aramaic ham:

Aramaic ham khu BC kumzabi 8 leh 7-kikal vel akipat a zah hidiing a gintat ahi. Assuria leh Babylonte in Suongpeh a thu agelnate uah tam ham a zang uhi. Tualeh, Aramaic ham khu Hebrai ham toh kisutna/ kibahna bangtan ahei khat a nei hi. Aramaic khu Parsis (Kaldai) ham ahia, BC 550-450, vel in a lengpa un ham in anazang hi. I Bible uah zong mun khen khat ah tami ham khu akizang hi. Thuhun Lui ah tam Bible taangte ah, Aramaic ham in akigiel hi. Tuate –(Ezra 4:7-7, 18; 8:12-26; Jeremiah 10:11; Dan. 2:4-7, 28; Gen. 3:47 ah imu uhi. Tualeh, Genesis 31:47 ah, Laban thugen 'Jegar Sahaduth' chi khu Aramaic ham ahi. Assuriate'n gam dangte toh kihouna hamzah (II Lengte 18:26; Isaia 36:11) zong ahi. Tabrimon min (I Lengte 15:18) leh Hazael chite zong Aramaic ham ngen ahi.

Tualeh, i Mangpa Jesu ngei in zong Aramaic ham in thu agen hi. Greek ham leh Hebrai ham zong a zang zelzel hi. Thuhun Tha ah Aramaic ham atam mama hi. Tuate khui – Etsahna ding in: Talitha kumi (Mk.5:41), Ephatha (Mk. 7:34), Eloi, Eloi, Lama Sabakthani (Mak. 27:46; Mak. 15:34). Maranatha (I Kor. 16:22), Abba (Mak. 14:36) leh Akeldama (Nasepte 1:9)- chite ahi uhi. Bible pumpi zong Aramaic ham a gel in ana um hi.

2.iii). Greek ham:

Greek ham khu akizah chiillai hun khu a sawtta mama hi. BC 800-vel akipat a zah ahitabou hi. Greek ham ang kithethangna jieh khu Alexander gamlahna jieh ahideu hi. Amapa khun Palestien gam, Suria leh Aigupta gamte khu BC 322-vel in anglazouta a, tuachin Alexandria khusu khu Aigupta (Tulai a Egypt)-gam ah ang bawlta hi.

Ahamte uh khu Judate'n tam hunlai apat in ang zangta uhi. Tualeh, AD 869-vel in, Hattuumte'n vaihawmna leh kikhopna ah ana mang/zangta uhi. Greekte'n ham tuomtuom anei ua, tuate khu

Attic, Acolic, Doric leh Ionic te ahi uhi. Thuhun Tha khu Greek ham a gelmasah pen ahi. A gieltute Luk chilou ngal khu Juda mi ngen ahi uhi. Nidanglaiin, Greek ham khu Palestine, Suria leh Egypt gam mite ham zah leh thei pen ahi hi.

2.iv). Latin ham:

Tami ham khu Bible geltute Bible gelna diing a, azah uh ham ahichet sih hi. Ahin, Thuhun Tha ah, bangza ahei khat zah ahi. Tamkhu, Romante ham zah pen khat ahi a, a kumpi/ sawlkal ham uh (State language) zong ahi uhi.

Mangpa Jesu hunlai in zong Palestine gam ah, Hebrai ham, Greek ham leh Aramaic, Latin hamte akizang khawm chiet uhi. Thuhun Tha ah zong, Latin ham zah ahi (Luk. 23:38; Johan. 19:20) ah i mu uhi. Thuhun Tha ah khun Latin ham 30-vei vel a um/tuong a, apoimaw deute khu: - Censu (Kisimpina) Rome Kumpi ham ahijieh in, Jesu Singlamte tung ah zong 'Judate kumpipa ahi' chi in Latin ham in a giel uhi. Tualeh a kizah dante khu: Centurian (Gaalkap bupa), Denaria (Makhai), Legion (Tampi), Praetorian leh Quadrans chite ahi uhi.

3). BIBLE LEKHIEHNA TUOMTUOM TE

3. i). Septuagint:

Hebraite khu gam chin a Pasian thu gingloute lah ah akithezah ua, aham uh theizou talouun, Greek ham zang atam uhi. Tuata zah diing in Aigupta gam Alexandria khuo ah Greek ham in aletkheta ua, a min diing in Septuagint ahisah uhi. Mi 72-vel in, a lekhie ua, Juda laisiemte in a zang pen uhi. Jesu pien masang kum 286-laivel a lekhieth ahi. Jesu damlai in zong tam khu a zahpen uh ahi.

3.ii). Vulgate:

Tami khu Latin ham a koi lekhieth e? Bangchihlai a kilet e? chi zong a kichiengtah a um sih hi. Tam ham khu, Roman Catholic Hattuum in a zah pen uh ahi. Jerome damlai leh Jesu pien nua AD kumzabi lina (4)-tan in a zang uhi. Kumzabi lina tawplam ah khun Jerome in Hebrai ham apat in a letkhie hi. Kumzabi sagina (7). -na a kipat in, Pope Gregory-I na-in, lekhiethna dih in apom a, zong a zangdenta

uhi. Tunitan a, azah pen u'khu, alui pen khu a endih ua, kumzabi sawm leh sagi (17)-na lam ah, Trent Khawmpi ah zah/man diing a puongkhieta uhi.

3.iii). English (Sapham):

English (Sapham)-a, Bible a lekhieta masa pen u'khu AD 1219 vel lai ahi. A letkhetu masa pen khu zong thei ahisih hi. Ahin AD 1318-lai in, John Wycliffe, Siemphatna (Reformation)- in Vulgate a pat in ang letkhie hi. Khum hunlai in laisutna khawl (Press) a um sih a, a hamsa mama a, mizousie in Bible a simding u'zong phal ahisih uhi. Tuahunlai in, Thuhun Tha bu khat man khu \$ 40-(India sum in Rs.560/-vel)-ahiding hi. Tambang khop a, avang leh mantam hizong leh mite'n simchiet a ut ua, a simkha zousie in sahkhoham leh khotaang hinkhuo ah masawna a mulaw zelzel uhi. Roman Catholic Hattuum leh a lamkaite uh dihounate uh khu Bible apat in ang kilangta hi. Tam khu Hattuum lamkaite a diing in sil buoihuoi leh nanawh ahing suohta hi. Kum 1408-ah, Oxford khuo ah a khawmpi un thupieh asuota ua, "Koima'n Sap-ham a Bible lekhieta diing, Wycliffe lesa zong khu abu-in, ahisihleh a peh a simtheilou diing' chite in agenta uhi. Gawtna leh bawlsietna zau jie in Bible sim diing zauhuoina lienpitah ang tungta hi.

Bangtan aheinua in, William Tyndale in Thuhun Tha bu khu Antwert khuo ah Sapham in khawl in ang sunta hi. Tuata khu, England gam ah a hawmzahta hi. Roman Catholic Hattuumte a diing in ang nawngkaita mama hi. London a Bishop in amu zousie khu a lei a, a haltum sieng hi. Ahin atamzaw sem sut in ang umta, tam khu khawl a Bible sutmasahna pen ang hita hi.

Tuachi'n, AD 1535-ah Miles Coverdale in Bible pumpi khu Sapham a let in ang sun kiata hi. Tuakhu, Leengpa Henry VIII-kung ah apeta hi. Kum 1568 tan in Bible lekhieta zieh a hamsahna khu a peitou zelzel hi. Tam khu, Bishop Bible ahisah ua, kum 50-sung vel a zang uhi. Kum 1603- in, James-I England Leengpa in Bible umsate khu dihkim lousahna a nei a, a lettha diing in mi 54- a guot hi. Ahing lekhieta tahtah un mi 47-vel in, a sem thei giap uhi.

Kum 1607 ah akipan ua, kum thum zou in azou uhi. Kum 1611 in London a Robert Barker on khawl ah a sunta uhi. Tam lekhietna khu ‘Authorised Version’ ahisahta uhi. Tunitan a Sapham a um Bible minthang pen khat ahita hi.

Dohnate:

- 1). Bible gelmasahna hamkam chilite gen in?
- 2). Hebrai ham hei a hing kipan e?
- 3). Bang hamte in Thuhun Lui Thuhun Thate a kigiel masa pen uoi?
- 4). Thuhun Tha a Aramiac ham thum hing gen in?
- 5). Septuagint Bible koi lekhiet masah pen e?
- 6). John Wycliffe in bang e a bawl?

.....

Bung-5

BIBLE GENTENA KAMMALTE LEH APROCRYPHA THU

Thuchin ding:

“Na thu khu keima hing chingkip Meivah ahi a, ka lampi a diing in khovah ahi” a chi hi (Late 119:105).

1). Thumapui.

Bible gelte kammalte leh eiten Pasian huhakhum ding a i pawmtheilou Aprocryphate i sui ding uhi. Ahin buching tah leh kintahin vang isuizou sih ding uhi.

2). Bible thu gentenate:

2.i). Namsau: Hebrai 4:12-ah, “Pasian thu khu ahing a, sil abawlthei a, namsaau alangni a kitathiem sang in ahienzaw a, tahsa leh hagau kizopmatna gu-le-taang kisuhtuona hawm chintuigu umna tanpha paillet in a sattan hi. Tuachi in mihing deidaan leh ngaituona tanpha tung ah thu aneithe hi” a chi hi. Tamkhun, Bible khu sil bawltheitah leh mi lungsim leh ngaituona sulamdang thei ahidan atahlang hi.

2.ii). Sehpi: Jer. 23:29, ah, “Ka thu khu Meikuong bang ahia, tuachieng in suong satnathei Sehpi toh kibang ahi” ach hi. Tami in sil a bawltheidan leh adaltute a zawthei dan a ensah hi.

2.iii). Chii setheilou: “Chii dihluu leh setheilou lah apat hilou in Pasian thu hingzing leh chii setheilou apat piengthasa nang hita uh” chi ahi (I Pet. 1:23). A silbawltheidan leh asawtdaan a langsa hi.

2.iv). Hiimlang: “Pasian thu in mihing dinmun leh Pasian khantante, akikal thute chiengtah leh feltah in tahlang leng hi” (Jakop 1:23-24).

2.v). Meikuong: “Na hing thupieh ka sung ah Meikuong bang in asa” hi (Jer. 19:9). Pasian thu in sil abawltheidan etsahna ahi.

2.vi). Meivah: Late 119:105-ah, “Na thu khu keima hing chingkip Meivah ahi a, ka lampi a diing in khovah ahi” a chi hi.

2.vii). Ann hoi leh dawn diing a hoi tui ahi: I Pet. 2:2; Heb. 5:12-14; I Kor. 3:2; Rom. 10:17-te ah imu uhi. Tualeh, damtheina diing, khanletna leh hatna diing a neh diing leh dawn diing tui zong ahi chite i mu uhi.

3). Apocrypha laibute:

I Laisiengthou ah laibu 66 khu ei Protestant hattuumten i pawm ua, ahin Greek ham a kigiel Thuhun Lui khu ei a sang in bu sawm-lel-li (14)- in, atamzaw hi. A zieh ahileh, Apocrypha bute a tuon ziehin ahi. Unau Roman Catholic-ten, tam Apocrypha-te a pawm ua, i gensa bangun ei Protestanten ahileh ipawmsih uhi.

3.1). Tualeh, Apocryphate laibute khu tam anuoi ate ahi uhi:

3.1.i). Esdras laibu masa (Esdras laibu thumna zong kichi hi). 3.1.ii). Esdras laibu nina (Esdras laibu lina zong kichi) hi. 3.1.iii). Tobit. 3.1.iv). Judith. 3.1.v). Esther laibu belapna. 3.1.vi). Solomon pilna. 3.1.vii). Ekklesiastikas ahisih leh Serach tapa Jesu pilna bu. 3.1.viii). Baruch laibu. 3.1.ix). Jeremia lai hah. 3.1.x). Azaria thumna leh tangval thumte laa. 3.1.xi). Susana laibu 3.1.xii). Bel leh Dragon. 3.1.xiii). Maccabee laibu khat 3.1.xiv). Maccabee laibu ninat ahi uhi.

Tam laibute pen BC 200-AD 100- hunsung vel gel ahi ua, Khristian masate leh Hattuum lamkaite’n Pasian huha khum hidiing in a pomsih uhi. Tuajiehin, i Bible uh bu 66-toh zong ana simkhawm ngai mawngmawng sih uhi. Origan (AD 400), Alexandria a Bishop, Eusebius (340-AD), Jerusalem Bishop Cyril (400-AD), Alexandria a Bishop Athanasius (365-AD) leh adangdangten zong Laisiengthou bulah a, a pawm/simnuomlou ban uah, abute zong simlou diing ana chi uhi. Ahin, unau Roman Catholic Hattuum in Bible in apom ua, tam khu i Thugin ua i kikalna uh khat ahi hi.

4.). Aprocrypha Laibute Pasian huhakhum ding a akipomlouna jieht:

4.i). Mangpa Jesu leh Khristian masate'n Thuhun Lui Laibute apat in thu tuomtuomte lasawn nan u'leh zong, Aprocryphate apat in tengkhat zong a lasawn sih uhi. Jesu leh Sawltah te'n zong Pasian thu in a pomsih uh china ahi. 4.ii). Judate laigieltu minthangte Philo, Josephus leh Jamnia a Jewis Council (AD 90) leh Khristian laigieltu dang Origan leh Jerome-ten zong Laisiengthou in a pom sih uhi. 4.iii). Laisiengthou thu zilsahna peipi toh kikal in zilsahna tuomtuom a piengsah thei hi.

5). Aprocrypha Laibu sung a kigen i pawmtheiloute uh:

5.i). 2 Macc. 12:43-45 ah, 'Purgatory' thu a zilsahna thudihlou a tuong hi: Tuabanah, Jerusalem a khelna kithoina diing sum/dangka-eng tang'neen 2000-a khieh chiengt ua ... mishisaten a khelna uapat tatna a mu theina diing un, mishite a diing in anabawl zel uh chi thu a gen hi. 5.ii). Tualeh, Ekklesiaticas 3:30- ah, Nnasep hoi jieh a hundamna muthei dan in a gen hi. 5.iii). Tobit 6:58 ah Laisiengthou toh kikal 'Dawi biehna' chikhat a tuong a, "Dawi ahiei ahisihleh hagau gilou in mi koi ahei khat asuhbuoi leh ngasa lungtang, asin-le-asinkha mei a halna khu in a hawlkhethi a tang 17-ah, tua dawi in gimnam a zah chiengin a taimang diing a, tuachi in ahing kinualezaw sih diing hi chi hi. 5.iv). Tobet 12:8-9-ah, "Sana/Dangka lawmkoikhawm sang in silpieh pieh ahoizaw a, ajieh ahileh shina akipat hunkhie in khelna zousie a lamangsiengthei hi" chi in nnasep-le-silpiehte a hundamna lawkhiet thei diing dan a gen hi. 5.v). Baruch 3:4- ah, Pasian in mishisate thumna dawng dan in agen hi. 'Avanglien Mangpa aw, nang Israel Pasian in Israel shisate thungetna na dawng hi' chi in agen hi. Tamkhu, Laisiengthou zilsahna toh akikal mama hi. 5.vi). Khangthu leh Leitung gam thu ah thudihlou bungkhat a tuong hi. Judith 1 leh 2 i sim leh Nebukanezar General Holofernes in Nineveh khopi ah Assuriate a vaihawmkhum chi in kigiel hi. Adihtah in, Holofernes khu general ahia, Nabukanezzer pen khu Babylon Leengpa ahi. Tamte jiehin, ei Presbyterian Hattuumte in Aprocrypha bute khu Pasian thu in i pom theisih ua, vangsiethuoitah in igam uah zong Aprocrypha deile-deilouna ziehin hattuum tanpha ina kikkenlaw va-ia uhi.

6). Bible leh Hattuum:

Bible leh Hattuum khu Pasion in Ama aw leh vanzat in amang leng a, tuajieh in i thugen leh silbawl zousie Bible toh kite/ki-et kah zel diing ahi. I sep-le-bawl zousie khu Bible toh kikal ahileh pomtheilou leh pomtahlou ahidiing hi. Mi khen khat in Bible khu Pasion thu ahi chizel kawm in Hattuum a ngaipoimaw zaw ua, Bible khu Hattuumte bawlkhiat ahi achi uhi. Hinanlezong abu bou khu Hattuum khut suoh ahi a, a bu sung a thutah khu Hattuum phuttute leh Hattuumte sang a upa zaw ahi. Alelamkhat ah mi khenkhatte'n Bible khu a koi sang seng ua, Hattuum khu bangma a ngailou pawl a umkia uhi. Bible khu Hattuumte vahna diing leh etkolna diing a gel ahizaw hi. Tuaziehin, Bible leh hattuum zong a kikhentheih sih chi zong ithei ding uhi.

Dohna:

- 1). Bible gentena hamzah tuomtuom bangte e?
- 2). Aprocrypha laibute bangza ahiei?
- 3). Bang ding a Aprocrypha bute eiten i pom theilou uh e?
- 4). Bible leh hattuum kichimatnate gen in?

.....

BUNG -6

PASIAN LEH A MINTE

Thuchiin diing:

“Mangpa na Pasian khu na lungsim zousie, na Hagau zousie, na hatna zousie toh na it ding ahi”. (Deut. 6:4).

1). Thumapui:

Khristiante thugin ah khun, ‘Pa Pasian’ khu a poimaw pen i chi thei ding uhi. ‘Bangkim bawlthei Pa Pasian Lei leh Van siemtu khu ka gingta’ chi khu Khristiante thugin pipen khat ahi. Tualeh, Pasian khu tahsa lam a diing in zong Pa a ching hi. Leitung leh a sung a um zousie siemtu, a thuthu a umsahtu ahina zong Pa a chinna hi. Tambang, a Pa hina dinmun lientah leh hoitah khu sahkhuo dangte khun a thei pha sih uhi.

Tualeh, Mangpa Jesu ngel in zong Pasian khu, ‘Ka Pa’ chi-a, a hat jiehin Pa ahina i thei chieng deudeu uhi. Leng leh vaihawmtu ahina mang tuomlou in, ‘Pa’ ahina khu Khristiante khun i ngai poimaw tahzet uhi. Tualeh, ‘Pa’ chi sang a umzie thuh zaw in Mangpa Jesu’n a Pa khu, ‘Abba’ chi’n ahan hi (Mak. 14:36). ‘Abba’ khu ‘Aramaic’ ham ahi a, kitanauna nai, kilungsietna leh kipawlna thuh tah a zahna kammal ahi. Tualeh, Paul in ei gingtute’n Hagau Siengthou jiehin, Pasian khu ‘Abba’ (Ka Pa) chi in i han thei giep uh chi in ang hil hi (Rom 8:15; Gal. 4:6).

2). Thuhun Lui leh Thuhun Tha a Pasion minte (names)- i gending uhi:

2.1). Thuhun Lui a Pasion minte:

2.1.i). EL: chi leh Elohim chi khun Pasion khu a hat a, sil a bawlthei a, zaudiing ahi chi a ensah hi. 2.1.ii). ELYON: chi khun mizie loupitah, tungnung pen zatat diing leh biehdiiing ahi chi a ensah kia hi. 2.1.iii): ADONAI: chi khu Mangpa chia lekhieh ahi leng hi. Mihing zousie neitu leh vaihawmtu ahidan a ensah hi. 2.1. iv). SHADDAI or El –SHADDAI: Tam khun Pasion khu a silsiemte toh lawm bang a kijopna nei ahi chi a ensah hi. 2.1.v). JEHOVAH (YAHVEH: Tualeh, Pasion min Judate’n a zatat mama uh khu Jehovah (Yahveh) ahi. Ang kipatna khu (Exo. 3:14,15)-ah alang hi. Pasion khu a um ngai a um zing leh Amite toh akijopna ah a thuhun a sudanglam ngai sih a, a thuchiem suhbukimna ah a gin-um leng hi. ‘Sepaite Mangpa’ chi min khu a pua zing hi.

2.2). Thuhun Tha a Pasion minte:

Thuhun Tha a minte khu Thuhun Lui a umsa, Greek ham a zah ahi pen hi. Tam minte khu a taangpi in tamte ahi uhi.

2.2.i). THEOS: Tam min khu Pasion china ahi mai hi. Thuhun Tha a zah ahitaangpi hi. Akizahdan khu, ‘Ka Pasion’, ‘na Pasion’, ‘i Pasion’ chite a zah ahi uhi. Khrist ah khun, Pasion khu a tate zousie Pa ahi. Tambang in, ‘Israelte Pasion’ chi khu Thuhun Lui ah a tam mama hi.

2.2.ii). KURIOS: Tam khu Mangpa china ahi. Tam min khu Pasion min maimai hilou in, Khrist min a diing in zong zah ahi. Silbangkim tung a vaihawmtu leh thu neitu ahi chi a sulang hi.

2.2.iii). PATER: Tam min khu Thuhun Tha ah khun min tha bang in agen hi. Ahi’n tam khu a dih tahtah sih a, ‘Pa’ min khu Thuhun Lui a lahdoh in, Pasion in Israelte akizoppi tuom dan a ensah hi (Deut. 32:6; Isai 63:16). Thuhun Tha ah khun, Pasion khu mi zousie Pa bang in akilang hi. A chang chieng in, Pasion khu sil zousie siemtu bang in a lang sah a, (I Kor. 8:6; Eph. 3:14). Tualeh a chang chieng in, Pasion a min thum lah a khat ‘Khrist Jesu Pa’ bang in agen hi (Johan 14:11; 7:1).

3). Pasian hina (Attribute):

Pasian khu a umdan mawngmawng ah sildang banga tawp hun neilou, danglam theilou ahi. Tuajiehin, Pasian mizie/hinate khu lawm ni in a khen hi. Tamte khu:

3.1). Apien phung a hina i kitanpi theiloute uh:

3.1.i). Pasian khu Kumtawn/Taangtawn pa ahi. 3.1.ii). Pasian khu munchinteng aum ahi. 3.1.iii). Pasian khu bangkim thei ahi. 3.1.iv). Pasian khu bangkim bawlthei leh bangkim thei hi. Tamte khu tawphun neilou, danglam theilou ahi. Midangte'n i neipi theilou uh leh i kitanpi theilou uh mizie/hinnate zong ahi.

3.2). Ahoina i kitanpi theiloute uh:

3.2.i). A pilna. 3.2.ii). A Siengthouna. 3.2.iii). A dihna/dihtatna. 3.2.iv). Ahoinate. 3.v). A itna/lungsietna leh 3.2.vi). Aginuminate leh a dangdangte ahi uhi. Tam atung ate khu Pasian leh Hagau Siengthou panpina toh eima'n zong i neithe uhi.

4). Pasian khat bou a um hi:

Pasian khat bou a um a, Ama bou khu bieh diing ahi. Bible khu Pasian kipuonna bu ahi a, tam Bible sung ah khun, Pasian bangkim siemtu leh bangkim tung a vaihawmtu khu khat bou ahi chi a lang chieng hi. Khristiante thugin ah khun, Pasian khu khat bou ahi thu i mu uhi. Mangpa Jesu'n, 'Ka Pa, na pa, ka Pasian, na Pasian' (Johan 20:10) chi-a, a gen in Ama gingtute a diing in, Pasian khat bou i nei uh chi a tahlang hi. Khum Pasian lou ngal Pasian dang mawngmawng a um sih a, tua Pasian bou khu bieh diing leh giin diing ahi (Deut. 6:4). Mangpa na Pasian khu na lungsim zousie, na hagau zousie, nahatna zousie toh na it diing ahi (Mat. 22:37).

Tualeh, Pasian khat bou a um hi chi thugin khu ei India gamte ah khun a poimaw dieh a, ajieh pen Hindute leh sahkhuo dangten pasien tampitah anei un abie uhi. Ahi'n, Israelte leh eite Pasian khat bou ahi a, 'Keima lou ngal Pasian dang a um a ma? Khat ma zong ka thei sih' (Isai 44:8). Jeremia khun, 'Nang Mangpa Pasian dihtah khu na hi, nang Pasian hing khu na hi a; kumtawn Lengpa khu nahi' (Jer. 10:10), ah a chi hi.

5). Pasion khu Hagau ahi:

Pasion khu thu a hing um ahi. Mosi kung ah Pasion in, ‘A um pa ka hi’ a chi hi. Israel hah-le-suonte kung ah khun, ‘A um Pa khun na kung uah mi ang sawl hi’ a chi hi (Exodus 3:14). Pasion bou in ‘A um Pa ka hi’ a chi thei giep hi. Bang chilai pou in, Pasion in umlou lai a nei ngai sih hi. Ama-le-ama a hing ummai ahi a, koima dang jiea a um zong ahi sih a, Ama-le-ama a um ahi mai hi. Pasion khu Hagau ahi a, mu thei leh khoi thei ahi sih hi. Mun chin teng ah a um a, hagau dang zousie leh sildang zousie lah a pat lamdang leh tuom vilvel ahi. Tualeh Hagau ahijiehin a bieh diing dan zong khu Hagau leh thutah a phut hi. I hagau ngei un i bediing ua, tualeh thutah leh a mizie leh a dei dan toh kituoh in i bediing uhi.

6). Hagau dangte toh akibang sih hi:

Pasion khu Hagau, kumtawn mi, hagau dang zousie tung a um, a tung ua vaihawmtu leh thuneitu ahi. Bible-in, ‘Ajiehpén Mangpa khu silbawlthei Pasion ahi. Pasiante tung a Lengpa khu’ ahi a chi hi (Sam 95:3). Tualeh hagau tampi um nanlezong, Pasion lou ngal giintah leh biehtah a um sih a; Pasion lou ngal khu Pasion a nei tah leitung ah a um sih hi.

7). Pasion khu a thawn a petu ahi:

Sahkhua dang betute khu a pasiente un a betute kung ah silpieh a ngen leng ua, silpieh tawi lou in a bediing in a pei/kuon ngai sih uhi. Ahi’n, ei Khristiante Pasion khun hing sui in a tapa ang le pieh hi. Silpieh tangtu hi sang in, a pekhetu hi a utzaw hi. A sil pieh lien pen khu a Tapa neisun i Mangpa Jesu ang piehna ah a kilang hi (Johan 3:16).

8). Pa Pasion khu suitu ahi:

Sahkhua dangte leh Khristiante kibahlouna khu sahkhua dang betute’n a pasiente uh a sui tho ua, Khristiante Pasion in vang a mite ang le suizaw hi. Khrist khantanhoi danglamna khu Pasion in a mite a suina thu ahi. Mangpa Jesu’n gentena thu ni ang hil hi. Tuata khu belum mang leh makhai mang sui thute ahi uhi (Luk. 15:1-10). Pasion in migiloute khu a gitlouna bang ua, thuh mai lou in ang sui in ang hundam zaw hi.

9). Pasion khu ngaidamtu ahi:

Ngaidamtu ahina khun Pasion khu vaihawmtu ahidan leh mihingte khu siemlou tansahna nuoi ah i umta uh chi ang theisah hi. Pa in Tapa silgilou bawltu khu siemlou tansah sang in a ngaidam bang in Pa Pasion khu ngaidamtu ahizaw hi.

Dohna

- 1). Khristiante thugin ah khun bang ding a Pasion a poimaw gen e?
- 2). ‘Abba’ bang ham a pat hing kiladoh e?
- 3). Thuhun Lui a Pasion minte bangbang e?
- 4). Thuhun Tha a Pasion min Greek ham-ate hing gen in?
- 5). Pasion pienphung (Ahinate) i kitanpi theiloute gen in?
- 6). Bang diing a Pasion khat bou um thu India gam a poimaw dieh e?
- 7). Pasion hagau ahijiehin bang chi bang a biehh diing a phut ei?

.....

BUNG -7

PASIAN A MI THUMTE LEH A NNASEP DAN UH KILAH DAN

Thuchiin:

“Tuachia Jesu’n Baptisma a tanzou in Tui sung pan in ang pawt a, khum in Van kihong in Pasian Hagau Vakhu bang a hing kum in atung ah atuong a, tuanah Van pan a aw khat in “Tam, ka Tapa, ka lungdamna mama khu ahi” (Mat. 3:16-17) a chi hi.

1). Thumapui:

Awle, i Bible uah ‘Trinity’ chi thuteng pen a umsih a, ahivang in genchien leh theichien kiphamaw mama thugin poimaw tah khat ahi. Pasian ah mihing thum a um a, Pa, Tapa leh Hagau Siengthou ahi uhi. Amaute khu hina kibang, kumtawn/tangtawn a umzing khu ahi uhi. Hinanlezong, Pasian thumtah um china vang hizawlou in Pasian khat ah hina/mihing thum a um china ahizaw hi.

Tami thugin khu mihing hilchet phahlou sil ahi a, hilchet teitei sawm sang in Bible a i mu bangbang a pom khu ahimai hi. Masanglai in mi khen khat in “Pasian khat bou ahi-a, a chiil in Pa bang in ang kilang a, tuazou in Tapa bang in ang kilangkia a, tu-in, Hagau Siengthou bang in ang kilang hi’ achi uhi. Mi khen khatte’n, Pasian khu hun tuomtuom ah, hina tuomtuom nei a hing kilang/kilah bang in a ngai ua, tuakhu, i Bible uh zilsahna toh kituohlou ahi. Tam thugin khu Sebellia hing gendoh ahi a, tuajieh in tam thugin min khu ‘Sabellism’ a kichi hi. Tam thugin/zilsahna khu a chiillai in mitamtah in apom ua, ahivang in Thuhun Tha zilsahna toh a kikal a, tuajiehin, Kumzabi thumna (3)-lai in, Hattuumte’n ana nuolta uhi. Ahin, eite lah ah zong tambang ngaidan pawmpawl a um uhi.

2). Bible a Trinity kilah dan:

Tualeh, Genesis ah, Pasian in mihing a siem lai in (Grammar dihtah i sui leh thuteng/kammal khu khat sang a tamzaw (plural)-a zang a, “Eima lim-le-mel sun in eima bang ngel in ... Lei ah thu i neisah diing uh” (Gen. 1:26) chi in i mu hi. Tami khu Bible siemten Thuhun Lui a Pasian a mithumte (Trinity)-kilahna masa pen ahi a chi uhi. Tuabanah, Thuhun Lui ah Pasian khu a mi Israel tate kung ah Meikuong leh Meipi in akilah/lang hi (Exo. 19:17).

Tualeh, Thuhun Tha ah Pasian Tapa bang in ang kilah na thu isui ding uhi. Lei kisiem masang in Thu khu ana um ahitabou a, thukhu, Pasian toh umkhawm in Pasian bang in a um hi. Tua thu khu mihing a hing pieng in.... (Johan 1:1). Tualeh, Mangpa Jesun Baptisma a tanlai in, Pa Pasian khu Van a kipat in ahing hamdoh a, Tapa Pasian in Tui ah Baptisma a tang a; Hagau Siengthou Pasian khu vakhu bang in Tapa Jesu tung ah ang tuong/tu hi (Mat. 3:12-17). Tamkhu, Pasian chiengtah a thum bang a ang kilahna ahi hi.

Tuabanah, Jesu’n, baptisma tansah diing dan ahilna ah – “Gam chin ah pei unlen mizousie ka nuazui in siem un; Pa, Tapa leh Hagau Siengthou min in baptisma bawl un” (Mat. 28:19) achi hi. Tualeh, Sawltah Paul in zong, “Mangpa itna, Pasian zangaina, Hagau siengthou pawlna” (II Kor. 13:14)- chi’n agen hi.

3). I Bible ua Trinity nnasepdan khen khatte:

3.1). Silsiem a akilah dan uh: -

Pa Pasian in - “Vah hing umhen achi hi” (Gen. 1:3). - Tapa Pasian - “Achil in thu ana um a, thu khu mihing a hing pieng in” (Johan 1:1, 14), - Hagau Pasian - “Pasian Hagau khu Tui tung ah avah kawikawi a” (Gen. 1:2; Job 26: 12-13), ah i mu uhi.

3.2). Jesu pienna ah: -

Pa Pasian - Tapa khattang neisun petu (Johan 3:16), ahi. - Tapa Pasian - Leitung ah a hing pieng a (Luk 2:1). Tualeh, - Hagau Siengthou Pasian - Mary naupaisahtu (Luk 1), ahi hi.

3.3). Hundamna nasepna ah: -

Pa Pasian - Tapa kipumpiehna pomtu (Heb. 9:14), ahi a, - Tapa Pasian
- A mite adia kipetu (Heb. 9:14), ahi. Tualeh, - Hagau siengthou
Pasian - Tangtawn a diing a sudettu (Heb. 9:14), ahi.

3.4). Thumna ah: -

Pa Pasian - Thumna ngaikhetu ahi a (Johan (6:13), - Tapa Pasian
- Ama min a thunget diing (Johan 16:23), ahi a, tualeh, - Hagau
siengthou Pasian - Lungsim heilamdangtu leh mite piengthasahtu
(Johan 3:3-6), ahi hi.

3.5). Thawkiana leh hinkhuo piehna ah: -

Pa Pasian - Loupina ahing laluttu (Luk 10:20), ahi a, - Tapa Pasian -
sisan lultah a khelna silsiengtu (Ephesate 1:7), ahi. Tualeh, - Hagau
siengthou Pasian - Lungsim heilamdangtu leh mite piengthasahtu
(Johan 3:3-6) ahi.

4). Dihpen chet sih leh zong etsahna chituomtuomte tungtawn in/zangin Trinity hina gen i sawm ding uhi:

I gensa bangun, Pasian a mithumte tungtang mihingte pilna toh
genchet leh sutthei tahtah ahisih hi. Ahivang in, Ama (Pasian) hina
neukhat beh i theitheina diing un etsahna chituomtuomte toh igen
ding uhi. Ahin, tamte khun Trinity hinatah a genchieng thei hi china
vang ahisih hi.

Tuate:

4.i). Tui toh tekah talei:

Tui khu chithum in ahina muthei in a um hi. Etsahna ding in, tui
khu Pasian hita leh (Tui=Pasian), Tuikhal/vua khu Tapa Pasian hita
(Tuikhal=Tapa Pasian) leh, Tuihu ahileh Hagau Siengthou Pasian
(Tuihu=Hagau Siengthou Pasian)-chite in, genta lei tui ah hina
chithum kikhentheilou imuthei uhi. Khat hingal chithum a hina
kilangthei china ahi.

4.ii). Ni (Sun) toh tekah kiatalei:

Nisa (sun) hina zong chithumin i suithei uhi. Nisa pen Pa Pa
Pasian hita (Nisa= Pa Pasian)-leh, Nivah khu Ta Pasian hisahta lei
(Nivah=Tapa Pasian), Nisatna/lumna khu Hagau Siengthou Pasian
(Nisatna/lumna=Hagau Siengthou Pasian)-chite in zong i suithei
uhi.

4.iii). Singkung toh tekah kiatalei:

Sing zung khu Pa Pasian hita (Singzung=Pa Pasian) leh, Singkung khu Tapa Pasian (Singkung=Tapa Pasian) leh sing-ga khu Hagau Siengthou Pasian (Sing ga= Hagau Siengthou Pasian)-chite in igenthei ding uhi.

4.iv). Mei (Fire) toh takah kialei:

Mei khu Pa Pasian hita leh (Mei= Pa Pasian), Meikuong khu Tapa Pasian (Meikuong= Tapa Pasian), leh Meivah khu Hagau Siengthou Pasian (Meivah= Hagau Siengthou Pasian), chite-in zong itekahthei ding uhi. Tamnah, Mei in lumna ahisihleh satna leh vahna zong a nei hi. Ahivang in a thum un, Mei ahi uhi.

4.v). Ahtui (Egg) - toh gente kiata lei.

Ahtui hawng khu Pa Pasian hita leh (Ahtui=Pa Pasian) Ah tui sung a kang pen khu Tapa Pasian (Ahtui sung a kang=Tapa Pasian) leh Ahtui sung a alaigawl khu Hagau Siengthou Pasian (Ahtui laigawl= Hagau Siengthou Pasian)-chite in igenthei ding uhi. Ahtui ah hina kikhentheilou chithum umte toh gente thei ahi a, ahin i gensa bangun tam a tung a gentena i gente in Trinity hina tahtah agen chieng zou sih hi. Etsahna tamtah gen diing a umkha diing a, hinanlezong i gen chieng theituom sih diing uhi. Tua i gensate akipat in Trinity umzie i thei belap uh i lam-en hi.

4.vi). Mihingte hina toh gente lei:

Tualeh mihing ah khun sil thum - Tahsa, lungsim leh Hagau a um ua, tamte pumkhat hina jieh a mihing um ahibang in Pasian a mi thum igente zong pumkhat ahidan u'toh gente thei ahi

5). Thukhumsin:

Bangteng hilezong, Trinity khu chientah a thei hamsa mama khat ahi hi. Ajiehpen, Pasian khat khu thum ahi a, thum khu khat ahi. Ahina kichientah a i theitheilou khu pong buoipi louzawh diing ahi. Mi'n Trinity a theichien theilou jieh khu khoh asah leh a buoi deudeu kha diing hi. Ajieh pen Trinity khu Mangpa Pasian Hagau kithuopina toh theichet thei sil ahibou hi. Paul gendan in, "Pasian in Leitung a siemchil akipat in mutheilou ama loupina, A tangtawn silbawltheina, leh ama hindan siengthou khu chientah a mu in" a um hi a chi hi.

Pasian in a siemsa silte akipat mite'n Pasian hina tahtah a theithei uhi. Tuajieh in amau a diing in paulap diing a umsih hi (Rom 1:2). Bang silsiem pen tungtawn a theithei diing e chita uleh - Pasian in mihing asiemdiing in 'Eima bahpi/eima bang/suun in siemvai' (Gen. 1:20) achi hi. Tamnah Trinity chientah in akilang mama hi.

Dohna

- 1). Sabellia in Pasian a mihing thumte kilahdan bang chibang in a gen ei?
- 2). Bible sung a Trinity kilahna masa pen bung leh tangte gen in?
- 3). Mangpa Jesun Jordan lui a baptisma atan laiin Trinity (Pasian a mi thumte)-bang chi'n ang kilang uoi?
- 4). I Bible ua Trinity nnasepdan khen khatte bangbangte e?
- 5). Trinity gentena/etsahna ni hing gen in?
- 6). Trinity nasep dan silsiemte ah bangchibang in i mu thei ei?
- 7). Mangpa Jesun anuazuite koi min a baptisma tangsah ding a sawl eile?
- 8). Trinity hina tuomtuomte hing genvawi?
- 9). Mi'n Trinity a theichet theilou jieh a, a buoi leh bang achi diei?

.....

BUNG – 8

MIHING MIZIE LEH HINATE BIBLE IN A GENTE

Thuchin ding:

“Khum in Mangpa Pasian in Leitang themkhat a la a, tuachi’n mihing a siem a, tuachieng in hintheina hu a nahkuo ah a hakhum a, tuchi in mipa in hinna ang neita h” (Gen. 2:7).

1). Thumapui:

Mihingte khu eima-le-eima, kittheichet ahasat mabang in, mihing khu bang ahiei? chi genchien hasatah ahi. Mihing hinna/hina khu pulam a langthei silte apat in, i enchien/tekah/’theichien theibep ua, tuate khu hinna nei, sie-le-pha thei, akhangzel, dihtatna neithe chite ahi uhi.

Tualeh, bang ding a Pasian in mihing a siem e? Bible a kilahdan in akipawlpì diing a, adei jieh ahi thu i mu uhi. Pasian in akipawlpì/lawm diing a dei khu ama mizie bang puo, ama toh kipawl utna nei ahidiing hi. Tuabanah, Pasian ging in a thu piehte sang diing in, ajieh pen mihing hing kisiemsan pen khu tami ahi chi i mu uhi (Thuhiltu 12:13).

2). Tu in mihing khu bang hi mawngmawng e? chi ngaidan tuomtuomte i gen diing uhi.

2.i). Suichien mite (Scientists) Ngaidan in:

Mihing khu gamsa bang a hing piengkhe leh kisiemkhe mai bangin a gen uhi. Tuaziehin, mumalna neilou leh a hinsung zong u’khu mitphietkal sung bangmai a tawm ahidan leh a dinmun siet dan lam agen uong uhi.

2.ii). Hinkhosuttute (Humanists) Ngaidan in:

Amaute khun mihing leh ahinate a ngaisang mama uhi. Mihing in pilna, silbawltheina anei a, ama kizilsiemna leh a silbawltheina in Leitung a thazaw thei hi a chi uhi.

2.iii). Communists Ngaidan in:

Mihing damsan leh umna zieh u'khu ki-uhna/solkal hoi-le-dettah umсах khu ahi achi uhi. Alawm a umkhawm theina kivaihawmna hoi-le-detdou siemna diing in mimal chinteng in mawpuohna anei uh a chi uhi.

2.iv). Evolutionists Ngaidan in:

Mihing khu ganhing apat a hing piengkhe ahi a chi uhi. Mihing khu mawltah a kipan a awlawl a hing hoi deudeu a, hing khanglien zing leh hing pilsemsem bang in a gen uhi.

2.v). Hindute Ngaidan in:

Hindu (Hinduism)-te ngaidan ahikia leuleu leh silbangkim khu pasien ahi-a, mihing zong pasien neu khat ahi achi uhi. Tualeh, a damsung ua silhoi bawlte u'khu ashinua chieng un ang pieng kia ua, adamlai ua mihoite khu mi hoi leh thupi tahin ang pieng kia ua, ahin a damlai ua mi hoiloute khu ang pienkia chiengun ui, aah leh ganhing ahisih leh mihing a, a pientah leh u'zong mi zawng leh gentheitah in ang pieng uh a chi uhi.

2.vi). Islam (Muslim)-te Ngaidan in:

Mihing khu Pasian (Allah)- siem ahijieh un, Pasian thuthu a ummai diing a, deitelna leh zaleenna zong pieh/nei lou ahi achi uhi. Tami ngaidan khu ei Khristiante ngaidan toh a kituoh sih uhi.

2.vii). Greekte Ngaidan in:

Mihing khu Pasian them (beh nengkhat) ahi a, tahsa lam ah muoltthei ahi a, Hagau lam ah Pasian bang ahi a chi uhi. Mihing tahsa khu hagau umna inn ahi a, tahsa ashi chieng in Hagau zong a zaleenta hi achi uhi.

Tambang in, Bible in mihing hina a gente leh tam atung a i gente uh akibang sih uhi. Tua zieh in Bible in mihing khu bang chibangin a gen ei chi i en kia diing uhi.

3). Thuhun Lui in mihing hina agen dan hi:

Mihing kisiemdan i Bible in mun ni (Gen. 1:1-2 - 2:4, leh 3:24)-ah agenlang chieng mama uhi. Mihingte khu Pasian bahpi a siem leh Pasian in ahu ahakhum jieh a hing piengkhe ahidan agen hi. Bangteng hilezong leh tam Bible bungte gel apat in mihing khu: - Pasian kibahpi a siem ahiban ah, silsiemzousie tung a thunei diing leh Pasian toh kipawlkhawm diing a siem ahi chi alang chieng hi.

Tualeh, mihing Pasian bahna khu ahileh silsiem dang zousie khu Pasian in “Hing umta hen” achi a hing um ahi ua, ahinlah mihing khu asiem in anakkuo ah ama hu ahakhum a, tuachi’n mihing khu ang hingta hi chi i mu uhi (Gen. 2:7). Tuabanah, Pasian in hinna hu ahalut khu i hagau u’khu ahi a, a shitheilou ahi. Tua hagau jieh in ngaituo theinate, sielehpha theina, deiteel theina leh adangdangte i neithe uhi.

4). Thuhun Lui leh Thuhun Tha in mihing hina a zilsah dan:

Thuhun Tha in Thuhun Lui sang in Pasian a ngaidan/koidan a loupizawh bang in mihing hina a ngaidan zong sangzaw in a thupi zaw hi. Thuhun Lui ah ahileh mihing khu ‘Pasian kibahpi a siem ahithu imu ua’ ahin, Thuhun Tha ah ahileh Jesu Khrist gingtate pen Pasian ‘Tapa/Tanute’ chi a hat ahitazaw uhi. Aziehpén, “Pasian tate hitheina thu a peta” hi (Johan. 1:12), a chi hi. Hinan leh zong ‘Ta’ hina tangsa a pieng vang i hisih uhi. Mihing khu Pasian mitmu in a manpha mama mai a, tuami khu Jesu hing pienna leh shina in alangsahta hi.

Tualeh, Thuhun Tha ah mihing khu chi thum in a gen hi. Tuatè khu - Hagau, lungsim leh tahsate ahi uhi (I Thes. 5:23). Tahsa thu ah ngaidan thum a um hi. Greek-ten zong tahsa khu hagau suongkul tanna ahisihleh suol/khelna khosahna mun bang in a gen uhi. I Mangpa in zong tahsa lim-le-mel ang puohjeh in khelna kingahna bulpi in a ngaisih a, ahivang in khelna lutna bulpi in a ngai hi. Paul in zong mihing khu khelna vanzah bang in a gen hi.

4.1). Mihing hina Sawltah Paul zilsahna ah tambang in i mu uhi.

4.1.i). Tahsa khu Pasian a ahi (I Kor. 3:16). 4.1.ii). Tahsa khu khelna kipatna bul bang in a ngaisih a, khelna vanzah in pang thei hi achi

hi (Rom. 8:12). 4.1.iii). Tahsa khu mihing chibah khat ahijieh in, Pasion in atanzouta hi (Rom 8:23). 4.1.iv). Lei tahsa a um bang in hagau tahsa zong a um hi. Muotthei a tu a um in muottheilou a kaithawkia ahidiing hi a chi hi. 4.1.v). Muotthei tahsa khu Jesu ziehin suhging a kaithaw ahidiing hi (Rom. 8:11), chite ahi uhi.

5). Mihing hina chi tuomtuomte leh manphatnate uh:

Mihingte khu ama tang a hing theilou, panpitu ngaizing ahi uhi. Pasion sang a midang gintatzawh khu shina ahi hi (Lengte 8:46; Late 51:3; Rom 3:23). Tualeh, mihing ama deitelna ngel toh Pasion dan abotsie a, khelna leh gitlouna ah akibuollutta hi. Khelna akipat hundam diing in Pasion in a tapa neisun ang peta hi. Ama jieh in mihingin hinna i nei theita uhi.

Tualeh, Pasion in Ama bang a angsiemte i hijieh un, Pasion masang ah mihingte i thupi/loupi mama uhi (Jona 4:11; Luk 15:7, 10; Mat. 6:26).

5.1). Tahsa leh Hagau thu:

Bible in ang hildan tangpi khu mihing chi in tahsa leh hagau ahuoptel hi. (Gen. 2:7, Num. 16:22; Luk 2:26). Greek leh Hindu khien khat in tahsa leh Hagau khu a gen tuom ua, a kidou sah uhi. Ahinlah, Bible in gendang tuom selou in pumkhat ahina a gen uong hi. Tahsa leh Hagau chi khun mihing pumpi ahuop a, hagau tellou in tahsa khu ashi ahi (Luk 2:26). Pasion in tahsa angaikhoh dan khu ama ngel khu tahsa nei in ang pieng a, damloute zong asudam a, gilkielte zong nehdiing ann apie a, tualeh mishite zong a kaithou hi.

Tahsa leh hagau khu khentuom thei ahisih a, tuajiehin, Pasion in mihingte khu a tahsa u'leh Hagau uh zong a tan in a hundam hi. Thawkia hun ah tam lei tahsa a beidiing a, Hagau tahsa in ang hengta diing hi (Phil. 3:21).

5.2). Siengthouna:

Sienthouna khu Pasion i bahna uh sil poimawtah khu ahi hi. Pasion toh i kijopna jieh ua i nei uh ahi a, tuajieh in suol/khelna a puona ziehin i mansuota uhi. Ahivangin, Pasion toh i kijop chieng un inei theikia uhi.

5.3). Ngaituona lungsim:

Tam ngaituotheina khu khelna/suolna a puona in asubeithei sih a, ahivang in, hoilou/dihlou lam ah apuimang zaw hi. I sie-le-pha theina khu zong a subuoizaw hi. Hagau nei a ngaituona lungsim nei zousie in sie-le-pha theina a neingal ua, tamkhu Pasian i bahna khat uh ahi. Tami jieh in, Pasian toh i kipawl thei un, i ut sih u'leh zong i kipawlpi utlou thei uhi. Ganhingte in vang Pasian a nai theisih ua zong agamlat theituom sih uhi. Tuabanah, ganhingte in hagau zong a nei sih uhi.

6). Thukhumsiin:

Mihing khu Pasian bang a siem ahijieh in, mihing ahina jieh pen khu Pasian thei leh ama nnasep zing diing a siemte ihi uhi. Hunchin teng a, Ama bie in Ama toh kipawlna hinkhuo nei zing diing a siemte zong ihi uhi.

Dohna

- 1). Mihing hinna a pulam a kilangthei khu bangte e?
- 2). Suichien mite leh Humanists-te in mihing hinna khu bang toh bang hi achi uoi?
- 3). Evolutionist-te'n mihing hing piendan bangchibang hi achi uoi?
- 4). Mihing hinna toh kisai in Greekte'n bang ngaidan anei uoi?
- 5). Bible ah mihing kisiemdan mun bangza ah muthei in a um ei?
- 6). Pasian bahna chinite bangte e?
- 7). Thuhun Tha in mihingte hina bang ch in a gen ei?
- 8). Thuhun Tha ah mihingte chi bang zat in akikhen ei?
- 9). Sawltah Paul in bang chi bang in tahsa azil sah ei le?
- 10). Pasian in mihing asiem jieh hing gen in?

.....

BUNG - 9

MIHINGTE KHELNA APUO THU

Thuchin ding:

“Ka pien a pat gilou kana hi tabou a, ka pienkhiet apat tawnkhiet ka nahi tabou hi” (Sam 51:5).

1). Thumapui:

Khelna thu khu sil gen chieng hamsa leh theihapi khat ahi. Ahin, khelna khu Leitung ah a um ngei ahi chi pen eima mimal hinkhuoa chiet leh i mit u’leh i bil un nichiin, hun chiin in i mu un i thei leng uhi. Ei Khristiante mai hilou in, sahkhuo dang beten zong khelna kipat a hutkhietna thu ahagen mama uhi. Khelna hei apat hing kipan e? abul hei lai e chi khu gendan tuomtuom a um a, tuate khu i sui diing uhi.

Tualeh, mipilten khelna thu a ngaidan anei uh khu chini apha hi. Leitung/khawlvvel khu khielna mun ahi. Tualeh, khelna khu eima ngei a ibawl uh ahi. Anina pen khu Bible zilsahna toh akinaizaw deu hi. Tualeh, i Bible un khelna thu ang zilsah dante i suiding uhi:

2). Thuhun Lui in khelna a zilsah dan:

2.1). Khelna khu dan bawsietna ahi:

I Johan 3:4 ah, khelna khu dan bawsietna ahi thu i mu uhi. Genesis bung thumna (3)-ah mihing masa pente (Adam& Evi)-te khu a khel thu uh i mu ua, tuakhu Pasian dan bawsietna masa pen ahi. Azieh ahileh, nehluo diing, sie-le-pha theina singga kichi a neh ua pat in mihing khu ama ut thu ngei in, Pasian dan khu a bawtseta chi thu i mu uhi. Tualeh, Pasian in Adam leh Eviten Eden huon apat a anawkhiehna apat in Pasian toh akizopna u’khu asieltah ziehin

Pasian lah ah khun mihingte khu tapa taimang bang ahita chi a ensah hi. Pasian dan siengthou khu mihing in azui ut sih a, abawtsie a, Pasian apat in ataimangta hi.

Thuhun Lui ah khun khelna chi'n puolam sil a kawh deu a, tuakhu vantang hindan leh sahkhuo lam hinding dan a, Pasian dan pieh zui lou leh bawlsietna ahi. Tualeh, Jawlneite leh mi khenkhatte ngaidan in Pasian puidan khu puolam sil mai hilou in, sunglam zong a khoi hi chi in agen uhi. Kithoina leh sillat maimai bou khu Pasian kipahna hinawnlou in, lungsimlam, thumanna leh lungsim kisiana khu aphut zaw hi. (Isai. 1:10-20).

2.2). Khelna khu Pasian kunga helna ahi:

Mihing khun Pasian toh kipawlina a dan thute zui a, Pasian gingta a hin sang in Pasian dan zuilou a, ama dei dan a hin a, Pasian bang a um atel zaw hi. Tamna Pasian kung a 'ahelnatah' khu mihingte khelna bul khu ahi.

2.3). Khelna khu Pasian ginlelna ahi:

Evi-in soltu (gul)-thu amanna jieh khu Pasian a ginlelna jieh ahi. Adam toh ahoina diing uh leh a zalenna diing ua Pasian guot-sah khu aginglel ua, soltu thu a mangta zaw uhi. Evi in Pasian aginlelna tah khu akhelna kipatna bul ahi.

3). Thuhun Tha zilsah dan:

Thuhun Tha in khelna a zilsah dan khu Pasian tung a khelna ahi a chi hi. (Luk 15:18) "Kisia un" (Mark 1:15). Mi hoilou hinan uh leh chin, natate uh silhoi piehdan thei uteh (Mat. 7:11). Khelna in lungsim leh tupna ah zung anei a, sil bawl ah kilangkhe leng hi (Mat. 5:27). Johan gel sung ah khelna khu suoh hina ahi (Johan. 8:34). Khelna lienpen khu, Pasian tapa Jesu gintat utlouna ahi thu i mu uhi (Johan 16:9). Laihah lam ah khun, Pasian hatna bang a chin zaw louna leh lungsietna neilouna khu khelna ahi (I Johan 3:1-6), a chi hi. Danbawsietna zong ahi (I Johan 3:4), khelna ahithu leh adangdang tamtah gen ding aum ding hi.

A tangpiin, Bible in khelna a zilsah tangpите igen nalai ding uhi. Khelna thu Bible bung khen khat a, agen dan i tahlang diing uhi. "Hinanlehzong michin in sil abawl khiel sieng ua" (Sam 14:3).

“Ka pien a pat gilou kana hi tabou a, ka pienkhiet apat tawnkhiel ka nahi tabou hi” (Sam 51:5). Tualeh, khelna khu Pasian tung a gamtat khelna ahithu tapa taimangpa hinkhuo ah imu uhi. “Pa aw, Pasian leh nangma mitmu in ka natawnkhielta hi (Luk. 15:18). Tualeh, khelna khu eima-le-eima Pasian mai a khiel a kitheina ahi a, “Pasian aw, mikhiel ka hi ei khotuo in”. (Luk. 18:13). Tuabanah, “Khelna khu dan bawlsietna ahi” (I Johan 3:4). Tam Bible tangte a kipatin khelna umzie khu bangtan ahiei ithei thei uhi. .

4). Mangpa Jesun khelna thu a zilsah dan:

Mangpa Jesu’n khel thu khu Thuhun Lui zilsahdan khu a pawm a, khelna hing kipatna bulpi khu mihingte lungsim sung ahi thu a uong gen mama hi. Khelna khu abawl a bawl mai ban ah lungsim a kipan ahidante azilsah a, Pasian gam deidan kaltu zousie khu khelna ahi achi hi. Tualeh, mizousie khelna nei ahi thu gen lang in, mizousie kisia diing in ahan hi. Mikhielte khu lawm in a kineipina a, a khelna uh vang a ngainep maimai sih hi. Khelna khu mihing zouise hinna susietu ahi achi hi. Mi hoi pen zong khu michinglou ahi a chi hi (Luk. 17:10). Khiel kisiata bou in Pasian itna atang diing uh achi hi (Luk.18:13). Khelna khohdan a zilsahna ah khun mihing tung a bawl dihlou khu Pasian tung a khelna ahi chi in a zilsah hi.

Tualeh, thuohna leh vangsietna zousie khu khelna jieh ahikim sih chi in agen hi (Luk. 13:1-5). Tuabanah a thu ngaikhetute khu a kisia sih u’leh mangthai sieng diing uh chi in zong agen hi.

5). Sawltah Paul zilsah dan:

Greek ham a khelna chi umzie khu “tupkhelna” china ahi. Pasal muichiemte’n achiemna uh a khahlouna uh bang deu in agen hi. Paul in khelna hing kipatna khu Adam apat ahi a, amaah khun mizousie pumkhat ahi uhi. Tuajieh in, Adam khelna khu a kitanpi ua, akiluo sawn uh a chi hi. Rome bung 1&2 ah, Paul in, khelna in mizousie azelsuoh thu agen hi. Khelna in, Pasian leh mihingte kizopna asusie a, mihing-le-mihingte, kizopna zong khu asusie hi achi hi. Tuachi’n, mizousie khu Pasian lungthahna nuoi ah a umta uh zong a chi hi.

Paul in khelna thu a zilsahna tangpi i et chieng un khelna sang in Pasian itna/lungsietna khu athupi/loupi zaw in zong a

sangzaw chiin a zilsah hi. Tualeh, Pasian tapa khu mikhielte a diing in, Leitung ah a hing pei a, mi khiel hi a kithei a, a kung hing zuonte khu hundamna a pediing hi. I damsung un gingtu hizing kawm in khelna bawl in i um zing lou ding uh ahi.

6.). Khelna in mihingte suhsiet dan:

6.1). Mihing khu siemlou tang ahita hi.

Khelna leh siemlouna khu akijop ahi. Siemloutang chi umzie khu, khelna bawltu gawt diing china ahi a, a khelman u'khu a mu diing hi. Khelman khu shina ahi chi in Bible in a gen hi. Ajieh pen Pasian dan siengthou khu min abawsiettah jieh in siemlou tang ahita uhi.

6.2). Khelman khu shina ahiziehin mizousie azelsuoh hi:

Mikhat jieh in Leitung ah khelna ang umta a, tua khelna khu shina ahing hita hi. Mizousie khelna nei ahitah jieh un shina in michitung ah vai ahawmta hi (Rom 5:12). “Khelman khu shina ahi” (Rom 6:23). Michin atawnkhiel siengta ua Pasian hutdamna huong khu agamlatta uhi (Rom 3:23). Khelna jieh a mizousie tandiing khu tahsa-le-hagau shina ahi. Khelna in mizousie zelsuoh sieng chi khu Khristiante zilsahdan ahi. Khelna lah apuo tah jieh in ama-le-ama in sil-hoi abawl theitasih hi.

Dohna

- 1). Mipiltin khelna a ngaidan uh chi nite gen in?
- 2). Hattuum masate'n khelna a ngaidan uh hing gen in?
- 3). Bible in khelna thu agendante hing gen in?
- 4). Khelna khu danbawsietna chi umzie hing gen in?
- 5). Khelna in mihingte asuhsietdan hing gen in?
- 6). Thuhun Lui in khelna khu bangchibang in a zilsah ei?
- 7). Khantanhohi Johan in Khelna lien pen a chi khu bang e?
- 8). Mangpa Jesu'n khelna a zilsahdan hing gen in?
- 9). Sawltah Paul in khelna khu bangchibang in a zilsah ei?
- 10). Khelna in mihingte tung a a nnasepdante bangbange e?

.....

BUNG –10

JESU KHRIST MIN UMZIE LEH HINATE

Thuchin ding:

“Amin Jesu na phuoh ding hi. Aman a mite a khelna ua kipat a hundam ding ziehin” achi hi (Mathiu 1:21).

1). Thumapui

I Mangpa Jesu khu Pasion Tapa ahiziehin, leitung kisiem masangte, a kisiem laite in zong ana um khinta hi. Aman, Abraham um masangin zong ka umzouta a chi hi. Bethlehem a mihing bang a ahingpien masang peh in, aum khit thu a gen a, zong adih hi. Tuaziehin, Jesu khu Pasion mihingte kung a, ahing kipuonna leh kilahna pen ei Khristianten i ginglel sih ua, tuanah sangin, i thugin uh kingahna khat zong ahi. Tualeh, i Mangpa Jesu Khrist hing kipuonna a kipatin Pasion theina dihtah, Pasion toh zong kizopna zong i hingneithe i ban uah hundamna zong i tangthei uhi.

Khantanhoi gieltu Johan in, “A tung in Thu a um a, Thu khu Pasion kung ah a um a, Thu khu Pasion ahi...tuakhu tahsa hing suoh in, i lah uah a teng ta.... ” (Johan 1:1-14), a chi hi. Johan, in Pasion khu a Pasianna beituannou in mihing hing suoh ahi achi hi. A umdan tah khu Siemtu Pasion khu a silsiemte lah a khat hing suoh hi. Tualeh, Jesu khu leitung a, ang pienlaiin, za-a-za (100%)- Pasion ahibanah za-a-za ma (100%)-mihing hinna anei hi.

2). Jesu Khrist min umzie leh hinate.

Mangpa Jesu min leh ahinate khu gen seng ding ahisih a, a kul-le-pويمaw deute i gen ding uhi.

2.i). Jesu:

Tami khu Jesu min hina/thei dan langsal pen leh kizang tam pen ahi. Tami khu Habrai ham a, ‘Joshua’ chi a kipat a Grik min ‘Iesous’ chi ahi (Joshua 1:1; Zak. 3:1, Ezra 2:2). Tami umzie ahileh, ‘hundamtu’ china amaw ‘Pasian khu hundamtu’ chinate a hi. Vansawltah in Jesu pien ding thu ngahnu Mary a hillaiin, “Amin Jesu na phuoh ding hi. Aman a mite a khelna ua kipat a hundam ding ziehin” achi hi (Mathiu 1:21). Tami min khu Thuhun Tha ah 905-vei a kizang/kimu hi. Judate lah ah zong tami min puo zong bangzat e khat a um uhi. Nasepte 13:6-ah, Bar Jesu kichi khat i mu uhi. Tualeh, Kol. 4:11-ah, Jesu, Justa kichi min khat zong i mu uhi.

2.ii). Khrist/Messia:

Thuhun Tha a Khrist chi leh Thuhun Lui a Messia chite khu Jesu min ding in a kizang uhi. Tualeh, Khrist khu Grik ham ahi a, Messia ahileh Hebrai ham ahi. Ahin, anigel in aumzie a kibang ua, ‘sathaunu’ amaw ‘sathaununa’ chinate ahi. Thuhun Lui ah lengte, siempute khu sathau ana kinu leng uhi (Exo.29:7; Lev. 4:3; I Samuel 9:16;10:1; II Samuel 19:10). Tualeh, sathaunu khu Pasian Hagau thawpna etsahna bang in zong angai uhi. Khrist/Messia khu leitung hundam ding a, Pasian sathaunu leh hundamna nnasem ding a mawpuohna pieh a um ahina genna zong ahi. Mangpa Jesu hinkhuo ah Hagau Siengthouin a gaisah ahina leh baptisma atanlai a hingtung ahi.

2.iii). Pasian Tapa:

Tami min zong Mangpa Jesu minte lah a langsal pawl ahi. Jesu hunlaiin, ‘Pasian Tapa’ chi khu midang min ding in zong a kizang tam hi. Jesu Pasian Tapa kichina zieh ahileh, Aman Pasian khu ‘Ka Pa’ a chizieh leh Pasian Tapa ahidan a suhlat zing jiehin ahi (Mak. 12:16; 14:62). Jesu khu Pasian Tapa ahidan anuazuite mai hilouin, gam vaihawmte leh Rome galkapte zong a gen leng uhi.

2.iv). Mihing Tapa:

Mihing Tapa chi min khu ‘Pasian Tapa’ chi toh zong a kibang hi. Tami min khu Khrist min ding a kizahna masa pen khu Daniel 7:13- a kipan ahi. Nidanglai a Bible gam mite khun mi silbawltheite, van lam toh zong kijopna nei a, a theite uh min ding in anamang leng uhi. Thuhun Lui ah Mihing Tapa chi min khu Ezekiel bute, Daniel

bute, Late (Sam)-bute leh Nambat bute ah zong i mu uhi. Ezekiel bu ah ama kigenna in amang a (Eze. 2:1), Daniel bu ah leitung huntawp a Pasion gam tungding ding min a zong zah ahi (Daniel 7:13-14).

Tualeh, Mihing Tapa chi khu Thuhun Tha ah sawmgiet (80)-vei a kjang in a kimu hi. Mangpa Jesun zong tami min khu Ama kigenna in zong a jang mun mama hi. Amakhu mihing bukim ahina suhlatna a kizang ahi.

2.v). Mangpa:

Mangpa chi hamkam khu Thuhun Tha bu Grik ham a kigiel ah khun ‘Kurious’ chi ahi. Tami khu Hebrai a Pasion min ‘YHWH’ chi a zong kibang a zah ahi. Aumzie dihtah ahileh Pasion hatna min in a kizang tangpi pen hi. Tualeh, Mangpa chi khu zatatna kam teng ahideu a, “Pu or Sir” china ahiban ah, neitu leh thuneitu hina in zong a kijang hi. Tualeh, tami min khu Jesu a ginna uh puonkhiehnte, Pasion a hundampa uh ahina pawmna kam malte in zong anamang leng uhi.

3). Ama khu khelna neilou mi bukim ahi.

Jesu’n khelna/gitlouna gui Adam apan a hing kipan pen a nei kha sih hi. Azieh pen, Hagau Siengthou apiensah ahizieh/man in (Luk 1:35). A galte/melmate nangawnin zong akhelna ding amuzou sih uhi (Johan 8:46). A Pa thupiehte a zui/kepbit gige ziehin (Johan 15:10), Setan in Ama tung ah thuneina a nei sih hi (Johan 14:30). Aman “Kei leh ka Pa khat ka hi uh” achi hi (Johan 10:30). Belam nou dembei bang in, Khrist khu eite khelna tatna kithoina hiding in, khelna neilou ahi a kul hi (1 Peter 1:19). Paul gen bang in: “Ama ah Pasion dihtatna i hing hitheina dingin, khelna mawngmawng theilou Amakhu Pasionin eite ziehin mikhel in a bawlta hi.” (2 Korinth 5:21), a chi hi.

4). Khrist mihina/nungchangte:

Mangpa Jesu mihinate (nungchang)-te khu eita a ding a zilding a kul-le-poimawte igen ding uhi. Tuate:

4.i). Mangpa Jesu khu a siengthou ahi.

Tami thupi khu Jesun khelna leh gitlouna aneisihi ichi un a huop sieng thei hi. I gensa bangin ang pien in zong ngahnu siengthou (Mary)- tungtawn in ang pieng a, ei mihingte khelna gui a pieng

ihl uh toh a kibang sih hi. Leitung a alensungin zong khelna kichi mawngmawng a bawlkha sih a, zong a theikha sih hi. Nasepte 3:14-ah, Peter in Jesu khu mi siengthou leh dihtah chiin a gen a, a gen dih hi.

4.ii). Jesu Khrist khu ittu/lungsiettu ahi.

Mangpa Jesu leh Pasian khenthei ahisih uhi. Pasian in mihingte a itna khu Johan 3:16-ah i mu uhi. Tualeh, Jesu zong “Min a lawm a ding a, ahinna a piehval a itna a um sih zong a chi hi. Mangpa Jesu hing itna khu eite tan ding a, Bethlehem bawngbuh a ang piennate, genthei tah Khross a ashinate ah ang kilangsah hi.

4.iii). Mangpa Jesu khu mi lainatna nei ahi.

Atung a i gen bang deuin, Mangpa Jesu khu lainatna nei mi ahi. I Bible sung pumpi ua tangtawm pen, “Jesu a kapta” (Johan 11:35), chi zong Mangpa Jesu lainatna leh itna nei mi ahina suhlatna ahi. Ama Leitung a, a lenlain, mite hagau maimai ngaina leh buoipi louin a tahsa tungua, natnate, nelou leh dawnlou a umte zong a lainat in damloute sudam in, gilkielte nehding annte a pie a, phahte damsahin tahsa-le-hagau ua a khantouna ding un sil tamtah a bawlpieh hi.

4.iv). Jesu khu thum mi ahi.

Khantanhoi buli (4)-te ah khun hundampa thum mi ahidan leh a thumdante i muthei uhi. Ama zankhawvahn zong a Pa kung a a thumthute zong i mu uhi (Mak.1:35). Jesun, silthupitahtahte a bawl masangin thumnate a neimasa leng hi (Luk. 3:21; Joh. 6:15). Pasian Tapa bawn tambang a, a thum leh ei anua zuiten bangzata a, i thum ding uh atai le chi ang ngaituo sah hi.

4.v). Mangpa Jesu khu kingai ngiem leh thunuoiluttah ahi.

Mangpa Jesu khu thunuoilut mi ahidan Matt.11:24-ah, i mu uhi. A kingaingingiemna zieh khu Ama ding hilouin Pa loupina dingin ahizaw hi (Johan 8:50). Mangpa Jesu kingai ngiem dan khu Phillippi 2:5-7, ah chientahin i mu uhi. Amakhu Pasian toh dinmun kibang a um, a sun azan a Vansawltah/Angelten siengthou siengthou chi a, a patoi chimtheiloupa u’khu, suohbangin ang pieng/um a, Khross ah shina ahingthuoh hi. Tamte a kipatin Mangpa Jesu kingai ngiem dan leh thunuoilut dante i muthei uhi. Tamte khu ei a nuazuitten zong i ettawn un zong i zui ding uhi.

Dohnate:

- 1). Mangpa Jesu khu bang chilai a na um khin e?
- 2). Jesu chi hing kipatna hamteng khu bang e? Bang china e?
- 3). Khrist leh Messia bang china e?
- 4). Jesu khu pienpi khelna neilou ahidan gen in?
- 5). Mangpa Jesu mihinna (nungchang)-te bangbangte e?

.....

BUNG- 11

TATNA KAMMAL UMZIE LEH SISAN TUNGTAWN A TATNA THU

Thuchin ding:

“Hinna nei jousie hinna khu sisan ah aum hi. Tuaziehin, sisan zousie khu mipite tawnkhelna lah mangna ding in maitam tung a buoh ahiding hi” (Levitikas 17:11).

1). Thupatna.

Tatna (Atonement) chi umzie khu ‘katvei sep zou sieng china’ ahi. Mini kilemlou kilemsah ding leh pumkhat a siem china ahi. Tuaban ah Tatkhiehna i chi chiengun silthum a um a: i). Vatad khiehpen, ii). Atankhie pa leh iii) A tatkhiehna pa chite ahi uhi. Tuachin, a saltanna a kipat in a suotatat theina ding in, a tankhiepa in aman pie in, atatpa/nu khu ang suota’in asuoh hina kipat in ang zalenta hi. Thamlouin, tuazou chiengin aneitu zong ang kikkehta a, mi tha in ang neita hi.

2). Greek ham ah tatkhiehna chi kammal chithum in akigen hi:

2.i). EXAGORAZO: Tam pen bazaar a sum metbawlina ding a zuoh son ding a lei a man pieh china ahi **2.ii). AGORAZO:** Tampen, bazaar pan a van lei bang a lei; akilei zou chieng a aleipa sila/suoh a annasem china dan ahi. **2.iii). LUTROO:** Tampen ahikia leh phelkhia, suohtasah china ahi. Atankhiepa in sum apieh jieha hing suohta ahita hi. Ahin, atankhiepa in namphu (force)- a nna sepsah somlouin, atakhieh mipa/minu pen in asepnop leh sepnop lou ama sie-le-pha theina ah akinga china hi. Tuaban ah Greekten zong suoh khu ama-le-ama kitankhiethi bang in agen uhi. Suohin sum akhawl

a, tuachin Temple ah Siempu in apu kung ah asumte apie a, tuachin suoh khu ang suohtata hi.

3). Tatna' umdan adiehin Hebraite zahdan i suiding uhi :

A tung a i gensa bang un a chien semna ding i genbe nalai ding uhi. 3.i) Hebraiten ata uh pieng masa penpente uh Pasian a angai jieh un a pekhie uhi. Tualeh adei uh leh sum bangza ahiai khat toh anua lei kia jeljel uhi. 3.ii) Tualeh mi a genthei jieh a mi suoh-le-sal a um khu a innkuonpiten/ akinaipiten avatat dohna thei uhi. 3.iii). Tualeh Hebraite ading in Aigupta leh Babylon apat ua a suotatna uh khu 'TATNA LAHLAH a THUPIPENTE' ahi uhi. . Tamte thei kom in hundamna khu "Tatna" chiin jong akigen hi.

4). Thuhun Lui a sisan toh tatna thu:

Tualeh, Thuhun Lui a tatna vanzah khu belamnou, kel, leh bongte ahitangpi uhi. Adam leh Eviten khelna/suolna ang bawl chieng un sielehpha hingthei un guohtang ahilam uh ang kitheita ua, a zumhuainate uh khuna/tuomna ding in theipite akhui uhi. Ahin, tamten atuom theisih ua zong Pasian in zong apomsah sih hi. Tuachin, Pasian in belamnou ni athat a, avunte uh toh atuomta hi. Amauhte suolna jiehin suolna neilou belum ni in ashilawta hi.

Thamlouin, Thuhun Lui a silpieh pemasapente tung ah zong akilang chieng mama hi. Kaina in a lou a haichi piengte Pasian apie a, ahin Pasian in apomsah sih hi. A jieh ahileh sisan apanlou jieh ahi akichi hi. Tualeh, Abelin aganta thau leh hoi penpente apieh a kithoi ziehin pomsah in aum hi. Bible in, "Hinna nei jousie hinna khu sisan ah aum hi. Tuaziehin, sisan zousie khu mipite tawnkhelna lah mangna ding in maitam tung a buoh ahiding hi" chi'n Mangpan thu apie hi" (Levitikas 17:11). Tuakhu belamnou Jesu etsahna ahiban ah sisan atel jieh ahi. Ginna in Abel in Pasian tapa hing peiding lim-le-mel ana ching masa chi jong imui uhi.

Tuaban ah, Isralete Aigupta Pharo nuai a kum 400-val vingveng suoh a umlai un, suohtatna ding in belum sisan jieh ahikia hi. Tuachin, Pharo in Israelte apotsah utlou jieh in Pasian in Gotna chi (10)-atungsah hi. Atopna khu tapa upapen leh ganta upapen shina tungton in agot hi. Tuanah, suohtatna ding in Pasian in lampi

khat abawlsah a, tuakhu Innkuon chinten belamnou ahoibukim, dembei, mel hemlou, leh ateh jong ahilou ding ahi. Tuachin, nili akoi ding ua, tua jou chieng in athatpan ding uhi. Tucahin, belum sisan khu akotkhah mai/bieng uah atat dingua, tuachin sisan kitatna inn zousiete khu Angel in apeikan jeljel ding hi. Tuachin, tam belamnou sisan in shina apatin a ‘HUNDAM’ ta uh hi. “Sisan ka mu chiengin kang peikan ding hi” achi hi. (Exodus 12:13). Tualeh, sisan kitatlouna inn sung jousie atapa upapen in shina atuhta uhi. Ahin belamnou sian kitatna inn zousieten suohtatna atang uhi. Tammi thuin eiten Khross a Jesu sisan tungton a hundamna i tanding dan uh ana ensah/ hi.

5). Tatna letdan leh huopzou dan:

Roman Catholics, Lutheran leh Arminiante hilchetdan in, Khrist tatna in Leitung pumpi a huopsah uhi. Ahinlah, tami in mizousie hundam ahidiing uh china hilou in, koima khien tuom-paituom neilou in a huopsah sieng uhi. Mizousie, hundamna diing in Khrist in a thuoh a, zong ang shi hi chi bou agen ut ahi. Mimal chin tung a tam tatna a bukim theina diing in, mimal chin in ei a ding a kipom a kisan a pawl maw hi. A tatna bukimna khu mimal deitelna ah a kinga hi. Khrist in Amau adia hundamna asiemsah mai hilou in, Ama uh diing in a tawptanin a kipumpiehta hi (Luk. 15:10; Rom 5:10; II Kor. 5:21; Gal. 1:4; Ephe. 1:7). Khrist in mihingte adi a, a hinna apie hi chi Bible in agen hi (Mat.1:21), a belamte a diing in (JoUnau han. 10:11, 15),

Hattuomte a diing in (Nasepte 20:28, Eph. 5:25,27)-teelte a diing in (Johan. 1:29; I Johan 2:2),-mizousie a diing in (I Tim. 2:6; Tita 2:11; Heb. 2:9)-a shi hi. Tami in Leitung a nam chinteng lah a mi chinteng, pawlchinteng a diing in ashi ahi chi agen chieng mama hi. Ahin, i thei ding ua poimaw ahileh Jesu khun letung a mihingte a dingin tatna nna sem zou nan leh zong a gingtate a ding in hundamna ahigiep ding hi. Azieh ahileh, Amakhu mizousie hundampa ahi a, ahin a gingtate hundampa ahi sese hi.

Dohnate

- 1). Tatkhiehna i chi chiengun silthum a um a tuate bangte ahi uoi?
- 2). Greek ham a tatkhiehna chi kammal thumte gen in?
- 3). ‘Tatna’ umdan adiehin Hebraite zahdanchi thumte gen in?
- 4). Thuhun Lui ah tatna van zahin bang a kizang ei?
- 5). Bang ding a Pasion in Abel kithoina a pawm a, Kaina a apawmlou se e?
- 6). Roman Catholic leh Lutheran in tatna bangtan a huopsah uoi?

.....

BUNG-12

JESUN MIHINA, TATNA NNA ASEPNA, A SHINA LEH A THAWKIANA THU

Thuchin ding:

“I khelnate un eileh Pasian ang kikhensah hi” (Isai 59:2).

1). Thumapui:

Tatna thu khu hundamna thugin a diing a sil poimaw tah ahi. Bible in tatna umsшту khu Pasian ahiban ah, Ama lunglam ahi thu zong ang hil hi (Isai 53:10; Luk 2:14; Eph. 1:6-9; Kol. 1:19-20). Tuaguoh hilou in, Pasian midih in mikhiel leh giloute tung ah tangtawn shina leh gawtna a tun diing khu a na puong kheta hi (Gen. 3:3; Rom. 6:23).

Tualeh, tatna in atup pen khu mikhielte Pasian lam a hip a, a lungsim uh kisia diing a suhal a, tuazou chieng a Pasian kunglam a puihuoi ahi. Mi khat in midang khat tung ah sil bawlkhiel khataleh kilepna siem akiphamaw hi.

2). Ei mihingte tat i kulna jiehte uh:

5.i). Suol/khelna in khawvel pumpi asuhsiet jiehte in. I Lengte 8:4-6-ah, ‘Koima silbawl khiellou a um sih uhi. 5.ii). Sam 14:3 ‘Koima silhoi bawl himhim a um sih’ hi. 5.iii). Khena/suol in Pasian toh ang kikhensahta jiehte in, Pasianin khelna/suol ahua a, amunuom sih hi (Hebrute 1:13). Tueleh, khelna/suol khun Pasian toh ang khenta hi. Isai 59:2 “I khelnate un eileh Pasian ang kikhensah hi” (Mak 3:39; Ephesa 2:1-4; Sam 58:3).3.3). Tuabanah, ei mihingte eima-le-eima i kitan/i kihundamthei sih uhi.

3). Mangpa Jesu mihinate i en ding uhi.

3.1). Amakhu khelna/suolna neilou ahi. Pasian toh kibang aum ahi a, nang-le-kei khelna tang a shi a hi. Mipil khat in khovel a mithupi 10-te tanchin agel a, Jesu khatna in apangsah hi. Tuajiehin, Jesu khu mithupi ahi.

3.2). Sila bangin ang um hi. A pien in zong bonginn/gan inn ah ang pieng a, shina tan ang thuoh hi. Khelman shina khu aman anapieh jieh in eite suhdam in ium uhi. Laigeltu khatin, Jesu tanchin tambangin agen hi. “Jesun, piengsuolte, mitawte, kengbaite leh mishite nasan akaithou hi. Aman laibu khat jong a gel sih a, ahin tangthu khu gam teng ah gel in aum hi. Tuaban ah, ni chinin anuajui ding mi akibe jungjung hi. A khelna/suolna akimu sih a, ahin mi khielte/suolte lawmpa jong ang hita hi” a chi a, adih mama hi.

4). KHRIST JIEH A TATNA/ A SHINA

4.1). Khrist shina:

Khrist shina i gen chieng un a tahsa shina khu i lungsim un i ngaituolou theisih uhi. Jesu khu a silbawl khel jieh a shi ahi sih a, eite tanding a hing pei ahibangin, vaihawmna in dihlou tah a siemmaw a tansah jieh ua shi ahizaw hi. Amakhu, Jawlnei Isai 53:12-in, a gen bang in “Migilou leh dan bawtsetu bang a ngaw ahizaw” hi. Tualeh, Romte dan in singlamte (Khross) a kilbet a shite khu migilou tawpkhawhte shina ahi. Jesu khu eite a diing in hamsietin a um a, i khelnate uh Khross ah a pawta hi (Gal. 3:13). Tambang a ashina khu tomkimin, genta lei tatna nna a sepna ahi.

Awle, a tung a i gen bang un ashina khu ahuaisie mama hi. Mawneilou hinan leh mi khielte/suolte bang in ashita hi. I thuoh tang in nasa tahin athuoh a, Pa aw ahitheh leh tamnou toh hing kipelsah in chin athum hi. A zieh ahileh, adon ding nou ah khun khawvel pumpi khelna sisan a um a, Jesun adon siengta hi. Thamlouin, eite khelna jiehin Rome solkar court mai ah ading a, tuachin vuoh-le-satte, chilphit in aum hi. Ama kisasna sie lingnei ngakuai bang a ahien, asat zou chieng un a kai ua atel, avoute a kai khie nalai uhi.

Tuaban ah, linglu khu aphan ua, alu akhetlutna ding in phohbul in akhenlut uhi. Achilte uh phitin chiemmuina in anei ua, akivuoh huon ua, enghouin anuisat ua, tamte nang-le-kei jieh ahi. Atahsa akeng apat alutan mongmong damna himhim aneisih ahi.

Stemunin “Jesu tahsa tulai bang a lim a lah a etthei ding hileh etngam ding ahisih ding a, hingdia kilomlou kei kahintheina ding in, shidia kilomlou Jesu ang shita hi” achi hi. Tuaziehin, unau i Mangpa sisan khu a thawn a lungsahlou ding in Pasion kung ah kipie khia vaui.

4.2). Migiloute sih-le-tang a tatna ahi:

Pasion in mikhielte tatna diing in khelna neilou misiengthou kul-le-phamaw a sa hi. Ahivangin, khum bang dinmun a ding thei diing mihing koima a um sih hi. Migilou dinmun a ding diing in Pasion in a Tapa tangkhat neisun hing pekheta hi. Tuachi in, Khrist khu migiloute sih-le-tang in hing kipie in, i khelna zousie uh a puo a, dan in a phut zousie a zou bukim a, tuachi’n, mihingte diing in tatna nna asemzouta hi. Pasion midih leh lungsietna neipa in mihingte a diing in, tatna Ama Tapa in ang siem a, ang kilempita hi. Tualeh, Thuhun Lui kithoinate khun Khrist tatna nnasep a ensah hi (Luk. 1:4; 4:20,31,35; 5:10,16; 6: 17:11). I khelnate u’khu Khrist tung ah ngah ahi thu zong ang hil hi (Isaia 53:6). Tualeh, i khelnate a puo a (Johan. 1:28; Heb. 9:28), tuachin, migiloute diing in a hinna apie hi (Mak. 10:45, Gal. 1:4; I Peter 3:18).

4.3). Khiei kithoina diing in a shi hi:

Khrist khu migiloute’n (Rome galkap)-ten apongtha uh himawh lou hi. Pilat in ‘agitlouna mawngmawng ka mu sih hi’ a chipa khu Khrist ahi. Ahivang in, mihingte khelna jieh in ashi hi (Rom 4:24). A sisan manphatah zong khel ngaidamna diing in a luong hi (Mat. 26:28). Khrist ah khun gitlouna leh hoilouna malmal a um sih hi. Israelte’n, kithoina anei chieng un belam tal, kel tal achidam, melsietna bei leh pienphate a zang vateh bangun, Khrist zong khu tahsa hagau a demna diing mawngmawng um sih hi (Luk. 1:10; I Sam. 7:9). I Mangpa Jesu zong tam bang a bukim khu mikhielte a diing in Singlamte (Khross)-ah, ang shita hi. Migiloute jieh in gawtna leh shina a tuoh law hi. Tam khu, itna/lungsietna jieh a nnasep ahizaw hi. Amakhu, i khelnate uh thoina diing in singlamte ah ang kipumpieh in ang shita hi.

Khrist khu bangteng huom in hing kipe nanlezong eite’n i pomlou ua i gintat utsih u’leh a shina leh ang tatna khu amawhna asuoh diing hi. Tuajieh in, i mawpuohna uh khu ama napom a, a lungsietna silpieh khu ginna toh i san diing uh ahi. Tualeh, ang

kipiehna khu eima hinna ah umzie leh ga asuo thei giep diing hi (Johan. 1:12; Eph. 2:8).

5).Khrist tatkhiehna in tamte lah akipat in zong ang hundam hi.

7.i) Dan hamsie lah akipat in (Galatia 3:13). 7.ii) Dan viahomna nuoi apat in (Rom 6:14; Galatia 4:5). 7.iii). Suol silbawltheina leh akipat in (Tita 2:14 leh Romte 6:4). 7.iv).Setan silbawltheina lah akipat in (I Kor. 2:14). 7.v). Khrist in amite khu amanpie in (asisan)-in ang tat khie hi. (I Kor. 6:20).

6). Khrist kivuina:

Khrist shina khu a thuohna nukhia pen bang in a lang hi. Singlamte tung ah “Zaw ahita” chi in a kikou hi. Jesu hansung a aum khu ama suhmuolphouna khat ahi a, tuami zieh in eite a diing in hankhuh zauhuoina khu ang lamangsakta hi.

7). Mishi khuo ah Khrist avahaw/pei hi.

Jesu nuazuite thugin ah “Mishi khuo ah a vapei a” chi khu hilchetndan chi tuomtuom a hilchet in a um hi. Roman Catholic-tein, ‘Jesu Khrist khu Thuhun Lui a shisa misiengthoute kikhumkhawmna ah vahaw diing in a va pei hi’ a chi uhi. Lutherante gindan in ‘Shina leh thawkiana kikal a mishite khuo ah thuhil diing leh zawna thuneina puongzah diing a vapei ahi’ a chikia leuleu hi. Mishikhuo ah vapei chi in a genlah ut pen ahileh:- Getsemani huon leh Khross ah Jesu Khrist in gawtmun natna a thuoh hi. Shina leh suhmuolphouna tawpkhoh a thuoh hi (Late 16:8-10; Ephe. 4:9)-chite ahi hi.

8. Khrist thoukiana:

Khristian sahkhuo khu sahkhuo dangte sang a atungnun zawhna khu amukhetu Jesu Khrist shina a kipat a, athawkiana leh van a, a katouna zieh khu ahi hi. Leitung a sahkhuo na phutkhietute Khrist Jesu chilou tunitan in koima shina akipat thoukia chi um khanailou hi. Khrist in shina khu a thawkiana toh anuoisie/zouta hi. Jesu Khrist thawkiana lamdanna tungtuong ahileh tahsa-le- hagau toh a thoukia hi (I Kor. 15:44-45). Tuajiehin, mishite thawkiana makaitu zong ahi (Kol. 1:18; Kihilna 1:5).

9). Khrist thawkiana toh kisai silpoimaw thumte:

6.i). Khrist in dan in aphut zousie a suibukimta chi Pasian in apuonna ahi (Phil. 2:9). 6.ii). Siemtansahna, pienthana leh gingtute thawkiana ahi (Rom. 6:4-9; I Kor. 6:14; 15:20-22). 6.iii). Eite siemtanna,

pienthana leh thawkiana makaitu leh umsahtu ahi (1. Tom. 4:25; Eph. 1:20).

10). Khrist Van ah katou:

Khrist Van ah, a katouna khu thawkiana subukimtu ahi. Tuakhu, Khrist khu Siempi Mangpen hina toh Pasian kung, mun siengthou pen ah a lut hi (Rom 8:34; Heb. 4:14; 6:20; 9:24). Ei a diing a munsiem diing in a vapei a (Johan. 14:1-3), Ama toh kibang in Van ah eite ang koita hi. Van a Khrist katouna in eite'n zong Van ah Ama kung ah mun tang diing ihidan uh a ensah hi.

11). Khrist Pasian zietlam ah:

Khrist khu Van a katou in, Pasian zietlam ah tousah ahita hi (Eph. 1:20; Heb. 10:12; I Pet. 3:22). Pasian zietlam chi umzie ahileh silbawltheina leh loupina a ensah hi. Pasian zietlam a toukhawm in a hattuumte vai a hawmsah a, a kembit a, Leitung a awpkhum a, mihingte a diing in a thumsah zing hi.

12). Khrist hing peikia diing:

Khrist khu mihing leh mishite vaihawmsah diing in a hing peikia diing hi. Amakhu, muthei tahsa ngei in ahing peikia diing hi (Nasepte 1:11; Kihil. 1:7). Vaihawm diing in ang peikia diing hi (Johan. 5:22,27; Nasepte. 10:42; Rom.2:16; IIKor. 5:10; II Tim.4:1). Hinanlezong, Ama hing peikia hun diing koiman a theisih hi. Leitung vaihawmsah diing leh a mite hundam bukimsah diing a hing pei diing ahi.

Dohna:

- 1). Tatna in a tup khu bang e?
- 2). Ei mihingte tat i kulna jiehte uh gen in?
- 3). Mangpa Jesu mihinate gen in?
- 4). Jesu khu mgiloute sih-le-tang a tatna a siem dan gen in?
- 5). Khrist tatkhiehna in bangte lah akipat in ang hundam ei?
- 6). Jesu migiloute sih-le-tang a kipiehden hing gen in?
- 7). Jesu hansung a, a umna in bang a ensah ei?
- 8). 'Mishi khuo ah vapei' chi in atahlat utpen bangte e?
- 9). Khrist thawkiana poimawna bang e?
- 10). 'Pasian zietlam a tou' chi umzie hilchien in.
- 11). Jesu Khrist bang bawl diing a Leitung a hing peikia diing e?

JESU KHRIST SHINA ZOU A THAWKIANA THU LEH GINGTUTE HINKHUO

Thuchin ding:

“Pasian in shina hennate khu aphelsah a, akaithouta a, Amakhu shina in hentang guol ahitahlou jiehin” achi hi (Nasepte 2:24).

1). Thupatna.

Jesu ang pieng a, Khross ah zong eite khelna tang in ang shi a, ahin thou kiata sih leh hundamna nna asem bukim sih ding hi. Mangpa Jesu thawkiana thu khu ei Khrsitiante thugin kingahna suongpi poimawtah khat ahi. I Bible uah zong 104-veitah atuong/kigel hi. Banah, Khristian sahkhua khu sahkhua dang sang a, athupina leh tungnun zawhna zieh ahileh aneitu/amukhetupa Mangpa Jesu khu adamlai a genma bang a, shina zou a, nithum ni a han a kipat athawkia jiehin ahi. Khawvel ah sahkhua tamtah aum a, amukhietute tuni dong in i Mangpa Jesu bang a athoukia koima aumnai sih a, zong aum ngaingai sih ding uhi. Tuaziehin, i sahkhua uh khu sahkhua dih-le-tungnung ahina suhlatna khu Jesu thawkia na ah a kilang hi. Ahin, tuni dawng in Mangpa Jesu thawkiana thu gingta lou leitung/khawvel pawl leh mi tamtah aum nalai uhi.

2). Dr. Alban Douglas gen dan in (Jesu thawkina pomlou)-te ngaidan tambang ahi uhi:

2.i). Jesu thawkiana thu pen kisawl/kihmemna na mai ahi chipawlte pomdan in. (Hook Theory). Tamkhu kisawl/khemnana mai ahi a, thutah ahisih a; tup khat nei a phuohtawm ahi achi uhi. Jesu shithu khu History leh Pasian thu in jong apom sih a, nuajuiten aphuohtom uh ahi achimai uhi.

2.ii). Jesu Khross ah ashidang maimai ahi chipawlte ngaidan. (Swoon Theory). Sepaiten, Jesu khu thatlum louin, shidang mai ahijaw hi a chi uhi. Tualeh, hanvot leh silgim tui anu/apiehte un asuhal kia hi. Tuachin, ahing hing kia hi achi mawh uhi. Alelam ah ngaituata lei asil dawn sah te uh khu koi hinna ding sangin poison lam ngentang ahi jawsop hi. Tuazieh a, shi zong ahijaw maithei hi.

2.iii). Mitvaina leh mukhielna mai ahi. (Hallucination). Nuajuite khun Jesu mukia akithalop mama ua, tuachin athou kia ngei ding in jong agingta ua, a mit ha un amu maimai uh achi uhi. Eiten mit ha a mi imu dan in Jesu thawkia thu agen uhi.

2.iv). Hagau lam sil maimai ahi. (Ghost Theory). A hagau amu ua Jesu hidingin agingta mai uhi achi uhi. Ahin, Hagau in ann-le-tuite a ne in zong a dawn thei sih hi. (Luk 24:39-43).

2.v). Masanglai thawnthu/tangthu maimai ahi. (Myth Theory). Tang thu phuhtom kigen sonson maimai jel ahi a, thutah a aum sih hi. Tuajiehin, masanglai miten ana gen uh tua kigen sonson maimai ahilel hi achi uhi.

2.vi). Genchiena dihtah. i Mangpa Jesu khu adamlai agen bangin han akipatin kaithaw in aumta hi. Tualeh, Nasepte 2:24-in “Pasian in shina hennate khu aphelsah a, akaithouta a, Amakhu shina in hentang guol ahitahlou jiehin” achi hi.

Tuaziehin, Jesu thawkiana gingta loute khu tam a tung a ngaidan dihluu neite toh din mun kibang a chithei ding uhi.

3).Thawkiana thahatdan. Dr. Albon Doughlas ma-in, “Jesu thawkiana khu khawvel a silbawlttheina thupipen ahi” achi hi. Tualeh, New clear bomb, Atom bomb, Hydrogen hatnate, leh Uranium hatna chite khun suhsiet theina thahatna anei giep uhi. Thawkiana, thahatna in mishite kung a hinna piehtheina aneijiehin a power ahat jaw hi” achi hi. Banah, khawvel ah thahatna (power) tuomtuom imuthei ua, etsahna din, electricity thahatnate, van-ging thahatnate, huipi guopi thahatnate, thamlouin Setan thahatnate in zong thahatna power anei chiet uhi. Ahin, Jesu thawkiana khu tam teng zousie tung athunei leh sang a thahat zaw tham a hi.

Thamlouin, natna thahatna jiehin khawvel a lamkai liente leh sahkhua mukhietute zousie ashi siengta uhi. Tuachin, ahante uh zong thupitah a bawlin aum chiet uhi. Ahin, tuni chieng dongin khatma jong athoukia sih ua, ahante uh jong akihong sih uhi.

Nidanglain, Aiguptaten khawvel top chieng in thawkiana um ding in ana gingta uhi. Tuachin, Pyramid-khu ahan inn ding un mi 1,20, 00-velten asun ajan in kum 35-tah alam/sem ua, tuachin ‘Pyramid’ masapen khu alam zouta uhi. Tuami lamna ding a suong jahte uh khat maimai jong agihdan ahileh ton khat sang a gih jaw ahi. Tuachin, alamjoutah un, akumpipa uh shisa luongkhu hoitah a tuomin (embalmed) bawlin akoi uhi. Tualeh, Pyramid khat atawkhahna uah ahansung ah ann (wheat) amukhie uhi. Akoina jiehu ahileh ahagau athaw chiengin, agil akial ding a, tua ann apoimaw ding chi’n akoisah uhi. Tua ann khu kum 3000-val kikoite zong amu ua, anethaina laiphiel hi achi uhi. Ahin akoisahte uh khatbeh alengpa uh lamkai in athwkianai sih uhi.

4). Mangpa Jesu a thoukia a, ahin ahanvengtuten zua agen uhi. (Mathiu 28:11-15).

- 4.i). Rome sepaite khun Jesu luong aveng uhi. Ahin, Jesu han akipat anghawtahin zilling thupitah hing ling/um in, avengtute khu khawtheilouin aum sieng uhi. Ahin, khuo ang theitah un Dan siemte kung ah sil umdan avahilta uhi.
- 4.ii). Tualeh, Juda Siemputen Jesu athoukia sih chia zuau gen dingin sum pie in mite agolgu uhi. Tamkhu, Thuhuntha ading a golguhna huaisiatah (corruption) ahi. Sepaite ihmud kalin, Anuazuiten ala/gu doh uh chin zuau agensah uhi. A ihmud uh ahileh bangchi dan a aihmut kal ua siltung khu athei ding uh e chi na in zuausanpi agen uh chi a kilang chieng mama hi. A zieh ahileh silkhat veng ding a sepai kikoi a, a ihmud uh zong khawvel asil hithei ahisih hi. Tualeh, ahunlain sil vengtu ding a kikoi khat in asilvente uh angaisah sih uh leh shitan a jong gotna pieh ding ahi uhi. (Nasepte 12:19). Tuaziehin, Siempu liente khun Pilat gawtna ding apat asuatatna ding un theitop in pan alahpi jiehua suata ahi uhi. Tam thu zuau tahsang in tuni dong in, Setan in mi tamtah lungsim leh ginnate suhmiel sahin Jesu thawkiana tahsanglou ding in akoita hi.
- 4.iii). Avengtuten asilven uh a ihmud san uh leh jong abon un aihmud ngel ding uai le? Amauh ading in sil hitheilou ahi.

- 4.iv). Suongte akilia va pual laiin khat beh in thawmza in athou sih ding uh e, ashi ahisih uh leh?
- 4.v). Nuazuiten tua suongpi abon un alia lou uh leh mi khat leh ni lia guol ahina diai le?
- 4.vi). Avadap lut thei ngel ding uaile tuabang sepaiten khautah aven lai un?
- 4.vii). Avengtute a ihmu uh ahileh bang chidan agutute athei uh e?
- 4.viii). Jesu thawkina mutahtah mi asingtelte gendan leh amaute gendan akikal uhi.
- 4.ix). Tualeh athugen uh adih ahileh bangchi dan a sepaite thamna (guhgolna) pieh uh ngai uh e?
- 4.x). Tualeh, anuajuiten vagu hileh uh bang dia apuonsil anuasiat ding uh la?. Tamte akipatin atung a, apaulapte uh khu zuau sanpi/zuauthu leh Jesu thawkiana thudih ahidan akimu chieng mama hi.

5). Jesu thawkia thu gentu khu Pasian Angel ahi.

Thamlou-in, han-gei a Angel umin “Ama tamnah aum nawn sih a, athouta hi a chi hi. Hingpei unlen, Mangpa kisielna hing en un” achi hi. Angel in zuau agen sam ding e? Tualeh Angel in Jesu a thawkia na toh kisai han vahaw/phate kung ah thu teng nga (5)- agente i en ding uhi. 5.i). Zau sih un (Matt. 28:5), 5.ii). Hing pei un (Matt. 28:6), 5.iii). En un (Matt.28:6), 5.iv). Pei un (Matt. 28:7), 5.v). Hil-un/ Gen un (Matt.28:7 chite ahi uhi.

6). Jesu athawkianua-in tamte kung ah avakilah hi.

6.i). Mary Magdalene kung ah avakilah hi. (Mark 10:9-11) 6.2). Numei dangte kung ah (Mathiu 28:8-10). 6.3). Peter kung ah (Luk 24:34). 6.4). Nuazuite kung ah Thomas umlou kalin. (Johan 20:19-25) 6.5). Nuajuite kung ah Emmau lampi ah (Luk 24:13-32). 6.6). Nuajuite kung ah Thomas umpet in (Johan 20:26-31). 6.7). Nuajui sagite kung ah Galilee tuipi piau uh (Johan 21). 6.8). Nuajui 500-te kung ah (I Kor.15:7). 6.9). James kung ah (I Kor. 15:2). 6.10). Nuazuite kung ah Olive tang ah (Nasepte 1:3-12). Tualeh, eite kung ah zong i pientha ni un Hagau in ang kilahin isung uah a teng hi.

7). Thukhum sin.

Awle, Mangpa Jesu thawkiana thu thutah-le-dih ahidante igenta uhi. Tuabanah, i Mangpa Jesu shina zou a, a thawkia bangin eite zong i Mangpa misiengthoute la ding a i hing/dam sung ua (rapture) ang tun man sih leh shina toh ikimaituoh ding uhi. Ahin, shinan lei zong Amabangin ni khat ni chiengin i thou kia ding uhi. Azieh ahileh Ama khu shina ma kaitu ahiziehin ahi.

Dohnate

- 1). Mangpa Jesu thawkiana thu khu ei Khrsitianta thugin kingahna suongpi poimawtah khat ahidan gen?
- 2). Dr. Alban Doughlas gen dan in (Jesu thawkina pomlou)-te ngaidan te gen in?:
- 3). Mangpa Jesu a thoukia a, ahin ahanvengtuten zua agen dan uh gen in?.
- 4). Jesu thawkia thu gentu khu Pasian Angel in bang chin agen ei?.
- 5). Jesu athawkianua-in koite kung ah avakilah eile?

.....

BUNG – 14

HUNDAMNA THU

Thuchin ding:

*“Atawp dong a thuohngapte khu hundam in aum diing uhi”
(Mat. 10:22).*

1). Thumapui:

Hundamna thu khu Khrist thugin poimaw pen leh kingahna i chi thei hi. Mangpa Jesu pienlai in Vansawlsiengte’n belampute kung ah “Mizousie a diing in Khantanhohi kipah um mama a vatut uh khu hundamna thu” ahi. Hundamna khu, Pasian itna/lungsietna nnasep ahi a, mihing nnasepna panglou kei ahi chilei i chikhiel sih diing hi. Ahivang in hundam ihitheina diing in mihingte’n i bawl diing uh bang tan ahiei khatvang a um hi.

2). Hundamna bul:

Bible zilsahna, i thugin ngana (5)-in a gen bang in hundamna bul khu Pasian itna/lungsietna ahi. Tangtawn a mangthang diingte khu Pasian in a lungsiet a, ahivang in mihingte’n hundam ngai ahilam nasan uh kitheilou in leh hing hundam in chia ngetna dan zong theisih nanleh u’zong, Pasian in mihingte a lungsietna jieh in hundamna a bawlsahta hi. Tami khu i gensa bang un, mihingte’n Pasian kung a, a nget jieh u’leh thum hat jieh uh hilou in, Pasian in mihingte a lungsiet jieh a amanbei a, apieh ahibou hi (Isai 48:11).

Tualeh, khum hundamna loupitah sem diing in, Pasian in a Tapa tangkhat neisun khu shi diing in ang pekheta hi. Tami khu Pasian lungsietna kilahna sang pen ahi a, mutheilou leh pomloute diing in hundamna din lampi dang a um nawn sih hi. Tuajieh in,

hundamna thu khu poimawitah leh i Bible tup-le-ngim pen zong ahi i chi thei uhi. Thuhun Lui hun in hundamna in tahsa hundamna lam a koh deu a, Thuhun Tha hun ah vang, tahsa-le-hagau hundamna bukim khu atup-le-ngim ahideu pen hi. Tualeh, mihingte hinna khu hundamna panglou in shina, mielna leh lam-etna mawngmawng umlouna hinkhuo ahi.

3). Hundamtu:

Mihingte hundamna chi umzie khu manthaina lah a kipat a hundam himailou in asang leh thuhzaw a mangthaisahpa khu in a khelna ua kipat a ahundamna khu ahi. Tambang, hundamna nnasem thei diing khu Pasian in Lei leh Van ah zong khat bou a nei a, tuakhu a Tapa Jesu ahi. Tualeh, a Tapa a diing in tam hundamna nnasep diing dan khu sil awlsam ahisih a, mihing bang in ang pieng a, ahivang in khelna neilou ahi. Mi khielte a diing in Khross ah a shi a, a shina khu Pasian Siengthou toh mihingte kizopmat kiana ang hita hi.

Shina zou in a thoukia a, tuachi'n a nuazuite ngei zong khu shina in a zounawn sih diing uhi. Tuami mai hilou in, a hagau tungtawn in amau ah a tengden a, a umpi zing hi. Nitawpni chieng in a mite hundamna bukimsah diing in leh Leitung a vaihawm diing in ang peikia diing hi. Tuajieh in, hundamna bulpi khu Pasian lungsietna ahi a, a subukimtu khu Mangpa Jesu ahi. Abul apat Pasian lungsietna ah akinga a, mihing nnasepna panglou in ginna tungtawn in hundamna i tang ding uhi.

4). TU IN HUNDAMNA SAWNGTHUMTE IGEN DIING UHI:

4.i). Tu-le-tu a Hundamna:

Jesu'n "Na gintatleh Pasian loupina na mu diing ka'ng chi hilou i?" (Johan. 11:40) a chi hi. Paul in "Tu khu hundamna ni ahi," (II Kor. 6:2)-chin agen i mu uhi. Tamte apat in hundamna khu tu-le-tu dinmun a nei leh tan diing ahi thu i mu uhi. Tu i damsung ngei a hundamna itan sihleh shinua chieng in tan thei ahinawnsih diing hi chi ang theisah hi.

4.ii). Dachieng tanding hundamna:

Tam khu Ni nukhia chieng a, siltung diing ahi. Mangpa Jesu Khrist khu vaihawm diing in leitung ah ang pei diing a, mihingte a masang

ah a ding ua, mizousie amau silbawl bang zel ua vaihawmsah in a um diing uhi. Tami ahileh hundam tate toh kisai a dachieng a siltung diing khu ahi. Tam vaihawmna ah khun eima siemtanna thu genthei ahisih diing a, damsung a hinkhozahdan, Khrist a diing in a thuoh ngap nai? chite doh ahi diing hi. “Atawp dong a thuoh ngapte khu hundam in aum diing uhi” (Mat. 10:22), in chi hi.

4.iii). Hundamna bukim:

Hundamna bukim khu’n i hagau ading ahisih leh i tahsa maimai hundamna a ngaithei ahi a, ahivang in Jesu hundamna in tahsa-le-hagau hundamna a huop hi. Tuazieh in, hundamna bukim khu: Tangtawn shina kipat a hagau hundamna ahi. Nichin neh-le-dawn apat hundamna zong ahi. Solna lah a kipatsa hundamna ahi a, gentheina leh zawinna akipatsa hundamna ahi. Natna leh damtheilouna kipat a hundamna ahi a, migilou leh khelna lah akipat a hundamna ahi. Gal-le-sa, kiletsahna, lungthahna a kipat hundamna leh adangdangte a huop hi. Tuajieh in hundamna thu i gen chieng un i hagau uh shinua chieng a Vangam lutna diing mai hilou in, tam Leitung i damsung ngel ua, hundamna bukim i tan diing uh ahidan i mu thei uhi. Mihingte khu khelna chinteng lah a hundam ngai i hi ua, tua hundamna khu tangtawn a diing ahi. Hundamna khu tulaitah, dachieng leh nichin hinkhuo a tan diing ahi thu i mu ua hing kilang bang a hinna nei diing in a sem hi.

Dohnate:

- 1). Hundamna bul leh hundamna nnasemtu koi e?
- 2).. Hundamna sawngthumte hing gen vawi?.
- 3). Hundamna bukim in bangteng a huop ei?

.....

BUNG-15

HAGAU SIENGTHOU HINA LEH THUGIN IN A GENDAN

Thuchiin ding:

*Tuachieng in Hagau gate ahileh: Ki-itna, kipahna, kilemna,
thuohhatna, Zaineemna, hoina, gin-umna, nunnemna leh
kidehtheina bang ahi, tamte chiloungal danthupieh dang a um sih
(Gal. 5:22-23).*

1). Thumapui:

Hagau Siengthou hina leh nnasep dan khu Hattuom dinchil apat, tuni dawng in mite kinielna leh ngaidan kibahlouna khat ahi. Tualeh, adiehin milimte ngaidan leh adangte ngaidante ah kibahlouna a um dieh hi. Tuaziehin, sil thei siem hakhat ahi chi lei ichi khiel sih ding uhi. Thuhun Lui ah Hagau Siengthou chi khu sawmgiet-le-giet (88)-vei akimu hi. Thuhun Tha in Hagau Siengthou a chi leh Thuhun Lui a Pasian Hagau amaw, Mangpa Hagau chi a gente khu akibang ahi uhi.

2. Bible in Hagau Siengthou hina agente i sui diing uhi:

2.1). Thuhun Lui hun a a nnasepdan:

2.1.i). Pasian Hagau leh Leitung kichimatna:

Gen. 1:2 ah khun, ‘Pasian Hagau khu Tui tung ah a vah kawikawi a’, chi i mu uhi. Tualeh, Job. 32:8 ah, “Pasian Hagau khu mite tung ah hing teng in pilna a pie” chite zong i mu uhi (Sam 104:30), ah ‘Mangpa Hagau in mihing leh leitungte khu a siem’ chi i mu uhi’ (Ezekiel 37:9)- ah Mangpa hu (Hagau)- khu’n mihingte a suhlat thu zong i mu uhi. (Deut.34:9)-ah, Nun tapa Joshua khu Mangpa Hagau

in pilna a pie chi zong imu uhi. Mangpa Hagau khu'n a sil siemte, leitung/khawvel leh mihingte a enkawi in kizopna hoitah a neipi zing chi i mu uhi.

2.1.ii). Mihingte hutkhietna ah zong naa a sem hi:

Galte lah a, a mi Israelte hutkhiehna diing in hatna petu ahi. Samson tung ahte, Leng Saul tung ahte, Mosi tung ahte i mu uhi (Thupilte 14:19; I Sam. 11:6; Num. 11:17-25). Tualeh, Jawlneite suhal in thu gen diing in a pawl hal a, zong a suhangsan hi. Tualeh, Isai 61:1 ah khun, “Gentheite kung a khantan hoi gen diing in ei teel in ei sawl a” chi thu i mu uhi. Tuabanah, Eze. 2:2- ah, Mangpa Hagau in Ezekiel khu a umpi chi i mu uhi. Israelte suoh-le-sal a pat a hutkhietna diing a hatna petu zong ahi (Isai 11:2). Thuhun Lui hun in Hagau Siengthou in mite a umpi a, ahivang in mite'n gitlouna leh Pasian deiloulam asep chieng un a peimangsan zelzel hi.

2.1.iii). Mituom bang a gen ahi-a, ahi'n Pasian toh kijopna nei ahi:

Mituom bang a gen ahi a, mihing mimal toh kijopnanei ahi. Tualeh, Messiah kung a haatna leh silbawltheina petu bang in agen hi. (Isai 11:2-5; 53: 10,11; Eze. 36:20; 37:14; Joel 2:28-32).

3.2). Thuhun Tha in a gen dan:

3.2.i) Pasian Hagau:

Rom 8:9 ah “Pasian Hagau nouma a aten leh...” a chi hi. Dawng 11- ah, “Pasian Hagau, shina pat a Jesu kaithoupa hagau...” chite zong imu hi. Rom 15:16 ah “Gentelte khu Hagau Siengthou a suhsienghou ahi thu leh, I Thes. 5:23 ah “Lemna Pasian ngei in na pumpi un hing susiengta” a chite zong Hagau Siengthou genna thu ahi.

3.2.ii). Jesu Hagau: Khrist Hagau, a Tapa Hagau chite akibang ahi.

Tualeh, Nasepte 16:17- ah, Paulte khu Bethani a lut a sawm lai un, Jesu Hagau in aphalsih chi zong imu uhi. Rom 8:9 ah “Koi zong Khrist Hagau neilou khu ama mi ahi sih” chi i mu uhi.

3.2.iii). Hagau Siengthou:

Tualeh, II Kor. 13:14- ah, Hagau Siengthou pawlna a gen hi. Luk 11:13- ah, “Hagau Siengthou khu a ngentapou kung ah pieh ahidiing

thu' i mu uhi. Eph. 4:30-ah, Hagau Siengthou khu dasahlou diing a thupieh i mu uhi.

4). THUGIN IN AGENDAN:

4.i). Mangpa ahi:

II Kor. 3:10 ah “Mangpa khu Hagau ahi a; Mangpa Hagau umna zousie ah khun zaleenna a um hi” chi ahi. Tualeh, II Kor. 3:6-ah, Gentelte dan thupieh pen shina ahi a, hinanlezhong Hagau khu hinna ahi” achi hi. Leitung kisiem chil in tui tung a awpkhum a, Leitung kepbit zelpa khu Khrist thute, Pasian laibu thute khu mite lungsim ah a awp hing zing hi. Tuachiengin, mite’n Jesu khu “Mangpa” chi in a han diing uhi. Ajiehpen, Hagau bou khun Jesu “Mangpa ahi” achithe i giep hi (I Kor. 12:3).

4.2). Jesu’n Lalna leh thuneina a tanna mun ah Hagau Siengthou zong a lal in thu anei zel hi:

Jesu lalna/thuneina mite lungsim ah khun Hagau Siengthou zong a lal/in thu anei a, ‘Mangpa’ chi in a han thei uhi.

4.3). Hagau Siengthou Hinna petu:

Hagau Siengthou in migilou kisiete kung ah lungsimtha a pie a, a khelna mun ua kipat kinualet hinna a pie hi. Tuajiehin, hinna petu ahi (II Kor. 3:6). Pasian in lungsim mielte khu a salvahsah hi (II Kor. 4:6).

4.4). Pa leh Tapa a kipat a hing kipan/pei ahi:

Mangpa Jesu’n Pa kung ah ka ngen diing a, ama’n hamuontu ang pe diing a, kumtawn in na kung uah a um diing hi (Johan. 14:14). Hamuonpa Hagau Siengthou Pa in ka min a ang sawl diing pa ngel in noute sil bangkim hing hil van in, tuachi’n keima’n ka hing hilsate zong hing theisatava (Johan. 14:26). Tambang, ahijieh in Hagau Siengthou khu Pa leh Tapa akipat a hing kipan/pei ahi chi akilangchieng mama hi.

4.5). Pa leh Tapa toh kibang ahi:

Tami in Hagau Siengthou khu Pasian ahi chi a langchiengsah mama hi. Baptisma tanna phui teng ah, Pa, Tapa leh Hagau Siengthou min in i tang ua, zong Pa leh Tapa bang in Hagau Siengthou zong Pasian ahithu imuthei uhi.

5). Thukhum sin.

A tung a i gen bangun Pa, Ta Pa leh Hagau Siengthou khu kikhenthe
lou ahidan uh i mu uhi. Ahin, eiten khen sawm in khat pi gen a adangte
ngai nep pen adihsih hi. Tuaziehin, khat ahi ua, ahin a nnasepdan uh
a hun leh mun dungzui in a tuom bangin zong a kilang jeljel hi.

Dohna

- 1). Pasion Hagau leh Leitung kichimat dan gen in?.
- 2). Hagau in mihingte hundamna a nnasep dan gen in?.
- 3). Thuhun Tha in Hagau Siengthou agendan chithumte bangte e?
- 4). Jesu in Lalna leh thuneina a neina mun ah Hagau siengthou
bang chibang dinmun in a um ei?
- 5). Thugin in Hagau Siengthou agendante hing gen in?

.....

BUNG-16

HAGAU SIENGTHOU LEH NASEP DAN

Thuchin ding:

*“Phattuumna diing in Hagau theisahna khu pieh ahi” a chi hi
(II Kor. 12:7).*

1). Thumapui:

Awle, Hagau Siengthou hinate i gen zouta ua, tuin ahileh Hagau Siengthou nnasep dan tuomtuomte i suiding uhi. Tulai hattuom tuomtuomte lah ah Hagau Siengthou hina leh nnasep dan gingtute lah ah ngaidan leh pomdan tuomtuom a um hi. Ahivang in, i Bible in a gendante khu adihpen leh ahipen ahi.

2). Gingloute lungsim a, asepdan:-

Hagau Siengthou in mite a khelna uh a kiphohsah hi. Gingloute tung a Hagau Siengthou nnasep dan khu khelna leh vaihawmna ah chinglou/siemtanglou ahidan uh a theisah hi (Johan. 16:7-11). I thugin in a gendan ahileh - ‘A gitloutan uh leh a tunggihdante uh a theisah hi’ a chi hi. Mihingte in bangtan ahiei khat ah eima dihlounate leh chitlanate thei nanleizong kisiena tahtah leh Khrist lam zawt utna lungsim khu Hagau Siengthou nnasep na jieh bou a inei thei uh ahi.

3). Khrist kung ah mite Pui hi:

I thugin in tambang in a genkia leuleu hi. “Khrist theina lam ah a lungsim uh salvah in, a utnate uh suthahat in, Jesu Khrist khu a Mang leh hundampa a pom diing in apui hi” chi ahi. Khrist khu Hundampa leh Mangpa diing a pomna, ‘Pasian Ta a jau/sim chi khu sil kipah huoitah ahi. Khum Hagau jieh in ‘Abba! (Pa!) chi in i han thei uhi. Hagau ngei khun eima hagau toh Pasian tate i hi uh chi ang

theisah hi. Hagau Siengthou nnasep jieh in Jesu khu ‘Mangpa’ chi in i han theita ua, Jesu khu a Mangpa uh ang hita hi. Tuaban ah, thutah lam ah a pui zing tawntung hi.

4). HATTUOMTE LAH A HAGAU NNASEPDAN:

4. i). Pentecost ni a kipat in Hattuumte a umpi zingta hi:

Thuhun Tha hun a Hagau Siengthou nnasep dan i mu masahna uh khu Pentecost ni a gingu masate lah a, ang tun dan/thu ahi. Khum hun a kipat in Hattuum leh gingu mimal zousie a umpi zingta hi. Thuhun Tha hun ah adieh in, Pentecost ni-a kipat in, Hagau Siengthou in mite a umpi zou chieng in amawh nuasie nawn sih hi. I Mangpa Jesu in ‘Kumtawn in na kung uah a umleng diing hi’ a chi hi (Johan. 15:16).

4. ii). Gingtute a suthahat leng hi:

Hagau Siengthou in gingtute khu a puileng a, Khrist thutah khu a hil zelzel a, a min diing in ‘Hamuontu’ chi a hi. Hamuontu chi khu panpitu, suthahattu china zong ahi hi. Nasepte ah, Hagau Siengthou in gingtute leh Hattuumte a suhhatdante i mu uhi (Nasepte 8:14-17; 10:44; 19:6; Rom 8:26-27).

4.iii). Khrist kung ah a pui zel hi:

Tam khu ‘Siengthouna’ a kichi hi. A umzie tah ahileh mihing khelna puosate khu Hagau Siengthou in Pasian sutna leh Khrist sutna nei diing in a susiengthou china ahi. Hagau Siengthou puina leh nnasepna jieh in gingu khu a lungsim puohdante, a deidante, ahindante uh Khrist bang a siemtha zelzel in a um hi.

5). HAGAU SILPIEHTE:

Tualeh, i Bible i sim leh Hagau silpieh tuomtuom i mu uhi. Khumte zousie igen sieng zou sih diing a, tuate lah ah poimaw deute igen ding uhi (IKor. 12:4-13 leh Rom 12:3-13).

5.i). Pilna, theina, ginna, suhdamtheina, sillamdam bawltheina, thugentheina, Hagau dih theitheina, ham tuomtuom a thugen theina leh adangdangte ahi uhi. Sawltah Paul in “Phattuomna diing in Hagau theisahna khu pieh ahi” a chi hi (II Kor. 12:7).

5.ii). Itna: Hagau Siengthou silpieh loupi pen khu itna/lungsietna ahi. Tami khu mi’n a nei sihleh Hagau nnasepna a neisih china

ahiban ah, a dangte khu a phatuom diing bang tah in a phatuom sih diing hi.

5.iii). Hagau ga:

Sawltah Paul in ‘Hagau gate’ a chi sih a, khat bang in ‘Hagau ga’ a chizaw hi (Gal. 56:22-23). Tuatte khu itna, kipahna, kilemna, thuohhatna, zaineemna, hoina, gin-umna, nunneemna leh kidetheina bang ahi, tamte chiloungal dan thupieh dang a um sih hi.

5. iv). Vah leh puihuoina:

Gingtute kung ah Hagau silpiehte khu a kul-le-poimaw dungzui a pui leh panpi hi. Hagau dihtah in thutah apuilot diing a, atahsap bang zel un pui in a lamkai zing diing hi (Johan. 16:3).

6). Hagau Siengthou leh Hattuum:

Hagau Siengthou in Hattuum leh mimal koipen tung ah nna a sem masa ei? chi khu dohna ahileng hi. Amasazaw, heimi pen e chi a gen hasa hi. Ahivang in tamte chiemte va-ui:-

6. i). Hattuum khu Hagau Siengthou nnasep gasuo ahi (Eph. 2:22 -ah. Tualeh, Hattuumte khu Pasian umna diing a Hagau in a lepkhawmte ahi thu i mu uhi. 6.ii). Hattuum khu Hagau Siengthou phukhiet ahijieh in, leitung a pawl dang zousie leh ‘Israel lui’ sang in zong a lamdang zaw hi. 6.iii). Hattuum khu Khrist tahsah ahitheina jieh zong Hagau in a umpi jieh ahi. Hattuumte’n Hagau lam hoina leh khanletna diing ua i guot uh, Sacrament (Mangpa nitah ann)-ngei zong khu Hagau in a zah jieh in a phatuom hi. Tamte, loungal Hagau Siengthou hina leh nnasep i Bible ah mu diing a umsih hi. Tulai a Hagau pawlna tang kichi a, hattuum a umngaplou leh lim-le-laam mai buoipite khu a dih pen ahidiei? chite i ngaituo diing ahi.

Dohna

- 1). Gingloute lungsim a Hagau Siengthou nnasepdan hing gen in?.
- 2). Pentecost nia kipat in Hagau Siengthou in Hattuumte lah ah bangchibang in nna a sem ei?
- 3). Hagau Siengthou in gingtute Khrist sutna lam ah bangchin apui ei?
- 4). Hagau silpieh chituomtuomte gen in?.
- 5). Hattuum sung a Hagau Siengthou nasepdan tuomtuomte hing gen in?

.....

BUNG -17

HATTUOM HINA UMZIE LEH NICEA THUGIN (CREED) - IN HATTUOM HINA A GENTE

Thuchin ding:

*“Tualeh Ken zong na kungah, Nang Peter na hi, chi ka hing
hila hi, tualeh, tami suongpi tungah ka hattuum ka lam ding a,
mishikhuo kul kotkhatem tuami azouthaw sih ding hi”*

(Mat. 16:18)-a chi hi.

1). Hattuum min umzie.

Ei ham a “hattuum” kichi Sapham in “Church” a kichi a, a hambul lam i sui chieng un a umzie ahileh ‘Mangpa a ding’ china ahi-a, hagau kulpi Pasian phu china zong akawh hi. Leitung a ham tuomtuomte a hattuum gennate i gen masa ding uhi. Tuate, khu Scottish ham in ‘Kirk’ ahi-a, German hamin ‘Kirche’ ahia, Swedish hamin, “Kyrka,” Dutch hamin ‘Kerk’ achi ua, French hamin ‘Eglise,’ ahi-a, Spanish-in ‘Eglesia’ ahi a, Latin (Italy) hamin ‘Ecclesia’ ahi a, tamte khu Greek ham a ‘Ekklesia’ kipat a kiladawh ahitangpi uhi.

Tuaban ah, hattuum china kamteng khu Thuhun Tha ah 112-vei i mu uhi Tualeh, Hattuum chi umzie atomkim in genta lei “Pasianin Ama ding leh Ama nnasem ding a Leitung a kipat a hattuumte” china ahi.

2). Hattuum phutkhetu, neitu leh kingahna suongpi khu Mangpa Jesu ahi.

Khantanhoi Mathiu laigel ah Mangpa Jesun hattuum chi nivei ana jang/mang hi. Peter in Mangpa Jesu khu Khrist Messia ahina a puon nua in, Mangpa Jesun Peter kung ah, “Tualeh ken zong na kung ah,

Nang Peter na hi, chi ka hing hil ahi, tualeh tami suongpi tungah ka hattuom ka lam ding a, mishikhuo kul kotkhahten tuami azouthaw sih ding hi” achi hi (Mathiu 16:18 & 18:17). Tualeh, tamna “suong... suongpi leh hattuom” chi hamkam chi tuomtuomte khu Jesu Khrist in umzie neitahin amang hi. Tamnah ‘Tami suongpi tung ah ka hattuom ka lam ding’ (Matt.16:18b)-a chi laitah khu hilchet hamsa mama khat ahi.

Unau Roman Catholic-ten, ahileh Peter khu suongpi ahi chi’n a ngai uhi. Amakhu, hattuom kingahna leh Pope thuneina zong Peter a kipat a kiluosawnin angai uhi. Tami ngaidan, khu Protestant-ten a pompithei sih uhi.

Pasian thusiem St.Augustine in suongpi khu Mangpa Jesu Khrist khu ahi achi hi. Tuachin, Peter kung ah “Nang khu Peter na hi a, Kei khu suongpi ka hi” achina a hi (Matt.16:18), a chi hi. Jesun “Keiman tami suongpi tung ah ka hattuom kalam ding a, tua satan loupitah ka hing pie hi” chin a gen hi. Tualeh, Greek ham a ‘Petros’ kichi khu suongpi china ahi a, Peter china ahithou a, Khrist khu suongpi, Amakhu hattuomte kingahna leh neitupa ahi chi khu ei Protestant hattuom ten i pomdan uh ahi.

3). Atangpi in hattuom hina chinite khu mutheilou (invisible) leh muthei (visible)-te ahi uhi.

3.i). Mutheilou Hattuom:

Hattuom siemphatute lahah, Augustine, Martin Luther leh Calvin-ten zong, ‘Hattuom muthei’ a phu vang un, ‘Mutheilou hattuom’ um in zong a gingta uhi. Tuabanah, Augustine ngaidan in, “Hattuom khu telte zousie a huop a, tuate lah ah khenkhatte muthei hattuom sung ah a um ua, a khente apulang ah a um uh” achi hi. Hattuom mutheilou umdan ahileh, gingtu dihtah, masang lai a na shisate, tulai a damlaite leh hing um zel dingte zong huop in a genthei ding hi. Tualeh, Mangpa Jesu Khrist gingta zousie khu, tam leitung ah min khat puom khat nei in dingthei sih nan lei zong, i bawn un mutheilou hattuom ah i jau/tel chiet uhi.

3. ii). Muthei Hattuum:

Tualeh, Leitung ah hattuumte khu tu-a, a min-le-hina bangun muthei hattuum khu leitung mun tuomtuom ah, local churches/ denominations, doctrines, Constitutions leh by-law a ki-enkol in leitung a pawl tuomtuom a muthei in i ding uhi.

4). HATTUOM HINA NICEA THUGIN (CREED)- IN AGENTE

Tualeh, tu-in hattuum hina dihtah leh zie tuomtuomte, 'Nicaea Thugin' (Nicaea Creed) in a puonkhieh chi li-(4)-te i gending uhi.

4.1). Tuin 'Nicaea Thugin' in hattuum hina agente isui ding uhi. Tu ate ahileh:

4.1.i). Hattuum khu Khat (One) ahi.

Hattuum khu khat chi khu in hattuum hina zie poimaw tah atahlang hi. Hattuum khu leitung ah pawl tuomtuom in um in, thugin leh biehdan tuomtuomte nei in, nam tuomtuomte in kikhen nanlei zong Mangpa Jesu Khrist gingta zousie 'Khat' i hi uhi. Hattuumte, Mangpa Jesu hundampa a pom zousie khu 'Hagau khat, Mangpa khat, baptisma khat leh ginna khat neitute leh tudetin' i um uhi (Ephesa 4:4).

4.1.ii) Hattuum khu a Siengthou ahi (Holy):

Hattuum pen Pasian a, hagau lam kipawlkhawmna ahiziehin a siengthou hi. Hattuum siengthou chi umzie dihtah khu 'tuom koi' china ahideu pen hi. Sildang lah a kipat a lahtuum a, siltuum dieh khat a ding a koituom china ahi. Tualeh, hattuum neitu leh hantu in a sisan siengthou toh a tat/lei ahiban uah, Pasian khu a siengthou ahiziehin, hattuum khu a siengthou ahi. "Na siengthou ding uh ahi, Kei ka siengthou ngal a" Mangpan a chi hi (Leviticus 11: 44).

"Hinanleh noute hing hanpa a sienthou bangin, noute zong na gamtat dan zousie uah siengthou un. Aziehpén 'Noute siengthou un, Kei ka siengthou hi' chi a kigel bang in" (I Peter 1: 15-16). Ahin, tulai ei hattuumte lah ah tahsa, lungsim leh hindan sienthoua nasatahin i kitasam mama uhi.

4.1.iii). Hattuum khu huopzou ahi (Catholic):

Mangpa Jesu hing shina khu leitung pumpi a mizousie a ding ahi. Tuabang in, hattuum zong huopzou chi khu hattuum ah leitung a mizousie a ding china ahi. Pasian hattuum sung ah leitung ningli a um michin, nam chin, hamchin teng ata un ahuop siengveh hi. Thuhun Lui hun laiin, Pasian in Israel nam sawm-le-nite, Ama mite hiding in anatel tuom hi. Pasian mi hiding in nam dangte leh ei Jentail-te a ding in lam etna mawngmwng a um sih hi.

Ahin, Thuhun Tha hattuum ah khun, mizousie a ding in lampi a kihong zing hi. I thugin uah zong, “Mi zousie a ding a hattuum siengthou a um ka gimgta” a chi hi. Rev. Lalsawma in, “Huopzou hattuum chi khu pawl tuomtuomte danglam na in a suhbuoi phahlou leh gam dang leh nam dangte kikhenna in zong asuhbuoi phahlou, mi zousie huop zou ahi” achi hi.

4.1.iv). Hattuum khu Apostol-te (Sawлтаhte) thugin leh zilsahna a kinga ahi.

Hattuum khu Mangpa Jesu phukhie ahi a, tuate lah ah Apostol-te zong apang/jau uhi. Tualeh, Sawлтаhte khu Mangpa Jesu shina leh thawkiana mutute leh theipitute ahi uhi. Tuabanah, Mangpa Jesun zong Ama sepban sem ding a, a tel leh sawlte ahiziehun, amaute tungtawn in zong hattuum ang ding ua, tuni dong in eite tung ah hattuum phuna leh zilsahna i liengkou uah a kinga zing hi. Tualeh, hattuum dihtah khu Bible thutah leh Apostol-te thugin dihtah pom leh zuitute ahi uhi. Nidanglai in hattuum masaten vaiahawm chiengun, “Hagau Siengthou leh kouten” chiin Pasian Hagau Siengthou umpina toh ana kipui zelzel uhi.

Dohnate:

- 1). Hattuum min umzie ham tuomtuom a kigente bangbang e?
- 2). Hattuum neitu leh phutkhietu koi e?
- 3). Mangpa Jesu tami suongpi tung ah ka hattuum kalam ding a chi khu Protestant leh Roman Catholicte ngaidan kibahlou dan gen in?
- 4). Muthei leh mutheilou hattuum umdan tawmkimin gen in?
- 5). Nicaea Thugin’ in hattuum hina chili (4)- agente bangbang e?

.....

BUNG-18

HATTUOM HINA KAMTENG LAISIENGTHOU (BIBLE) A I MUTE UH

Thuchin ding:

“Hattuum khu Pasion teel Israel ahi uh” (Gal. 6:16).

1). Thumapui:

Hattuum hina min tuomtuomte leh Necea Thugin (Creed)-in, agente igenzouta uhi. Tuin, Sawtah Paul leh midang in hattuum hina agente isui ding uhi. Tuata ahi uhi leh:

2). Sawtah Paul in Hattuum hina a genchetdan:

Sawtah Paul laihahte ah, Hattuum chi thuteng khu 60-vei a tuong hi. Thuhun Tha bu gielte lah ah Paul khu Hattuum hina leh umzie genchientu pen khat ahi. Gingtute’n, Hattuum dihtah a theichietna diing un Leitung sil toh lampi li (4)-in, a tekkin hi.

Tambang in:

2.i). Hattuum khu Pasion Bieh-inn siengthou ahi (I Kor. 31:16-17; 6:19; Eph. 2:20f; 4:30). 2.ii). Hattuum khu Khrist mou siengthou ahi (II Kor. 11:2; Eph. 5:25-27). 2.iii). Hattuum khu Khrist tahsa ahi (Rom 12:49; I Kor. 12:12-17; Eph. 1:23; 5:29, 30; Kol. 1:18, 24, 28; 2:19). 2.iv). Hattuum khu Pasion teel Israel ahi uh (Gal. 6:16)-chite in a gen uhi.

3). Hattuum khu Khrist tahsa/pumpi (Ephesa 1:22-23: I Kor.12:27) ahi.

Tam thumal khu gingtute leh Mangpa kikal a taksapum khat a kizop khawm ahi. Tualeh, Khrist leh gingtute tahsa kizop khawm na khu mihingte tahsa kizawm khawmnate sang a sang zaw leh thuhzaw

ahi (Ephesa 5:30). Tahsa, bameng tuomtuomten hinna khat kibang un, utna kibang leh kizopna kibang a zangkhwam uhi. Khrist khu hattuom lutang ahi. Amakhu, lamkaitu leh vaihawmtu zong ahi. Amakhu, pumpi vahtu zong ahi a, ama pilna in hinkhuo a tup-le-ngimte zousie zong a enkol sieng hi.

Tualeh, hilchetna ah zong, khat-le-khat kipoimaw tuo i hidante uh a gen hi. Tualeh, keng in khut kung ah kangpoimaw sih achithei sih a, tuama bangin mit in bil kung ah kang poimaw sih achithei dieh sih hi. Pasian in, pumpi in hingbawl ahi a, hichi-a kipanpi tua leh kihamuontuo a umtheina ding un. Tualeh, 1 Korinth. 12:15-17-ah, lu-le-pumpi kikal ah zong kitheisiem tua na a um a, lupanglou in pumpin bangma abawlthei sih a, ahisihleh lu-in zong pumpi panglou in bangma abawlthei dieh sih hi. Hattuom hinkhuo ah Ama (Jesu)-i poimaw mai uh hilou in, Aman zong eite hing hepina ziekin leitung a mite hundam ahina dingin ahing poimaw a, a Amite leh Hattuomte dingin Ama ah kinga ua, i kipoimawtuo uhi.

4). Hattuom khu Khrist mou (Kihilna 21:9) ahi.

Kitenna in mihing nite kikal ah kizopna tuom dieh khat ahing khie a, itna toh kitheisiemtuona leh kizat tuonaten mani masielna leh mimal hinkhuo tengteng a heng lamdang hi. Thuhun Lui hun ah zong Pasian in Isrealte khu a mou bangin awnem tahin leh duot taha in a pui zel hi. Thuhun Tha ah Mangpa Jesu Khrist khu mounceipa bangin a kigen hi.

Khrist khu moupa ahileh mou koi hita ding e? Sawltah Paul in mou khu hattuomte ahi chiin anghil a, Khrist in a itna maimai hilou in, Ama a ding a shi a, hun hingtung ding ah bukim tahin khelna bei in a ang sung ah ang dingsah ding hi. Khrist i van pasal in a Hattuomte khu a itin, a khotuo mama a, siengtah leh kumtawn itna in, Pasian hepina lamdang tah mai khu thumang loute leh mikhielte a itna ahi. Pasian in a hing itna zieh in miel a i umna u'leh, khelna leh Setan saltanna a pan in, Khrist shina leh thawkiana in a hing suoh tasah hi.

5.). Hattuum khu Pasian tempul ahi.

Thuhun Lui ah Pasian in Israelte lah a hingteng ding ka hi achi a, Ama tenna ding mun teel khu biehbu/puonbu sungnung/tongnua pen ahi a, tuakhu ‘mun siengthou pen’ chi-a kigen/hatna mun ahi. Tami inn khu huntom noukhat a ding mai ahi a, phelkhie thei ahi a, vanpuohna a puoh thaw thei zong ahi. Tuami nua-in, Kumpi Solomon in suong tempul thupitah mai alam a, Jerusalem a biehna mundet umtheina ding in, biehbu/puonbu taang dingin, Pasian in tam mun ah amite lah a umding ahidan a gen hi.

Tualeh, Thuhun Tha ah Paul in gingtute khu Pasian inn hi’n a gen hi. Tueleh, tambangin a gen a, “Na pumpi uh khu Pasian tempul Hagau Siengthou tenna” ahi achi hi. I bawn un, Pasian tempul i himai uh hilou in, mimalmal a zong Hagau Siengthou hing tenna tempul i hi uhi. Pasian inn nahi uhi (1 Korinth 3:9). Paul in zong tam bangin a gen a, Hattuum khu tempul thupitah ahidan leh Pasian khu a inn ahidan, tamkhu leitung tawp chieng a Jesu hing pei kia chieng in suhbukim/chin in a umtading hi.

Pasian innkuon siemtha kiana a, i mu mabangin, piengthana zieh mai in Pasian tate i hing hithei ua, Pasian in a hagau in i lungtang uh a hingluo hun in, i Pa ahidan leh a ta ding a hing pom ahidan ahing theichiensah hi. Tam a tung a tangte, apat in Pasian khu i Pa uh ahidan leh eite a tate (innkuonte)-i hidan uh zong chientahin i muthei uhi.

6). Hattuum khu Thutah khuom leh kingahna (I Tim.3:15) ahi.

Thuhun Tha ah tam thumal etsahna umsun khu Paul in Timothi kung a alaihahna apat in ahi. Tumlam gam a mitampite leh Laisiengthou siem khenkhat-ten, “Itna khu Khrist nuazuite a ding a thupipen ahi” chi a gingta uhi (Johan 13:35). Jesu Khrist hattuumte khun thutah a gending ua, Pasian thutah tulai tumlam Hattuumten zangaina leh itna a gen uong ua, mite kung ah mikhiel nahi chi a gentam sih uhi. Pasian ngaidamna thei a kisiete kung ngei ah amaute khu itna a dimlet in thutah a puongzah theisih uhi. Tamkhu, adih sih a, Sawltah Johan khun Thuhun Tha a gelte lah a Pasian itna khu agentam/mun pen hi.

Hattuum khu tam leitung a Pasian thutah khuom-le-kingahna mun umsun ahi. Tuazieh in, tam thu apoimaw mama a, Khristiante a ding in, thutah theina mai hilou in, thutah a dinna leh thutah a hinna tuakhu thutah puonzahna zong ahi-ngal hi.

7). Hattuum khu Pasian belamte ahi uhi.

Thuhun Lui ah Pasian khu Isrealte belampu leh chingpa chi-a theiin a um hi. A mite khotuo belampu in, a belamte a khotuo mabang in, Pasian zong amite mi malmal tung ah zong a khuotuona a tungsah leng hi. Leeng David in Pasian khu a belampu khotuotu leh itna dim ahidan a theichieng mama hi (Sam.23). Pasian in amite belampu ding leh puitu ding a guotten apuitheilou chiengun zong a lungthah hi. Thuhun Tha ah Khrist khu belampu hoi china tamtah a um a, tualeh, a nuazuite khu belamte chi a hatin a um uhi. Hattuumten, belampu khat anei ua, tualeh Khrist belampu hoi ahi hi.

Tuabanah, belamte umdan tangpi khu puingai leh venbit angaite ahi ua, gamsate a ding a bailamtah a thathei/nethei zong a hi ua, tuaziehin, a honhon a koikhawm in aum ua, a chingtu khut ah nasatahin kinga uhi. Mangpa Jesu khu belamchingpa hoi ahi a, i mawpuohna khu a kung a i um gige ding uh ahi. I hinna ding leh bitna ding mai hilou in, Ama puina i poimaw zing ua, gingtute a dingin poimaw mama dieh a, tam kizopkhawmna ah, Mangpa Jesu khu belamchingpa hoi ahi a, eite khu a belamte vahtu leh puitute zong i hi uhi. Amakhu, amite puikhawmtu, belamchingpan a belamte a puikhawm bang in ahi hi. I thei ding ua hoi khu Jesu khu belamchingpa lienpen zong ahi (1 Peter 5:14).

Dohnate

- 1). Bible ah hattuum genna kamteng bangza a um ei?.
- 2). Hattuum dihtah theichietna diing a Leitung sil chili (4), a tekhinte bangbangte e?
- 3). Hattuum khu Thutah khuom leh kingahna chi umzie bang e?

.....

BUNG – 19
SACRAMENT-TE
(Baptisma thu)

Thuchiin ding:

*“Tuajieh in gamchin ah pei unlen Nam zousie ka nuazui in siem un; Pa, Tapa leh Hagau siengthou min in Baptisma bawl un”
(Mathiu 28:19).*

1). Thumapui:

Sacrament chi hamkam khu Latin ham a ‘Sacramentum’ chi apat lahsawn ahi-a, a umzie khu sil zatat-huoitah a zah/mante genna ahi. Tualeh, Baptisma leh Mangpa Nitah Ann tungtang genna hamkam diing in ‘Sacrament’ ana zahna jieh u’khu, Latin Bible (Vulgate)-ah, tami hamkam ana zah jieh uh ahi pen hi. Silkhat pouma umzie thuhtah nei leh giltah neite genna in tam hamkammal ana kizang leng hi. Sepaite’n, gin-umna thuchiem (Kasam)-a nei uh genna in zong ana kizang leng hi.

2.1). Sacrament umzie:

Tami thu i theichetna diing un, ‘Westminster Confession’ (Presbyterian thugin kingahna)- in a gente i tahlang diing uhi. Tuate:

2.i). Sacrament siengthoute khu itna/lungsietna thuhun etsahna leh namdetna/chiemtena ahi. Pasian ngei khutsuoh ahi a, tuate khun Khrist leh Ama a sil umte a ensah hi. Ama i ngaisahna uh sudettu; tuachi’n Hattuum sung a mite leh Leitung mite kilamdanna suhlatna zong ahi a; Pasian thu bang zel a Khrist a Pasian nnasep diing a lungluttah a kipiehna zong ahi.

2.ii). Sacrament in a etsahna leh a sil etsah khu akizop ua, hagau lam sil ahi uhi. Sacrament phattuomna khu a Sacrament ah um in a kinga sih a, a bawltupa ah zong a um dieh sih a; Khrist guoljawlna zieh leh ginna a tangtute hagau in a sep zieh ahizaw hi.

2..iii). Khrist i Mangpa un Sacrament a gente khu chini bou ahi ua - Baptisma leh Mangpa Nitah Annte ahi uhi. Tamte khu thu nnasem diing a dihtah a teldoh a namdette bou in a bawlthei giep uhi.

3). Raman Catholic leh Orthodox hattuumte in Sacrament chi sagi (7)- a nei uhi: Tuate ahi uh leh:

3.1). Baptisma, 3.2). Mangpa Nitah Ann, 3.3). Khelna/gitlou kipuona 3.4), Kiteenna, 3.5). Namdetna, 3.6). Siempi guotna leh 3.7). Sathau nunate ahi uhi. Tualeh, Salvation Army leh Quaker pawlte in Sacrament a nei sih uhi. Protestant Hattuum tamzawte in Sacrament Ni maimai a nei un a pom uhi. Tuate khu Baptisma leh Mangpa Nitah ante ahi uhi.

4). Tu-in sacrament ni i neite lah ua Baptisma (Sacrament)-thu igen ding uhi.

4.1). Thuhun Lui (Khristian)te-um masang ua Baptisma thu:

Baptisma chi khu Greek ham in ‘Baptizaw’ apat lekhieth ahi. A umzie khu ‘Tui a sil’ ahisihleh ‘Tuithe’ leh ‘Phum/die’ chite ahi uhi. I Bible uh Thuhun Lui khu Thuhun Tha kingahna ahi. Azieh ahileh, i doctrine uh leh sahkhuo thute u’khu Thuhun Lui ah a lim a guong ding na kigenin, Thuhun Tha ah ang bukim zelzel hi. Khristiante um masang adieh in, Thuhun Lui lai in zong, Baptisma lim-le-guong a kimu hi. Sawltah Paul in Israel tate meipi (cloud)-nuoi a, a um u’leh Tuipisan a kan thu u’khu Khristiante Baptisma toh a gente/tekhin a, Khristiante Baptisma lim bang in zong a gen hi (I Kor.10:1-2).

Tualeh, Peter in zong Nouva hun lai a ‘Tuisang let’ lai a mi giet, (8)-Nouva-te innkuon hundam a umte khu Khristiante Baptisma toh kibang in a gen hi (I Peter 3:20). Nidanglai apat in sahkhuo jie h a kisuhsienngthou mi khu sahkhuo chin ah a um hi. Ireland leh Norway gam mun khen khat ah khun, Naungeh ang pien chieng in, Naungeh chidamna diing a dei ziehun, Naungeh lutung ah tui a buoh

ua, tuachi in amin aphuoah ngal uhi. Tuazou a thalup khu tuolthatna in angai uhi. Khristian ang hinua un zong tuabang a bawl pawl a um zing nalai uhi. Ahin, tamte khu i gen ut pen uh ahisih hi.

5). Tu-in ahun dungzui a Judate lah a Baptisma kitansah dante i sui diing uhi.

Tuate khu – namdangte Judate kung a, a lutna uh Baptismate, Johan Baptisma leh Mangpa Jesun Baptisma atan thute ahi uhi:.

5.i). Namdangte Judan nam a alutna uh Baptisma thu.

Tam khu Judate Baptisma tandan ahi. A zilsahna uah koi zong thuchiemta (Israelte)-hi uttapou khun tep atan diing ua, Baptisma a tanzou chieng un kithoina sillat a lan diing uh chi ahi. Tualeh, Namdang mi Juda Nam a kipe nuom a umleh shie (Siempute)- thum in Dante a zilsah nua un, Tui ah (dil/tuiluong)-ah apui diing ua, tui khu a ngawng chieng in a tumsah diing ua, dan thupiehte khu a gen khum diing uhi. Tuabanah, namdang lutna Baptisma a tanna jieh uh khu Mosi Dan bang a, a sienthou theina diing un ahi. Judate khangthu giel khat in “Baptisma khu namdang in Juda sahkhuo a pom ua, ang lut u’leh Baptisma khu atang zel ua, Baptisma a tansih u’leh pen Peikan kut ann zong a im theisih diing uh” achi hi.

5.ii). Johan Baptisma thu:

I gensa bang un Khristiante’n Baptisma i nei masang un Judate’n ana neita uhi. Ahivang in, Baptispa Johan hun akipat in Baptisma umzie leh azah dan i theichien pan uhi. Johan in Baptisma khu Pasian gam hingtung diing a kisahkholna diingin a zang chi imu uhi. Tualeh, khelna kisia a, Baptisma tang diingin zong a hil hi.. Ahin, Johan Baptisma nua-ah khun, Messia hing pei pai diing lam-etna lientah a umjieh in, Johan in Judate khu Messia hing kilah masang ngei a, a khelnate uh kisie ua suhsieng ahitheina diing ua, Baptisma a tansah ahi. Tuajieh in, Johan Baptisma khu ‘Khrist Baptisma’ ahisihleh ‘Khelngaidamna Baptisma’ akichi hi.

5.iii). Jesu’n Baptisma a tan thu:

Mangpa Jesun zong Johan kung ah Baptisma tangsah diing a anget khu Johan in lamdang a sa mama hi. Aman leitung a, a nnasep dingte apat masang in, Jordan lui ah Johan kung ah Baptisma ana

tang hi (Matt. 3:15). Tam bang a ‘dihtatna suhbukim ahoi hi’ (Mat. 3:15) a chi hi. Jesu’n, a khielnate ngaidamna diing in Baptisma a tan ahisih a, mikhielte nna asepsah theina diing in a dinmun u’leh ahina dihtah uh a theipi theina diing in, Baptisma a tansah ahizaw hi. Tualeh, Mangpa Jesu in, Baptisma a tanlai in sillamdangtah thum a ang kilah hi. Tualte ahi leh, - Van ang kihong a, - A tung ah Hagau Siengthou vakhu bang in ang tuong a, tualeh, Van apat in aw ging in ‘Tam ka Tapa deitah ahi’ chi in ang puong hi. I gensa bang un, Baptisma khu Mangpa Jesu ngei in ana phu leh ana suhdet ahi chi lei zong i chi khiel sih ding uhi.

Tuajieh in, gingtute’n Baptisma atan chieng un tambang ma in Hagau guoljawlna a tang diing uhi. Tualeh, Jesu Van a, a pei diing kuon in a nuazuite kung ah ‘Pa, Tapa leh Hagau Siengthou min in Baptisma bawl zel un’ chi in thu apie hi (Matt. 28:19). Tam thupieh khu zui in Hattuum masate leh tunitan a gingtute’n i bawl zing toupeh uhi. Tualeh, baptisma tanna khu Jesu thupieh ahi i chilai un, Mangpa Jesun mi koima baptisma a tansah vang i thei sih uhi. Ahi’n a nuazuite kung ah ama gingtate zousie khu Baptisma tangsah diing in thu apie hi (Mat. 28:19-20).

6.). Khristiante Baptisma thu:

A tung a i gensa bang un Baptisma chi khu Sacrament khat ahia, Greek ham in ‘Baptizaw’ apat lekhiat ahi. A umzie khu ‘Tui a sil’ ahisihleh ‘Tuithe’ leh ‘Phum/Die’ chite ahi uhi. Tualeh, Thuhun Tha a, Baptisma kingahna Bible tangte khu “Gam chin ah pei unlen Nam zousie ka nuazui in siem unlen, Pa, Tapa leh Hagau Siengthou min in Baptisma bawl un” (Mat. 28:19). “Agingta a, Baptisma tangtapouma hundam in a um va uh” (Mak. 16:6)-chite ahi uhi. Tualeh, atung a igensa bangun, Thuhun Lui a Baptismate khu ahim/alim mai ahibou a, Mangpa Jesu hun apat in atahtah leh abukim khu ang kilangta hi.

Tuazieh in, Thuhun Tha leh Khristiante Baptisma khu Mangpa Jesu siem leh phudet ahi ua, tuate khu Sawltahte leh Hattuumte’n zong i zuitoupeh uhi. Tualeh, Pa, Tapa leh Hagau Siengthou min a, Hattuum a lutna diing a gingtute lahlutna zong ahi. Tuabanah, Sawltah Paul zilsahdan in Baptisma khu pienthana thuchiem bang in zong agen hi. Sunglam a piengtha tahtahte in, a leitung khelnate uh

shisan a, khelna toh kizopna neinawnlou chi etsahna di'n Baptisma a tang uh achi hi.

Tualeh, Mangpa Jesu nuazui diing a kipante Hattuum (Siemputen)-in Baptisma a tansah ding uhi. Khristian ahina uh chiemtena masa pen ahi. Gingtha siemkhiet leh Baptisma tansah khu akizop a, Hattuum nnapi zawng ahi.

7). Koi min a baptisma i tanding uh e?

I gensa bang un, Mangpa Jesu'n a nuazuite kung ah "Pa, Tapa leh Hagau Siengthou min in Baptisma bawl un" (Mat. 28:19-20)-chi in thu a pie hi. Tamnah, Pasian a mithum (Trinity) ang kilang hi. A hin, Nasepte 8:16; 10:48; 19:5- te ah, Jesu min a Baptisma mi khenkhat in a tang uh chi i mu hi. Tuaziehin, tam thu khu gendan tuomtuom a um thei hi. Tualeh, Nasepte gieltu Dr. Luk in "Jesu min in Baptisma atang uh" achi a, ahin Baptisma tanlai a phuiteng sam uh ahithu agen tuom sih hi. A gen ut pen khu a tangte in, Jesu khu Mang leh Hundampa in a pomta uh chi ahibou uhi. Tualeh, Peter in Zeng a suhdam lai in zong "Nazareth Jesu min" in achi hi. Baptisma thu ahileh, tambang in Peter in abawl sih hi. Tualeh, tam hun lai in Jesu khu Pasian ahidan puonzahna khat a, angai zieh u'zong ahithe i hi.

Tuabanah, "Jesu min in" ahisihleh "A min" nuazuite'n ana zahna jieh pen uh ahileh, Jesu damlai ngei a ana zah uh ahijieh in Jesu'n, 'Trinity' zang/mang diing a, a hillai un zong Jesu min bou a hing zangtouta mai uh ahimai thei hi. Tualeh, Trinity a min thum lah a khatbou azah mai u'khu 'Trinity' theisiemlouna a bang hi.

Achil/abultah a, athuzah uh "Jesu Khrist min in" ahisihleh "Mangpa Jesu min in" chizong ahimaithei hi. Trinity min kizahna khu anukhiazaw zong ahimaithei hi. Tualeh, Matt. 28:19-20- chilou ngal ah, Trinity zahna mundang ah i mu sih uhi. Tualeh, Mathiu Bu khu Jerusalem sietnua a gel ahijieh hiva chia ngai pawl zong aum uhi.

Bangteng hizong leh Jesu in Baptisma tangsah diingte kung a, athupieh khu Pastorte'n a zui ua, "Pa, Tapa leh Hagau siengthou min in ka hing Baptis hi" chi in a Baptis leng uhi. Peter in Baptisma tang diingte kung a, athugen khu "Bible ah i mu ua, Jesu Khrist min

theizing kawm in Baptisma tang un” chi in agen ahizaw hi. Tami umzie, khu Jesu Khrist gingta in ama angsung ah kitulut in ahinna kitanpi dingin Baptisma tang un china ahipen mai hi.

Dohnate

- 1). Sacrament bang china e?
- 2). Presbyterian Hattuum in Sacrament bangza i nei/pawm ei?
- 3). Roman Catholics leh Orthodix –te’n Sacrament bangza a nei uoi?
- 4). Koi Hattuumte e Sacrament neilou?
- 5). Jesun Baptisma a tanlai a sillamdang thum hing kilangte bangte e?
- 6). Baptisma tansah khu Jesu Khrist thupieh ahidan thumte hing gen in?
- 7). Koi mina Baptisma tan diing e?

.....

BUNG – 20

BAPTISMA TANSAH DAN LEH NAUPANG BAPTISMA THU

Thuchin:

“Tuanah khum zaan mama in Thong chingpa’n amau zawpi in amaliemnate uh a silsieng pieh a; tuachi in thakhat in ama leh a innkuonpate’n Baptisma a tangta uhi” (Nasepte 16:33).

1). Thumapui:

Hattuum masate hun akipat in Baptisma tansahdan chini um in akilang uhi. **Khatna ah**, Phum thaw thu ahileh Hattuum masate in gingthate Baptisma a tansah chieng un, Tui ah phumun Pa, Tapa leh Hagau Siengthou (Trinity)-min in’ thumvei a phum uhi. Tui a phum in Khrist shina, vui a, a umna leh a thawkianate etsahna ahi. Tami in Khristian Baptisma tangtu leh Khrist khu a kizop hi chi a ensah hi. **Anina ah**, Tuitap/Thethaw ahi. Tami, Baptisma tansahdan dangkhat ahileh, Tuitap ahisihleh, Tui thethaw khu Baptisma tangsahtu in ataangtu lutung ah ‘Trinity min’ (Pa, Tapa leh Hagau Sengthou)- in a the/tap thaw hi. Tam khu, ei Presbyterian Hattuumte bawldan ahi. Tam bawldan khun a etsah ahileh Khrist sisan khu khel ngaidamna diing in a hing luong hi chi etsahna ahi. Tuabanah, Khrist sisan in migiloute khelna a sawpsieng chi etsahna zong ahi. Ahin, ani-un kilamdanna seng aum sih uhi. Baptisma khu, ‘Phumthaw’ ahisihleh ‘Taphaw/Thetaw in’ tang leizong apoimaw pen khu a tangtu leh Khrist kizopna khu ahizaw hi.

Tualeh, Pentecost ni-a, Peter thugen apat in gingtha 3,000 (Sangthum)-vel ang um ua, a unpi-un Tui a phumthaw in Baptisma tangsienglou maithei ahi uh chi khu ‘Thethaw/Taphaw’ pawmte/zangte ngaidan ahi. Tuaziehin, Trinity min a thethaw in zong Baptisma tangsahva uh chi khu a ngaidan uh ahi.

2). Baptisma vanzahte:

A tansah na ua phuiteng ding khu- Pa, Tapa leh Hagau Siengthou min a tansah ding uh ahi (Matt.28:19)-chi i gen zouta uhi. Tualeh, Avanzah dingte khu ‘Tui’ ahiding ahi. Tuabanah, Annasem dingte khu Hattuum in a mi guottuum u’leh namdet/thaunu (ordained pastor)-ten atangsah ding uhi. Hinanlezong, Hattuum pawl khat in a thangbawl ua, a utut in a bawlthei mai ua, tuakhu Bible zilsahna toh a kikal hi.

3). Baptisma khu khatvei maimai tan diing ahi:

Mangpa khat, ginna khat, Baptisma khat, bangkim Pasian leh Pa khatbou a um hi (Eph. 4:5-6). Tuajiehin, baptisma khu damsung a khatvei tan diing ahi a, tulai gindan dihlou khenkhatte’n, amau pawldan a tangloute adem ua, Vangam kailou diing pou in agen uhi. Tuaban ah, a pawl ua lutte baptisma a tangtha sah zel uhi. Tam khu pawl suina lel ahinuom mama hi.

3.1). Koite’n Baptisma a tan diing e?

Baptisma tang ding thu ah zong ngaidan kibahlouna a umkia hi. Chi-ni (2)-in a khenthei hi. Tuate ahileh, Piching leh Naupang Baptisma pomte leh Piching Baptisma maimai pawm a Naupang Baptisma pomloute a hi uhi.

3.1.i). Piching Baptisma:

Jesu ginta masate khu mi piching ngen ahijieh un piching Baptisma tansah khu Hattuum masate chindan khat zong ana hi mawng uhi. Ahivang in, i Bible uah pichingte maimai baptisma tansah diing thu a umtuom dieh sih hi. Tualeh, pichingte maimai baptisma tansah ding ahi chi pawm pawl, adiehin Unau Baptist hattuumte leh a dangdangte ahi uhi. Amaute, pawmdan, in Baptsima khu atangpi in kum sawm-le-nga (15)-nuailamte baptisma atangsah sih uhi.

Tualeh, baptisma tang dingte khu atan masangun a pientha ding uh a hi chi zong a pawmdan uh ahi. Mi piching lou leh piengtha loute khu baptisma tansah lou ding ahiban uah, atanchieng ua zong Tui a phumlut vateh ding chi zong a pawmdan uh ahi. Tualeh, naupang baptisma leh thethaw atansah zong a pawm sih uhi.

3.1.ii). Naupang Baptistma tansah khu Judate bawldan zong ahi:

I sahkhuo biehdan u'leh zuidante u'khu atangpi in masanglai, Juda sahkhuo zui tute chindante ahitangpi uhi. Tam baptisma tungtang ah zong malai a Judate chindan leh bawldante zong zuithei tan in i zui uhi. Thuhun Lui ah, Abraham hun apat in nausente khu thuhun a teltheina ding un 'Teep' a tansah uhi. Thuhun Tha Hattuum in 'Teep' tangsahlou in Baptisma a tangsah zaw uhi. Ahivang in, Hattuum hing lien deudeu in innkuon a Baptisma tang ang um zelzel uhi.

4). Nausen/Naungeh Baptisma thu.

Naupang baptisma tangsah hattuum liente ahi uh leh, Roman Catholic, Orthodox, Protestant Hattuum a pawllien khenkhat-Anglican, Presbyterian, Lutheran, Methodist leh pawldang khengkhatte in nausen/naungeh baptisma a pom un atangsah uhi. Nausen, Baptisma tansah tungtaang ah ngaidan tamtah umnanleh ajehte igen diing uhi.

4.1). Thuhun Tha ah innkuon a Baptisma tang thum a um ua, Tuate khu:

Innkuon a Juda sakhuo a lutthate in zong a innkuon un Baptisma a tang uhi. Tam bawldan zui in Hattuum masate zong, innkuon ua Khristian a lut ut a umleh a innkuon un Baptisma ana tangsah uhi. Tualeh, i Bible uah innkuon a baptisma na tangte i gen ding uhi. Amaute:

4.1.i). Ludi leh a innkuonte (Nasepte 16:14-15), ah i mu ua, 4.1.ii). Phillippi Suongkul ngahpa leh a innkuonpi (Nasepete 16:33)-te leh 4.1.iii). Stephen leh a innkuonpiten, (I Kor. 1:16)-ah, baptisma anatan thu uh i mu uhi. Tamna, i gen innkuon thumte baptisma tangte lah ah naupangte zong a zau/tel ngei ding ua gintat ahi uhi. Khristian innkuon hing pung in innkuon a Baptisma tan khu Hattuum masate bawldan khat ang hita hi.

Tuabanah, Penticost ni a Peter thugen a piengtha mi sangthum (3000)-ten, baptistma a tanlai un zong naupang bangzat e khat jaungei ding ua gintat ahi uhi. Tuate zong baptisma a tansah laiun khatkhat a tui a ban phumlouin a thethaw pawl a baptisma tang pawl zong a um ngei ding ua hisap leh gintah ahi uhi. Tualeh, a tung a i gen uh innkuon thum baptisma tangte lah leh Pentecost ni-a

Peter thugen gingta a baptisma tangte lah ah zong naupangte a jau/ tel ngei ding uh chi khu i kingahna uh ahi.

5). Naupang Baptistma thu Thuhun Tha gendan in:

I gensa mabang un, i Bible uah Naupang/Nausen Baptisma tanle-tanlou diing thu atuong sih hi. Ahin, Jesu'n zong Naupangte akipahpidan leh angaidan i mu uhi (Mak. 10:14). Juda sahkhuo hunlaiin, a tate uh Teep a tansah u'leh Juda sahkhuo sang a lienzaw Khristian sahkhuo ah vang Juda mi Khristian hite in a tate uh Baptisma atangsah ngeingei diing uhi.

Tualeh, Baptisma khu Pasian thuchiem bang a hundam tanna diing a i ngai u'leh Naupang Baptisma khu a deihuoi sem diing hi. Baptist Theologian W. Robinson in "Baptisma hi Hattuum a lutna lampi ahi" achi hi. Tuajiehin, naupangte zong Hattuum a lut un mun anei ngei ding uhi. Reformed Church (Siemphat hattuum)- kichite in gingu nu-le-pa leh a tate uh Hattuum member a ngai in Baptisma a tangsah uhi. Thuhun Tha ah zong gingu innsung a pieng a, a pichin chieng bep ua baptisma tang i mu dieh sih uhi. Naupangte khu ang pichin leh deiteel theina ang nei hun bep ngahlou in, gingu hingal diing a nu-le-pa mawpuohna ahi uhi. Tualeh, Baptisma in "Hattuum mi hina chiemteena leh khiel kisiana etsahna leh Hagau Siengthou a kituitapna etsahna ahileh gingu tate Baptisma tansah khu sil hoivawt" ahiding hi.

6). Hattuum masate'n Nausen/naupang Baptisma atangsah uhi:

Awle, Kumzabi thum (3)-na laivel in innkuon leh Naungeh lai a, Baptisma a tansah u'khu Hattuumte chindan/zahdan ang hita hi. Tualeh, Naupang/nausen Baptisma tungtaang a Hattuum Pa (Church Fathers)-khen khatte thugente uh en va-ui:

6.i). Justin Martyr (100 AD)-leh Irenaus (14-200 AD)-te laigel akipat in Hattuum masaten zong naupangte Baptisma ana tangsah uh ahidan i mu hi.

6.2). Hippalytus (170-236 AD)- in pichingte mabang in naupangte zong Baptisma tansah ahi thu uh agen hi.

6.3). Origen (186-253AD), Augustine (354-430)-te'n zong naupang Baptisma tansah ahi thu ana gen uhi. Hattuum masate'n naupang ana Baptis leng jiech un, eite'n zong dan a nei in, i Baptist uhi.

Tualeh, naupangte baptisma i tansah chieng un i pong tansah sih ua, ang piching ua sie-le-pha ang thei masang ua, a nu-le-pa amaw, a enkawltu penpen in Pasian deibang a, a etkawl ding chi a thuchiemna a nei zoutah chieng un baptisma kitang sah pan hi. Nu-le-pate'n, a tate uh Khrist leh Pasian kung a, a pui in a apkhie uh china ahi. Mangpa thununna leh zilsahna a khanglien sah diing in a kichiem ua, amau zong a kilan ngal uh chi a ensah hi. Tam khu, Nu-le-pate bawl lawm mawng zong ahi. Tuabanah, naupangte khu ang pichin ua sielehpha ang thei chieng un, hattuom in pichingin i lalut ua, tuami nua a khelna a bawl u'leh ama uh mawpuoh ahita uh china ahi.

7). Baptisma phattuomnate:

Baptisma khu hundamna i tanna diing ua i tan diing uh ahisih a, hundam taten hundamna itan ziehua itan ding uh ahi. Pienthana etsahna, namdetna, leh puongzahna chiemtenate ahi. Mangpa Jesu ngel in a mite chiemtena (seal)-diing leh Hagau sil poimaw a tanna uh hi diing in ana siem a, ana namdet ahi. A umzie khu Sepai training zoute'n sepai tahtah ahitheina diing ua, kichiemna (Kasam/gawsam)-anei bang uh ahi.

8). A gielpa Thukup:

Awle, gentah sih leh zong ken zong naupang ni baptisma ka tang asah tuoh gel uhi. Vangsiet umtahn ang muolliem san ua, ashi ni-un a progam uah baptisma katan sah thu a kigel gel uhi. Tueleh, tangsah lou-in shi le uh anu-le-pate ding un lungsim nop louna a nei ding uhi. Nu-le-pate bang a, Pasian gam luo ding leh satan nei ngei ding ihisapna ua itansah uh chi lei zong i chi khiel sih ding uhi.

Dohnate:

- 1). Baptisma tansahdan chibangza a um ei?
- 2). Baptisma bangzavei tan diing e?
- 3). Piching Baptisma bang china e?
- 4). Judaten baptisma lim-le-guong ding anabawldante uh gen in?
- 5). Hattuom Pa (Church Fathers)-khenkhatten Naupang/nausen Baptisma anatansah dan uh gelte koikoi e?:
- 6). Baptisma phattuomna bang e?

.....

BUNG -21

MANGPA NITAH ANN TOH KISAI A NGAIDAN LEH GENDAN TUOMTUOMTE

Thuchiin ding:

“Tuachia ann anehlai un Jesu’n annpheng a la a, guoljawl in a phalsuo a, a nuazuite pie in “Tam ka tahsa ahi, la unlen ne un” achi hi Mt. 26:26.

1). Thumapui.

Mangpa Nitah Ann (Holy Communion)-khu hattuumte silbawl/zah poimaw khat ahi. Masanglai a pat tunitan in, hattuum hindan tungdingtu leh hattuumte Pasian biehma poimawtah ahi. “Mangpa Nitah Ann” khu Mangpa shina thei zingna ding a Annpheng leh Grape tui nekhawm leh dawnkhawmna ahi”

2). Ang umna jieh leh aphutkhetu:

Mangpa Jesu khu a shidiing kuon in anuazuite toh Peikan kut annkuong a im ua, ann aneh lai un Mangpa Nitah Ann (Sacrament)-ang siemkheta hi. Tami, Sacrament tungtaang a thupiehte khu Khantanhoi bute leh Korinth laihahte a i mu uhi (Matt. 26:26-29; Mak. 14:22-25; Luk. 22:17-20; I Kor. 11:23-36). Tami, Bible tangte apat in Mangpa Nitah Ann khu Mangpa Jesu siemkhiet ahingeina chi akilang hi. “Nang theizingna diing un tam khu bawl zing leng un:” a chibang ngei in, hatuom masate a kipat tunitan in i bawlzom zing uhi.

2.1). Mangpa Nitah Ann ang pienkhietna jieh ni a um hi:

2.1.i). Khrist toh annkuong im a kipawlkhawmna ahi. Jesu leitung a leenlai in a nuazuite toh tami Nitah ann a impi a, tuni dawngin tami

annkuong toh a pawl zel a, athawkianua in zong annpheng leh Grape (Leengga)- tui in apawl kia hi.

2.1.ii). Jerusalem Pindan tungnung a Jesu thugen leh silbawl khu (I Kor. 11:23-26; Mak. 14:22-25; Matt. 26:26-29; I Kor. 22:1-20). Annpheng leh Grapetui ala a, a thuoh diing etsahna in a zang hi. Tamna a annkuong a im u'khu Peikankut chi in Mak in ang hil hi. Hundang a Peikankut ann a neh leng u'khu tuahun in umzie neitah in a impi hi.

3). Hattuum pawl tuomtuomte pawmdan/ngaidan:

Awle, sildang bangma in Mangpa Nitah Ann tungtang ah zong ngaidan tuomtuom a um a tuate i suiding uhi.

3.i). Roman Catholic hattuumte Ngaidan:

Mangpa nitah ann (Annpheng leh Grapetui)-khu Mangpa kung a lat a, Siempi in phuiteng a samzou chieng in, Annpheng leh Grapetui hitalou in, Mangpa Tahsa-le-sisan tahtah ang suohta hi a chi uhi. Tamkhu Transubstantiation chi ahi..

3.ii). Lutheran Hattuum Ngaidan:

Pastor/Siempi in phuiteng a samzounua in zong Annpheng leh Grapetui ma ahinalai/veve ua, ahin, Mangpa Tahsa-le-sisan khu Annpheng leh Grape tui ah ang tel a, ang kizopta uhi Tuakhu, Consubstantiation a kichi hi. Tuami khun Khrist Tahsa leh sisan ah silbawltheina ang neita hi. Gentena dingin, sia (iron)-mei a i hal/em leh hingsa in ang sanpimpem a, ahivang in sia ahina a beituom sih hi. Tuabangma in, Khrist sisan in ang kizopi/pawlpi jieh in thahat in sil a bawlthei hi a chi uhi.

3.iii). John Calvin Ngaidan:

Annpheng leh Grapetui ah Khrist khu Hagau in ang jau/tel hi. Hagau lam guoljawlna leh kipawlna siengthou in ang zopta hi. Khrist tahsah-le-sisan etsahna ahi a, etsahna maimai vang ahisih a, Mangpa khu Hagau in ang tel hi. Tam khu ei Presbyteriante ngaidan zong ahi.

3.iv). Zwingli Ngaidan:

Khrist thuohna leh tatna i theizingna diing a i bawl uh ahi. Tuami, theizingna khu i Hagau ua diing in ann ahi. Annpheng leh Grapetui khu tuami chiemtena a muthei a i neh leh dawn diing uh ahi a chi hi.

4). Mangpa Nitah Ann toh kisai a gendan tuomtuomte:

4.i). Mangpa Nitah ann (I Kor. 11:20).

Mangpa Nitah Ann chi ahi chieng in, theizingna lam a uong gen hi. Khrist in ei-a dia a sepsa leh ang seppieh nahlai diingte ang theisah hi.

4.ii). Kipawlna siengthou (Holy Communion):

Tualeh, kipawlna siengthou chi khu (I Kor.10:16)-ah i mu uhi. Hattuumte'n, a hingzing a Mangpa uh toh kipawlna siengthou in a zang ua, tamnah mizousie/gingtu zousie tami kipawlna ah a jau uhi.

4.iii). Kipahthu genna (Eucharist) ahi.

Tam khu Thuhun Tha hun in alang seng sih hi. Ahin, kumzabi Nina ah Ignatian in ang zang masa pen a, masanglai in Hattuumte'n a zang uhi. Khrist nnasep jiehte, Thawkiana leh guoljawlna jiehte, Mangpa umpina jiehte, Pasian in neh-le-dawn diing ang pieh jiehte a kipahthu genna lam a kawh hi.

4.iv). Kithoina (Sacrifice):

Tam khu Leitung khelna a diing a Khrist nnasep gingtu in a puonzahna leh Khrist a diing a gingtu kilatna/kipumpiehna lam a ensah hi. Tueleh, Mangpa Nitah Ann genchetna diing in hamkam kiching aum thei tahtah sih diing hi. Ngaidan khat ah gingtute kung a hagau silpieh tanna diing a vanzah khat ahi a, alelam ah ahileh, gingtu in Pasian itna/lungsietna atanna vanzah zong ahitheh hi. Tueleh, tam Sacrament i neh chieng un loupitah a Khrist hing peikiana diing khu i ensah leng uhi (Mak. 14:25; I Kor.11:26), chi zong i manghil sih ding uhi.

5). Mangpa nitah ann vanzahte'n a etsahte uh:

5.i). Annpheng:

Anpheng in Hagau lam ann, neh diing mawng ahi chi a ensah hi. Koizong, tam annpheng nete khu ahingzing diing uhi. Jesun “Kei Van a hing kipan annpheng ka hi” achi hi.

5.ii). Grapetui:

Grapetui dawn diing dihtah khu ahi. “A dawntapou in kumtawn hinna a nei diing uhi.” Leitung damna diing a Kalvari akipat Jesu tahsa a kipat a sisan leh hinna tui hing luong khu a ensah ahi.

6). Ahawm diing hun leh dante:

Hattuumte sih-le-taang a, Mangpa Nitah ann hawm diing in Pastorte guot a hi ua, amaute kithuohpi diing in Hattuum Upate guot ahi uhi. Mangpa Jesu in Mipi sangnga (5000)- a vahlai a, anuazuite kung ah mipite kung a hawm diing a apieh bang in, eite'n zong mipite kungah atouna mun uh izuon un i peleng uhi. Hattuum khenkhatte'n ahi kia leh pen maitam phung a vapeite kungah bou apie uhi.

Tualeh, Mangpa Nitah ann lui hun thu ah Thuhun Tha in puihuoina chiengtah a siem sih hi. Nasepte 2:7 in agendan in, Pasianni chin in a hawm uhi'n a gen hi. Tualeh, Nasepte 2:46 ah ahileh nichin a hawm uh hi'n a ngaithei kia hi. Kumzabi nina, lamah khun ‘Didakhe’ bu in agen dan in, “Mangpa Ni’ chin in ahawm uh hi'n a gen kia hi. A hun binei vang a hamsa a, i Dan bu un kum khat sung a a tawmpen thumvei beh hawm diing in a gen hi. Ahivangin, tuaza chau hawmding amaw ahisih leh bieltot ding china vang ahisih hi.

7). Mangpa Nitah Ann hawmdan/bawldan tuomtuomte:

7.i). Nasemtu, Pastor in nuazuite (Upate)-khu Maitam kung ah a han a, adinguolsah a, akung uah Annpheng leh Grapetui a pie a, tuazou in mipite kung ah ahawmsah hi. Tami'n a etsah ahileh - Khrist khu eite kithoina diing in ama-le-ama ang kipie a, ama ngel khu midangte a diing in akipie chi a ensah hi.

7.2). Nasemtu, Pastor khu Maitam bul a ding in mite khu han in ana pie hi. Tami'n a etsah ahileh - Jesu nei diing in a kunglam i zot uh angai hi chi a ensah hi (Johan. 6:37). Jesu Khrist in “Koizong ka kung a hing peitapou ka nawtkhe sihvang” a chi hi (Johan. 6:7).

8). Mangpa Nitah ann i nehna ziehte uh:

8..i). Mangpa shina jieh a hundam i hi uh i theizingna diing un (Luk. 22:19). 8.ii). Jesu Khrist kithoina Pasian hing pieh ahi (I Johan. 1:3). 8.iii). Jesu Khrist khu i gintat ua i pom jieh uh (Late 116:12). 8 .iv). A shina khu i hundamna diing uh ahijieh in (Heb. 10:10; Eph. 2:4)- chite ahi uhi.

9). Mangpa Nitah ann nedingte thei diingte:

9.i). A khelnate uh a kisia diing uhi (IKor. 11:28; Joel 2:12). 9..ii). Hinna tha a hin diing uh ahi (Rom 6:5). 9.iii). Khrist amau ua dia akipiehna khu apoimawtahzet uhi chi a kithei diing uh (Mak. 10:45; Johan 10:11). 9.iv). Kipahtah a Khrist shina a theizing ding uhi (Rom 5:8; Kih. 1:5). 9.v). Mizousie a it/lungsiet diing hi (Matt. 5:44; I Pet. 1:22)- chite leh a dangdangte ziehte ahi uhi.

10). Mangpa Nitah ann phattuomnate:

Mangpa Nitah Ann (Sacrament) phattuomna leh lawhna khu a vanzah ahei, ahisihleh a semtu ah a kinga/um sih hi. Ginna a im a netu in, Hagau Siengthou zieh in guoljawlna atan zieh in aphatuom hi. I tahsa in Annpheng leh Grapetui a hatpi leh hoipi mabang in, i hagau lam hinkhuo uh suhhatnang leh suhhoina diing in Mangpa Nitah Ann khu aphatuom hi. Gingtu hinkhuo sudettu, kipumkhatsahtu leh Khrist lam a kainaitu zong ahi.

Dohnate:

- 1). Mangpa Nitah Ann koi siemkhiet e? A siemkhietna mun hei lai e?
- 2). Mangpa Nitah Ann in a etsah chini hing gen in?.
- 3). Roman Catholics te'n Mangpa Nitaah Ann bangchibang in agen uoi?
- 4). Lutheran Hattuumte'n Mangpa Nitaah Ann agen dan uh hing gen in?.
- 5). Ei Presbyterian Hattuum (John Calvin)- in Mangpa Nitaah Ann bangchiin agen ei?
- 6). Mangpa Nitaah Ann i nehna ziehte bangbang e?
- 7). Mangpa Nitah ann phattuomna bang e?

.....

BUNG -22

GINGTUTE BAWL DIINGTE

Thuchin ding:

*Tualeh ama khu kidapguh in munsip lah ah thu angen tuuh hi”
(Luk. 5:16).*

1). Thumapui.

Awle, tuin gingu khat hina dawl a i sep ding u’leh bawl ding ua kul-le-poimaw khi khatte i gen ding uhi.

2). Thumna neizing ding ahi

Thumna khu ei gingu a dingin hagu lam a i nahna uh ahi. Thumna khu i Mangpa Jesu tam leitung a aum lai in nasatahin a thum zing hi. “Tualeh ama khu kidapguh in munsip lah ah thu angen tuuh hi” (Luk. 5:16). Thumna khu Pasion toh kipawlna leh i kul-le-poimawte a kung a tutna leh ngetna ahi. Tualeh mihing leh Pasion kihouna zong ahi. Thumna khu Sapham kamteng li-in a kikhen uhi. Tami khu Sapham in ‘**ACTS**’ a kichi hi. Aumzie ahileh Pasion kung a, i thum chiengun tamte i thei masa ding uhi.

A = Adoration = Phatna leh pahtawina, lungsim tahtah a Pasion phat, pahtawi leh biech ding ahi (Laate 95:6).

C = Confession = Gitlounate thuphatawina, gitlouna zousie kisia in (Laate 32:5).

T = Thanks givng = Kipahthu genna ahi a, Kipahthu Pasion kung a genzing khu i bat uh ahi (Phil. 4:60).

S = Supplication = Ngetna leh i deite a kung a tutna ahi (II Tim. 2:1).

Tualeh, gingu thumna ngaisahloute khu Hagau lam ah ahat ngaisih diing uhi. Gamdai gamgaw a singkung pou tui kitaploute khu a khantheilou bang un, gingu thum ngailou khu a khangthei sih diing ua zong a hat theisih diing uhi. Miten, Billy Graham adam lai a, a hatna thuguh a dawh uh leh: i). Thumna, ii). Thumna leh iii). Thumna ma a chi hi. A mamai a hisih a, khawvel a Pasian mizah leh lawchingte thuguh khu Thumna ma a hi chiet uhi. Thumna i nei chiengun, Pasian toh kihou i hiban uah, a dieh a en .Pasian kung a i kul-le-poimawte genna ahi. Martin Lutherin, hattuom sung a, Reformation a bawllai in, “Tunin ka buoita luo dahkal thum (3)-mimai ka thum ding” a chi hi. A buoilou chiengin dahkal bangzat a thum diei?

3). Bible sim zing ding ahi.

Bung masalam ah, Bible a poimaw dan leh nnasepthei dante i genta ua, tuin ahileh i gen tam sih ding uhi. Tualeh, Bible i simchieng uh Pasianin i kung ua thu ang gen china ahi. Masanglai hileh tu a, Pasian mizahte khu atangpi un, Bible sim taima leh ngainate ahi uhi. Eiten Bible sawm guh-le-guh (66), i neitah ziehun, Pasian in tami Bible sung a thute in ang houpi in pawl zing hi. Tulai, hagau mi kichi khien khatte in, Bible sim a Pasian aw zahsangin amau ngaidante khu Pasian Aw bangin a gen ua, tambang a peite khu a peisuolthei uhi. I Bible ma ua i kibulphu zing ding uh ahi. Tua hileh, tahsa-le-hagau ah i khanthei ding uhi.

4). Mangpa Ni nit siengthou.

Nipini/Pasianni/Mangpani (Sunday/The Lord’s day)-khu Hattuomte a dia Ni poimaw tah ahi. Bible geltute in tami Ni khu ‘Nisagi ni masa pen’ achi uhi. Sunday tan ahina jiehu i Bible uah chiengtah in imu uhi. Paul leh Tras khuo a Khristiante in tami Ni sagi nimasa pen ah kikhawm in Tanghoute a phalsuo uhi (Nasepte 20:7). Paul in Korinth Hattuomte khu Mangpa Ni (Pasian ni) ni-a kikhawm a silpiehte lakhawm diing in a ngen hi (I Kor. 16:12).

I Mangpa Jesu thawkiani ahijieh in gingu’ n kipawlkhawm a ann pheng phalsuo a, thumkhawmna diing leh kisuhhatna diing in i zang leng uhi. Tualeh, ‘Sabbath’ sang a ‘Sunday’ zah ahi thu khu Hattuom Pate (Barnaba, Ignatist, Justin, Martar, Ireniast, Tertulian,

Origen, Cyprian)-te laigelte ah chiengtah in a tahlang uhi. Kihilna gieltu Johan ngel in zong, Jesu kihilna a muna ni ahi (Kih.1:10). Tuaziehin ei, gingtute in tami ni khu hoitah a i nit a Pasian toh kipawlina ni a i zah diing uh ahi.

5). Biehna nei diing a kimutuo zing diing ahi.

Khristiante, mawpuohna leh hagau lam khanletna diing a sil poimaw khat khu Biehinn kai ahi. Gingtu hat-le-hatlouna khat zong khu Biehinn kai taima leh taimatlou ah a a kitheithei hi. Hebraite 10:25-ah “Khenkhat chindan bang hilou in a kikhop uh tawpsah sih va-ui” chi i mu hi. I dam liei leh kikhop/Biehinn kai pibawllel Hattuum hat leh pichinlam manaw zing i himai diing hi.

6). Silpieh:

Khristian mawpuohna khat ahikia leh Pasian guolzawlina i mu bangbang a sawm-a-khat leh silpieh tuomtuomte Pasian kung a pieh ding ahi. Luk. 6:38-ah “Pie in tuachi in pieh in umvateh” chi imu uhi. I Bible i et u’leh Pasian mizousie kung a, a phut khu Sawm-a-khat ahi (Malaki 3:1-10). I Haitha masa penpente zong i pe diing uhi (Exo. 23:19). Mangpa masang ah koima khutguoh in i kilah diing ahisih (Exo. 16:16) chite i mu uhi.

Pasian kung a sil pie utlou khu Pasian suomna leh guhtatna ahi. Pasian guoljawlina hing lut diingte dalna zong ahi chi in a gen hi (Malaki 3:10-11). Pasian in A tapa neisun ang pieh ziehin eite’n zong i neizousiete itlou kei in i pediing uhi. Tulai a sildahuoi khat ahileh Pasian thu-awi leh sakhuomi dihtah hi a kingai a, Sawm-a-khat leh silpiehte ngaisih chia zilsahna khu ahi hi. Tambang khu i Bible uh toh kikalna leh pawldihlou ahina kilahna ahimai hi. John Wesley in, “Mi a pientha leh a sumbawm zong a pientha ding ahi” a chi hi.

7). Manggam nasepna

Gingtu zousie leh Hattuumte nnapi pen khu Missionary nnasep ahi. Tam khu Pasian lungsim deidan ahi. Pasian in Missionary nnasep a ngaikhoh mama a, tuachi’n A tapa neisun ahingsawl a, tualeh Jesu’n eite a hing sawlsawn hi (Matt. 28:18-19). Missionary nasepna khu lam thum in i sem thei uhi: Tuate:

7.1)- Eima vakuon diing, 7.2). Silpieh a sep diing leh 7.3). Thumna/ Thungetna toh sep ding chite ahi uhi. Tamteng lah a khat teitei a gingtute i pan diing uh ahi. Hattuum Missionary nnasep ngaisahloute khu Tuipi shi/Dead sea toh gente ahi uhi. Tami Tuipi khu hinna neilou kei in a pumvei depdup toh akibang hi. Ahin, Pasian thupieh bang a Missionary nna sem dia hattuumte'n pan i lah chieng un hagau guoljawlna tamtah i dong diing ua, Galili Tuipi bang in hinna leh siengthouna in i dim diing uhi.

8). Jesu hing pei ding lam en tah a ngah ding ahi.

Ei gingtute pen, Mangpa Jesu hingpei/kilah hun ngah a gin-umtah a hing diing a hatte ihi uhi. Pasian in ama diing a shingal pai diing in ang han sih a, ama diing a gin-umtah a hingzing ngap a, ama lam-enzing ding in ang dei hi. Ama a diing a hin khu Khristian hinkhuo ama deibang leh Khantanhoi toh kituohsah diing china ahi. Tam khu, Leitung leh Pasian in gingtute hinkhuo a, a lam-etzing ahi. William Barclay in “Pasian gam kehletna hoi pen khu Khristian hinkhuo hoi nei ahi” a chi khu agen dih mama hi.

Dohnate:

- 1). Thumna Sapham a kamteng/sawnglite bangbang e?.
- 2). Bang dia Mangpa ni (Sunday) i nit diing uh e?
- 3). Bang dia Pasian kung a silpieh i pieh diing uh e?
- 4). Bang dia Missionary nna i sep diing uh e?
- 5). Jesu hing peikia hun bangchi ngah diing e?

.....

BUNG – 23

MISIENGTHOUTE LAHTOUNA (RAPTURE), HUN HAMSA (TRIBULATION) JESU NIVEI HINGPEINA (SECOND COMING) LEH KUMSANG VAIHAWMNA THUTE

Thuchin Ding:

*“Ngaiun, thuguh kiphuol ka hing hilding hi, i unpi un i imu sieng sih dingua, hinanleh i unpi un suhlandang in i um sieng ding uhi.”
(I Kor. 15:51).*

1). Thumapui:

I Thugin uh tawpna khu Mangpa Jesu hing peikia diing thu ahi. Tualeh, ang peikiana diing khu nivei ahidiing hi. Amasa khu misiengthoute ladiing in ahing pei ding a, ani-veina khu migiloute tung a vaihawm pieh diing in ahidiing hi.

Ahin, tam atung a thute *Rapture, Second Coming* leh Kumsang vaihawm ding thute ahi uh leh hattuom din chil a kipat tunidawng in mite lung buoina leh ngaidan/pawmdan tamtah a umziehin, i suiding uhi. Mangpa Jesu Khrist hing pei ding thu leh tamna i gente uh khu Kihilna bu sung a alaimu/thugil pen a chithe i ding uhi. Tamte khu Bible in ‘Thu Guh Kiphuol’ a chi hi. Tam ‘thuguh kiphuol’ chi hamkam Greek hamin, *‘mysterion’* ahi a, Saphamin, *‘mystery’* chi ahi. Tualeh, Thuhuntha ah 27-vei a kigiel hi. Sawltah Paulin, “Ngaiun, thuguh kiphuol ka hing hil ding hi” (I Kor. 15:51)-ah a chi hi. Aumzie khu ‘sil kiphuol’ ahi a, sil kiphuolte khu atangpiin, Pasian kumtawn lemguot, a huntah a hingtung leh puonzah a umte ahi uhi. Tualeh, mitamtahte ngaidan in Rapture leh Second Coming-te khu a kibang leh khat vei a tungkhawm ding bangin ngaidan a nei ua, ahin ahiloudante i suiding uhi.

2). Misiengthoute lahtouna (Rapture):

Saphama a ‘rapture’ chi khu Latin ham a, ‘rapere’ chi a kipat a kiletkhie ahi. Rapture pen Jesu khu tam leitung a hattuumte (Ama gingtute), a mousiengthoute hing pui ding a huikhuo a, ang peina ding khu rapture ahi. .Mangpa hing pei ding dan, Sawltah Paul in “Mangpa khu Pasian pengkul aw toh Van a kipat in hing kumsuhva” (I Thes. 4:16)-chi’n a agen hi.

Rapture hun chieng in Mangpa khu leitung ah a hing kum sih ding a, huikhuo ah, a misiengthoute toh kituoh ding in suhlam dang in i um ding uhi. Sawltah Paulin chiengtahin a gen a, “... kinepna neilou midangte banga, na lungkhamlouna ding un, i mute tungtang na theilou uh ka deisih hi.... Eite Mangpa hing pei donga, dam a na um nalaiten i musate/mishisate i makhel sih ding uhi. Aziehpen, Mangpa ngei khu kikou aw toh, tualeh pengkul ging toh Van a kipat hing kumsuh ding hi.

Tualeh, rapture chiengin gingtu Khrist a, shisate, Abel a kipat a tuahun tan (rapture)-tan a shimasate athou masa ding ua, tualeh gingtu ahing nalaite suhdang lam a um in, huikhuo ah lahtouin i um ding uhi. Tuazou chiengin ei hing a na umnalaite huikhuo ah, Mangpa tuoh dingin a mau toh meipi lah ah lahtouin i um ding ua, tuachi’n kumtawn in, Mangpa kung ah i umta ding hi. (I Thess. 4:13-17).

Ahin, silda umtah khat ahileh, ginglou/pientha lou a shite khu rapture chieng in kaithou in a um sih ding ua, Mangpa hing pei kia chieng (Second Coming)- chieng in siemlou tang ding un kaithou in a um giep ding ua, tuachin siemmaw tangin kumtawn gotmun lam zuonin a umta ding uhi.

2.1). Rapture bang chi chieng a tung ding e?

Tualeh, rapture khu bang chieng a hingtung ding e chi a kitheithei sih a, thakhat thu a i theilou kal ua hing tungding ahi a, hun khat pou pou a tung thei zing ahi (Titus 2:13; 1 Thess. 4:13-18; 1 Kor. 15:50-54). Mangpa Jesun zong ahunding ahileh, Tapa leh Vansawltachte’n zong a theisih ua, Pa lou ngalin a theisih a chi hi. Tualeh, ahun thu ah ‘Guta’ bang a hing pei diing (I Thes. 5:2)-ahidan a gen hi. Guta bang

in ang pei diing a china thu khu kiging zing a um apoimawdan agen utna jiehi. Nungah sawm mouniepa ngahte thu, suoh gin-um leh gin-umlou thute in Jesu hing pei diing thu toh kisai a kisahkhol leh kigingsa a um zing apoimawdan ang hil hi.

Tualeh, rapture zou chieng in hun hamsa (Tribulation)- kum sagi sung a um ding a, tuazou chiengin Jesu hing pei kiana (Second Coming)- ang um kia ding hi chi khu i gin dan uh ahiban ah Bible in ang hildan zong ahi.

3). Tribulation umding dan:

Kihilna bu a gingtute lah touna (rapture)- nua ah, hun hamsa (Tribulation)- tunding dan gindan chithum in a khen uhi. Tuata i en ding uhi:

3.i). Pre-tribulation rapture:

Tami umzie ahileh hun hamsa (tribulation) hingtun masangin, misiengthoute lahtouna (rapture)-a um masa ding chi ngaidan nei pawl aum `uhi. Tami ngaidan khu eite ngaidan leh pomdan uh zong ahitangpi hi.

3.ii). Post-tribulation rapture:

Tami umzie ahileh leh hun hamsa (tribulation) hingtung masa ding a, tami hun hamsa khu ei gingtute in zong i paltang/phutou ding uhi. Ahin, tami hun hamsa lah ah zong Pasian in ang kembit ding hi a chi uhi. Tambang, hun hamsa lah ah zong gingtute khu dettah leh hangsantahin i ding det ding uh chi'n ngaidan anei uhi, Tambang pawlte ngaidan in, Kihilna 13:7, 10-te ah, a tung a ngaidan bang a, misiengthoute lahmang sieng hita leh, tam bung sungte a 'misiengthou' a chite khu koite ata diei le? chi'n panmun a khaw uhi.

3.iii). Mid-tribulation rapture:

Mi khen khatte khun misiengthoute lahtou hun khu hun hamsa (tribulation) laikim tah a hing um ding in ngaidan a nei uhi. I gensa bangin eite ngaidan leh pomdan khu amasa pen ahi chi khu i manghil sih ding uhi.

4). Second Coming (Mangpa hing pei niveina/kiana):

Tami ahileh, Khrist leitung a, a hing pei kiana tahtah kum sang Manggam tungding ding leh vaihawm ding a ang peina niveina/kiana hun ahiding hi. Tuachin, vansawltah zousie leh mi siengthou rapture a lahtou a umte zousie toh ahing pei kiana ding hun ahiding hi. Tam khu, Khrist kihilna/kilahna nukhia pen zong ahiding ziehin, ‘Kihilna bukim’ (Final Revelation) a kichi hi.

Tuabanah, Second Coming chiengin Mangpa Jesu khu huikhuo mai hilouin, leitung Olive muol khu a kengin ang tuon ding hi (Zak 14:4). Tuachieng in, leitung a mi siengthoute leh Nam telte khu Gamsahang bawlgentheina lah a kipan in a hundam ding hi (Kihilna 19:14).

5). Rapture leh Second Coming kibahlou dan.

A tomkim in gentalei, ‘Rapture’ leh ‘Second Coming’ kibahlouna ahi uh leh- rapture ahileh Mangpa Jesu a misiengthoute lading a, ahing peina (coming for the saints) ahi a; second coming ahileh a misiengthoute toh vaihawm ding a, ang peikiana (coming with the saints) ahiding hi. Tualeh, rapture misiengthoute lahtou ni ding hun theichet hisih nan leh, loupitah a hingpei kia ni (second coming), ahileh rapture zou/nua kum sagi zou chieng in ahiding a, Daniel hapta nua ahiding khu guolnei/zawlnei Daniel in ana gen zouta hi (Dan.9:27).

Tualeh, Rapture leh Second Coming pen a kibang/hunkhat hitaleh, gingtuten kum 7-vaihawmna chizathuoi atuoh uh angai ding hi (1 Thess. 5:9; Kihilna 3:10). Ahin, Pasian in amite genthei ding aphalsih a tuazieh in gentheina athuoh masang un ala tou sieng ding hi.

Dohnate:

- 1). Sawltah Paulin thuguh a chi khu bang e?
- 2). Misiengthoute lahtouna (rapture) umding dan gen in?
- 3). Hun hamsa (Tribulation)- umding dan gindan chithum gen in?
- 4). Second Coming (Mangpa hing pei niveina)- umding dan gen in?
- 5). Rapture leh Second Comingte kibahlounate gen in?

.....

BUNG-24

THAWKIANA, THUKHENNA, KUMSANG VAIHAWMNA THU

Thuchin ding:

*“Kei Thawkiana leh Hinna ka hi, koi zong kei hing gingta khu
shinanlezung a hing zing diing” (Johan 5:28).*

1). Thumapui;

Awle, tami bung a i gending uh thute khu atung a toh kizopmat ahi uhi. Tualeh, a tung a i gen bangun nitawpni chieng a siltung dingte atangpi in i sui ding uhi. Tamte khu silhamsa leh thei chet hamsatah ahi ua, ahin, a chiengthei pen ding in i suiding uhi.

2). Thawkiana thu:

Mishite adiehin gingtu sisate kaithaw in umva-uh. Tualeh, Paul hunlai apat in mi khenkhat in thawkiana khu gingta louin, ‘tuhun a tung ahita’ achi uhi (II Tim.2:18). Zilsahna dihloou khen khatten, mishite thawkiana khu Khrist gintat jieh a hinkhuo tha nei na ahi a chi uhi. Tuabanah, Thuhun Tha a kilah/mubangin in a pomthei sih uhi. Gingtu a shi leh a hagau khu Pasian kung ah apei a, amau diing in Jesu ang peikia ahitamai a, tahsa Lei sung a phumsa leh ganhing in a nehmanng siengsate khu a thawkia diing dan a theizoulou jieh un a gingta thei sih uhi. Tuabang mite kung a Jesu dawnna khu: “Khum in Jesu’n a kung uah, theikhiel ma u chie, Laisiengthou thu leh Pasian silbawltheina na theilou zieh un hizuh a” achi hi (Matt.22:29). Eite’n a umzie/angaina i theilou zousie uh zong khu Pasian in a bawl thei ahi chi i mangngillou diing uh ahi.

Tualeh, mishi thawkiana thu khu Jesu thawkiana thu ah akinga hi. Mangpa Jesu thawkiana thu khu genmang sawm a, thudihlou chia genna a umzing a, nuazuite'n a gumang uh chite bang, a nuazuite'n amukhiel uh hiva chite bang, thu kigen maimai hiva chite leh a shibang a kilang, a shitahtahlou ahi chibang, zuoule-nal thu tampi Mangpa Jesu thawkialai in ana um hi. Ahivangin, Jesu thawkiana adihna khu koiman a nielzou sih ua, nuazuite khu adihna mit a mutute ahi uhi. Jesu thawkiana thugin khu Leitung a Hattuum zousie thugin ahi a, 'Tahsa thawkiana ka gingta' chi khu i pomdan uh ahi. Gingtute tahsa thawkiana khu bangchibang hi diing ahei chi pen mi tamtahte in na sui in na ngaituo uhi. I theithe diing ua um khu ahileh Khrist thawkiana tahsa bang ahingei diing chi khu i gintat dan uh ahi.

Tualeh, a tomkimin, Tahsa thawkiana i genlai un bangpen e a thoukia diing? I gensa bang in a hasa mama a, i tahsa muotthei pen ahisih diing chi a chieng mama hi. Suhlamdang tahsa nei in i thoukia diing uhi. Ajiehpén, tahsa leh sisan in vangam a luo thei sih diing hi chi i mu uhi. Thawkiana thu khu haichi toh gente thei ahi. Haichi i tu pen khu ang pou chieng in ang lamdangta a, tua toh kibang diing ahi.

3). Thu khenna a um diing hi.

Thuhun Tha in thu khenna a um ngei diing chi ang hil hi. Tam thu khenna a siemmaw tang diingte dinmun khu a huoise diing hi. Lai-sien-thou in adinmun uh sietding dan tambangin gen hi - "Leisiet pumpi nei uhenlen, ahin na uh taan u'leh amau a diing in bang a phatuom diei"? Juda Iskariot zong khu pienda konleh ama diing in hoizawva achi hi. Tamte in vaihawmna hing tung diing a zauhuoidan ensahin agen hi. Khantanhoi thumte in vaihawmna khu leitung tawp chieng a um diing in agen uhi..

Gingloute leh migiloute khu siemmaw tansah in a um diing uhi. Ajiehpén, a damsung ua a hinkhuo mandan bangtah ua vaihawm pieh a um diing ahi uhi chi khu Lai-sien-thou in ang hil dan ahi. Mizousie tung a thu khenna um diing a, i gintat bang un mizousie thawkiana zong a um diing hi. Jesu'n Martha kung ah "Kei thawkiana leh Hinna ka hi, koi zong kei hing gingta khu shinanlezong a hing zing diing" (Johan 5:28)-chi'n agen hi. Tualeh, Sil gilou bawlte zong siemlou tang in a thoukia diing uhi" (Johan 5:29)-ah imu uhi.

4). Kumsang vaihawm hun.

I gensa bangin, Kumsang vaihawmna thu khu masanglai a kipat, tuni dawng a mite buoipi leh ngaidan zong a kibang sih hi. Hei pen ngaidan ah i um uoi chi khu eima-le- eima i ki-en ding uhi. Tuате khu:

4.i). Kum sang vaihawm masangin Mangpa Jesu ahing pei ding hi (Pre-Millenium). 4.ii). Kum sang vaihawmnua ah Mangpa Jesu ahing pei ding hi (Post-Millenium). 4.iii). Kum sang vaihawmna a um sih ding hi (A-Millenium). 4.iv). Kum sang vaihawmna khu Mangpa Jesu satan/mawpuoh ahi (Pro-Millenium). 4.v). Kum sang vaihawmna ah i umzing uhi (Realised-Millenium). Tam ngaidan ngate khu Pasion thu siem (Thelogian)-te ngaidan tuomtumte ahi uhi.

Ahin, tam ngaidan chi nga (5)-te lah ah, amasapen khu eite ngaidan toh a kituoh pen hi. Tuaziehin, adangte gen tamlouin eite ngaidan toh kituoh pen tawmkim in, i gen ding uhi.

5.1). Mangpa Jesu khu kum sang vaihawm tunmasangin a hing pei ding dante:

5.1.i). Khrist hing peikia masangin leitung ah ginna tawpsanna/nuatawlina thupitah a um ding hi. 5.1.ii). Khrist khu thakhat thu in aguh in, a misiengthoute ladingin a hing pei ding hi. 5.1.iii). Khrist doudalpa'n kum sagi sung leitung ah vai ahawm ding a, tuahun sung khu thuohgimna hun ahiding hi. 5.1.iv). Tualeh, Khrist khu loupina leh silbawltheina toh hing pei kia ding hi. Tualeh, Armege-don kidouna ah Setan a zou ding hi. Khrist in Jerusalem ah kum sang khat sung vaihawm in, tempul silte leh kithoinate atung ding kia ding hi. 5.1.v). Kum sang gam nuo in, Setan khu hakhieh ahiding a, Pasion dou in, a tawp ah zaw in a um ding hi. Tam khu, migiloute thokiana leh vaihawmna nukhia in zui ding hi. 5.1.vi). Setan leh Khrist doudalpa khu akidouna ah atawp ah zaw in a um ding hi. 5.1.vii). Mishite khu hing thou in, misiengthoute'n Khrist toh van laizawl ah kituoh in, tahsa pumpi tha khu atang ding uhi. 5.1.viii). Vaihawmna nukhia ahing hiding a, Setan leh migiloute khu gawtmun a pai a um in, mi dihtatte khu Mangpa toh kumtawn a tengkhawm ding in, a peita ding uhi. 5.1.ix). Leitung khu mei a suhsiet in a umta

ding a, Pasian in van tha leh lei tha bawl in, tuanah ah midihtatte a teng ding uhi. Tam lei tha khu misiengthoute'n kumtawn, kumtawn in a luota ding uhi.

6). Gingtute dinmun diing hi. Gingtute um dingdan chithum a um thei hi. Tuate ahi u'leh:

6. i). Silsiemtha: Tam Leisiet beinua chiengin silzousie siemtha in a um diing ua, gingtute zong siemtha ahidiing uhi (Matt. 19: 28; Nasepte 3: 21; Heb. 12:27).

6.ii). Vanggam ah umna diing: Vanggam ah umna diing mun tamtah a um hi (Johan. 14:2). Gingtute khu Vangam ah a um diing ua, Gingloute vang a pulam ah a um diing uhi (Matt. 22:12-13; 25:10-12). Midihte in silsiemtha zousie a luota diing uhi (Matt. 5:5; Kih. 21:1-3).

6.iii). Gingtute nuomman:

Mishite piengthate in kumtawn/tangtawn hinna a tang diing uhi. Hinkhuo tawpthei nawnlou ahita diing hi (Matt. 25:46; Rom.2:7). Pasian toh kipawlina hinkhuo amang tading uhi (Kih.21:3; Dan. 12:3; II Kor. 9:6). Tamte khu gingtute satan loupitah khu ahiding uhi. Hundamna leh thawkiana khu a kizui ding ua, a kikhen theisih ding uhi.

7). Thukhum sin:

Awle a tung a, igensa bangun tamna thute khu hun hingtung nailoute ahiziehun, theichien leh gen chien hamsatah ahingei mai uhi. Ahin, i Bible uh hoitah isim leh ahiding dan leh umding dan kichientah in ang hil hi. Tamna, i gendante u'khu a dihtei pen ding leh Bible toh kituoh pen ding a, i sui uh ahi.

Dohnate:

- 1). Thawkiana um ding dan tawmkim in gen in?
- 2)). Thu khenna a um diing bang chi bang ahi diei le?
- 3). Kum sang vaihawmna toh kisai ngidan ngate gen in?
- 4). Gingtute um dingdan chithumte bangbangte e?

.....

BUNG – 25

BIIBLE A GAM SAHANG NAMBAT 666 THU

Thuchin ding: “Tanah pilna apoimaw dan a lang hi. Koipou theisiemna neiten gamsa nambat tuot heh, aziehpén mihing nambat ahi, anambat pen zaguh sawmguh leh guh ahi” Kihilna 13:18).

1). Thupatna.

Tami nambat 666-thu khu tulai mai hilouin, hattuum dinchil/kipatchil apatin, tuni dawngin gingtute buoipi leh mi khenkhatte ngel in Bible sung a athupipen in zong angai va-ia uhi. Thamlouin, Pasian thu siemte leh pawl tuomtuomte’n zong ngaidan leh pomdan tuomtuom a nei uhi. Adiehin, gindan dihloou leh Pawl neu khenkhatten zong pawl dangte demna ding leh apawl ua mite lahlut/alutna ding un zong van jah in azang leng uhi. Ahin, tami thu khu silhamsa tah ahiziehin tamna i gendingte uh zong adih pen leh buching pen ahi zong i chingam sih uhi.

Tualeh, tami Gamsahang nambat khu Kihilnabu (Revelation) Bung 13-leh 17-na, ten Nambat 666- agente u’toh ametmat uhi.

2). Gamsahang Nambat 666 kisimdan suimasa va ui.

I Bible uh giel hun laiin, laiteng Alphabets (A, AW,B, C)-te khu Nambat simna in amang uhi. Tuabang, nambatte apat in mihing min emaw thu umzie nei khenkhatte asuikhia uhi. Tuabang sutdan khu Hebrai ham in ‘GIMTRIYA’ achi uhi. Tuami akipat in English a ‘GEMATRIA’ chi ang pieng khie hi.

Tualeh, Gam Sahang nambat khu Greek leh Hebrai laimalte apatte a kisut ahi uhi. Greek alphabet khu 24 ahi. Hebraite mabang in nambat 1-900 genna ding in ajang uhi. Tuajiehin, a alphabette un

adailou jie in alphabet ban ah alah/zetel anei leng uhi. Tuatē khu Stigma=6; Koppa=90; Sampsi=900-te ahi uhi.

Tualeh, i Bible gam uah nambat ahitah a jah ahilai in, akhenchieng in jong akim sipsip a ajahtheilouna uh jong aumna lai hi. Etsahna ding in, mun khen khat ah khun ni 40- khu ni 40 chiah genna ajah lai un, akhen chiengin hunsottah genna in ajang kia jel uhi. Tuajiehin, tambang nambat hilchetna bawlŋa tungtang ah pilvan angai mama ban ah ajah dan uh theichien jong angai mama hi.

Thamlouin, Bible thutah hilchien ding in ahunlai mite silngaitua dan leh lungsim puahdan, atenna khovel a siltungte tanpha thei a sut angai hi. Tamte theichienlouin, Bible thu in atup leh ngimlou lam a hilchien khielthei jong ahi. Tualeh, Bible gam mite khun a alphabette un nambat sutna in jong ajang jeljel uh chi jong igente uh thei kawm-in ajahdan uh isui ding uhi.

Tualeh, Kihilna laibu gel hun lai in Roman Nambat khu akijangpen khat jong ahi. Tunitan in zong in tambang in i zang ua-I, II,III, IV chiin igel uhi. Tuachin LV-50, C-100 chite in agel uhi. Tuaban ah, nambat khenkhatte in hina neisah uhi. Etsahna ding in nambat 7- khu nambat bukim leh Pasian nambat ahisah uhi. Nambat 3- khu van lam nambat in angai ua, thamlouin nambat 4-pen ahileh, khovel lam nambat in angai uhi. Tualeh, nambat 6-khu mihing nambat ahiban ah, adiehin tahsalam asilbawlthei mihingte nambat genna in ajang uhi. Tuachiin, nambat 666- ngelpen ahilehvang mihing tahsalam, Pasian dou zieh a Pasian akibawl hielte genna in ajang uhi. Tualeh, Gamsahang pen amin uapat gamsahang hilou un atanchin uh leh annasep ua pat ahijaw ding uhi.

3). Tuin Nambat 666 suohtheina ding ageldan uh leh aminte i sui ding uhi.

Tualeh, Nero khu leng gilou mama ahi a, thamlouin, Khristiante asugenthe i mama hi. Ashinua ajong hingthoukia phiel ding in agingta va-ia uhi. Amin, NERON ahi a, Greek laiteng a koi ahichieng in N=50; E=6; R=500; O=60; N=50; = 666 asuahthei veve hi. Tuabanah, Rom Lengte khu NERO apatin Pasian in akigen uhi. Pasian Kaisar achi uh khu jong Greek ham in ‘KAISAR THEOS’

ahi. Tamkhu jong nambat 666 asuohthei uhi.

Thamlouin, Pawl khenkahtten ‘POPE’ Lallukhu tung a Latin ham a laiteng kigel ‘VICARIUS FILI DEI’, aumzie khu “Khrist sihlehtang/palai/aiawh’ china ahi. Tamjong, asuichieng un ‘U’ khu ‘V’ in aheh ban uah akikimpi umloute blank akoï chiengun nambat 666 ahisah som teitei uhi.

Tambang in:

VICARIUS	FILI	DEI
V-5	F-	D-50
I-I	I-I	E-
C-100	L-50	I-I
A-	I-I	
R-		
I-I		
V-5		
S-		

Tuaban ah, mindang khenkhatte jong i enkia ding uhi.

ARNOUME	HITLER
A-1	H-107
R-00	I-108
N-50	T-119
O-70	L-111
U-400	E-104
M-40	R-117
E-5	

I gawm leh tam minteng thum zong nambat 666-a potheichiet mawh uhi.

4). Ahitahleh Kihilna laibu a Gamsahng nambat 666 koi ata dieile?

A tung a i genbang un, Gamsahang nambat 666- khu Kihilna Bung 13 leh 17-te a kipat a hi uhi. Tualeh, Kihilna bu in a It Johan in amangmuna/kihilna a mute khu atangpiin a tungsa pawl, a tung lel

pawl leh hing tung ding a, a silmute a gen khawm hi. Tuaziehin, tami gamsahang tungtang thu zong masang laiin, ana tungsa bang a genna zong a um a, ahin hingtung nailou ahi chi zong i pomdan uh ahi. Ahin, Kihilna bu a Gamsahang achi khu atangpi in Rom Lengte (Roman Emperors)-te agenna uh ahideupen uhi. Tualeh, Kihilna bu a kisawm achite khu Kaisar biehn kipat hun apat a Leng, Kaisar Augustas (Octavianus)- apat kipan in, Titus tan ahithe i ding uhi.

Tuaban ah, Rom Leng (Roman Emperors)-te zousie khu Gamsahang bangun a genchiet ua, ahin Nero apat Domitian tan khu Kihilna geltu in angai diehte ahi uhi. Tuaban ah kisawm leh lu sagite khu tamte ahithe i ding uhi.

LUSAGI NEI KISAWM NEI ALAL KUM UH

1)Kaisar Augusta (Octavianus)	1). Kasar Augustas	B.C 27-14 A.D
2). Tiberia Kaisar	2). Tiberea Kaisa	A.D 14-37
3). Galegula (Gaius)	3). Galigula	A.D 37-41
4). Klaudia	4). Klaudia	A.D 41-54
5). Nero Kaisar	5). Nero Kaisar	A.D 54-68
	6). Galba	A.D 68-69
	7). Octho	A.D -69
	8). Vetelies	A.D -69
6). Vespasian	9).Vespasian	A.D 69-79
7). Titus	10). Titus	A.D 79-81

Tualeh, lu-sagi lah a liempen khu 5-na Nero khu ahiding chin a gingta uhi. Agietna Lengpa/Gam sahang khu Domitian jong ahithe i hi a chi uhi.

5). Tulai misiem khen khatten gamsahang leh chiemtena pedingpa khu mimal hilouin European Union hiding in a gingta uhi?

Tamna gamsa hang khu sildang hilouin khawvel khantouna in a kentel computer leh technology-te hidingin a gingta uhi. Tualeh, European Union (EU)-te khu Europe gam a solkal leh leng hattah sawm (10)- kipawl khawmte ahiding uh a chi uhi. Amauh, akipawl khawmna uh tami computer tungton in angbawl ding uhi a chi uhi. Computer nnaseptheina tungtonin EU-te khun mijousiete khu

chientene akhut tahlam e ahisih leh ataltang uah akitah ding uhi. Tami chiemtena gamsahang chiemtena ahiding hi. Tualeh, tami cheimtena ah khun mimal chiemtena siljousie koi ahiding a, tuachin, tami chiemtena khu amanu/pa atahsa sung ah guonlut ahiding hi. Tami chiemtena atahsa sung ua kikoilut tungtonin EU-in, computer silbawltheina tungton in ahong thei ding ua, jong a en un avel thei ding ua, athunun ding ua mijousie kichientahin umna leh annasep jouise athunun ding uh a chi uhi. Tami, gamsahang chiemtena “666” khu huntom nou sung in khawvel pumpi ah akithejah ding a, tami chiemtena pangloun, mi koiman a lei in azuothei sih ding uhi.

6). Thukhumsin:

I gensabang un, tam Kihilnabu gel lai in Greek leh Hebraite nambat sutna ding in a zang uhi. Tualeh, Kihilna bu-a Gamsahang a chi u’khu atangpi in Rom Lengte (Roman Emperors)-te agenna uh ahideupen uh chi in Bible suitu khenkhatten agen uhi. Ajieh ahileha nnasepdan uh leh gamtat dante ban uah, amin uh kisuina uapat in 666 asuahthei uhi. Ahin, eite gindan in Gamsahang nambat pen, tunua/dachieng in zong atahtah in ang kihawm ding chi zong igintat dan uh leh pomdan uh a hi. Ahin, i gensa bangun Rapture zou chieng a kihawm ding ahiziehin tulai mi khen khatte in h Unique Identification Number’ (UIN) or Aadhaard Cardte leh Covid vaccine leh sildangdang hing um jel dingte toh mawh mehmat lou ding in ahoi ding hi. A zieh ahileh No.666-pen rapture a gingtute kilahzou chieng a kihawm ding ahi a, ahin khawvel bei kuon a teng i hiziehun abul (process)-pen a kipan thei zing ahita chi pen i manghil sih ding uhi.

Dohnate:

- 1). Gamsahang nambat khu heilai Bible bungte toh kimetmat uh e?.
- 2). Gam Sahang nambatte khu koite laimalte apat a kisut ahi uoi le?.
- 3) Kihilna laibu a Gamsahng nambat 666- koite ahita diei le?
- 4). Tulai misiem khen khatten Gamsahang leh chiemtena peding khu ‘European Union” hiding in a gingta dan uh gen in?
- 5). Gamsahang nambat khu a kihawmzou e ahisih leh kihawm nailou na ngaidan gen in?

.....

BUNG-26

GAWTMUN MEIDIL THU

Thuchin ding:

“Hun kipah um ah ka hing na ngaikhie a, Hundamna ni ah ka hing na panpi hi. Ngai un, tukhu hun kipah um ahi a, ngai in tukhu hundamna ni ahi” a chi hi (II Kor. 6:2).

1). Thumapui.

Awle, Gawtmun thu khu i Lai siengthou in a ha gen mama a, tuleh Pasian thu i awi (Kristian)-ihina jieuh zong khu shi zou chieng a Gawtmun meidil a i lutlouna ding uh chilei i chi khielsih ding uhi. I Lai siengthou in gawtmun um tahtah dan a gen a, a dieh in Thuhun Tha ah 162- vei a tuong a, tamte lah a 70- sang a tamzawte khu Khantanhoite (Gospel)- sung ah a tuong ua, atamzaw khu i Mangpa Jesu gente ahi tangpi hi.

2). Gawtmun kigenna ham-kamte i sui masa diing uhi:

2.i). SHEOL: Seol chi khu Hebrai ham apat a lekheih ahi a, a umzie khu ‘Mun Miel’ amaw, ‘Mun guoh’ chinate ahi. Tamkhu Sapham in ‘Hell’ a kichi hi. Tamkhu Thuhun Lui ah sawmthum-le-khat (31)-vei a tuong hi. 2.ii). HADES: Tam zong atung a toh kibang sim ahi a, a Greek ham in, ‘Mishi khuo’ china ahi. 2.iii). TARTOROS: Tam khu Angel gilou leh helte vaihawmna ngah a tou/umna mun ahi (II Peter 2:4). 2.iv). GEHENNA: Khopi sung nin paina mun, mitlou a kuong zing, migiloute tan ding mei mit ngailou mun china ahi (II Khang. 33:6; Matt. 10:28).

3). Tam mun (Gawt mun)- khu Jesu’n tam bang in a gen hi.

3.i). Migiloute hagau leh tahsa kigawm a pailutna mun ding ahi

(Matt. 10:28; Luk. 12:5) a chi hi. 3. ii). Vaihawmna leh siemlou tanna mun ahi (Matt. 23:33). 3. iii). Mei zong ami-ngailouna mun ahi (Mak. 9:44; Kihilna. 19:20; 20:14-15).

4). Gawtmun hei a um ding a diei?:

Laisiengthou in gawtmun hina a gente i gen zouta uhi. Ahileh gawtmun hei a um a diei? chi khu mite thei ut mama khat ahi. Rozer Scarle, University of Durham a Professor in a gen dan in, Ama uh pawl in gawtmun meidil a um theina ding mun a mukhie dan uh tam bang in a gen hi. “Leitung (Earth) lailung (core)- khu a satna 6000 circus vel a sa ahijieh in, nidang a ka gintat meidil umna pen khu leitung lailung ahiding chi khu a dih theisih ding achi hi. Leitung a, a um theina ding mun umsun khu, tuisuogiet tawdop a tuisa pawtna khu, satna 450oC a, a satna mun ahiding” achi hi. Tualeh, Van gam (Heaven)-umna ding mun, a gendan in, “Huikhhuo (atmosphere)- a, Thermosphere kichina mun khat a um a, tuamun hidiing in a gingta” uhi. Tamte khu a dih tahtah hi i chi theisih ua, ahin gingloumite’n zong Van gam leh Gawtmun tungtang a na buoipi uh zong a lungdamhuoi veve hi.

Tualeh, Russia Scientistte’n Siberia gam a, a nasepna ah mun khat mel kuo (9)-a, thuh in a lei/tawna uah Isai 5:5 a kigen Meilipi (Hell)- a mukhie thu uh a gen uhi. A satdan 2000oF (Degree Fahrenheit) ahi achi uhi. Tamna a Doctor pa uh Dr. Victor Azza khun a genna ah, “Tam mun a taw khah uh a huoise/gimnei mama a, a awzah uh khu a na e! a na e! chia ka-le-mau thawm kikou zengzung husa ka za uh” achi hi. Tamna a sil mukhie lamdangtah a jah uh a gingta ua, Scientists tam tah in a nnasepte uh tawpsan in a pientha law ua, Pasian nna a seplaw uh a kichi hi. Tamna ka-le-mau thawm huoisietah a zah u’khu Laisiengthou a kigen gawtmun (Hell) hi diing in a gingta uhi.

Thuhun Lui leh Thuhun Tha gendante toh i ettuoh leh zong a kibang hi chiin Laisiengthou siemte’n zong apompi uhi. Ajiehpén gawtmun khu leinuoi a um ahi a, Van gam pen tunglam a um ahijiehin chi’n zong a gen uhi. Tualeh, Russiate khu, Pasian a umsih, gawtmun zong a umsih chia doudal gam ahijieh un, tambang a ang mu uh khu Pasian a um tahtah na chi a suhlat utna jie zong ahi ding hi. (The Glorious Hope’-April 1994).

A bangteng hizongleh, Gawtmun umna mun dihtah theisih nanlei zong Lai siengthou leh misiemte (Scientistte)- apat in a um ngei hi chih khu niel guol ahisih hi.

3). Gawtmun sat dingdan:

Ahileh Gawtmun bangchi bang a sa ding adiei? chi zong mi zousie thei ut mama khat ahi. Tualeh satna degree 100oC vel ah khun tui a sousah vungvung thei hi. I tung ua nisa (sun) satdan khu degree 6,000oC vel hi ding a gintat ahi. Tambang a sa ahi jiehin nisa kim a um zousie a tui mang zelzel uhi.

Gawtmun khu satna temperature 445oC a sa ahiding chi in Mark Austin in Newspaper khat ah a giel hi. Tam sat ding dan khu tui kisuongsou (tuisa tawp)-te lethum leh akim vela sa ahi ding hi. Tualeh, Lai siengthou in gawtmun sat dingdan a gen khu Kihilna 21:8 ah “...Meidawite leh gingta loute... jousie tan ding kaat (brimstone)- leh; sulphur huon sou, sat bang a sa ding ahi.

4). Gawtmun bangchi bang mun ahi diei?

Gawtmun khu kihuotna mun a ahiding hi. Zudawn leh thanguhoi tampite khu gawtmun zauhuoi dan i genpi chieng un, gawtmun khu a nuom ding hi, ajieh ahilehpen i it-le-ngai teng kimna ding mun ahidingziehin a chi uhi. Jail (thongsung)-sung bang diing a nuomlou e? i chi leh migilou chinteng umkhawmna mun ahijieh in ahi. Tuabangma in, gawtmun pen gitlouna leh khelna pumdim ding ahijieh leh lungsietna mawngmawng umlou a gawtna mun ding ahijiehin mun nuomloutah ahiding hi. Tualeh, gawtmun khu awsia chinteng a kilaw khumna mun leh tanchinpha a gen ding uh zong khu shina tanchinpha ahiding jiehin in mun nuomlou tawpkhawh ahidiing hi. Meilipi sungkhat or tui kisuongsou sungkhat ah leitung a na itpen toh umkhawm lechin a nuom diei? Tamkhu, Gawtmun noplou ding dan genna hoihtah khat ahi.

Tualeh, Gawtmun khu shina nasan zong mu zou nawnlouna ding mun ahi. Tam leitung a, i zau pen uh khu shina leh natna ahi. Ahin, gawtmun ah pen shina nangawn a kimuzou sih ding hi. Tam thu khu Sadhu Sundar Singh laibu gel “Hagau Leitung” (Spiritual World)-ah chiengtahin i mu uhi. “Angkawm lai khat hagau khu

hagau gam a tun masang in, a dangtah mama a, a lei a ha zatzat a, a nah gin thawm khu a ngai mama a, mei satah in a kah bang mai in a bante khu meikuong in a kang vom vetvut hi. A mapa khu lungkhamtah leh mangbangtah in a kipei akipei a, ama-le-ama na ngawn a kikidah a enzong a ki-engam va-ia sih hi. Ka hagau khu hamsie dong in umta hen, tamna suhdamna dingin shina a umthei nawn sih a, ka hagau lah a shi thei sih a, shi thei hileh leitung a ka shi bang in ka Pistol in ka kikaplum kia ding” achi hi. Gawtmun natna khu leitung a natna a leza tamtah in a na ding hi. Tuajieh in, tam mun khu tangtawn a shithei nonlouna mun ahi hi.

5). Gawtmun khu theigigena mun leh kisiana mun ahi ding hi.

Jesu’n Luke 16:19-31 a Mihausapa leh Lazar tangthu a genna pat in i muthei hi. Mihausapa khu gawtmun ah a lut a, gawtmun ah khun a hausatnate khat zong a pawlut theisih hi. Ahin, sil ni a kenglut/pawlut a, tuate khu a ngaituona (memory)-leh a bawlkhielte kisiana a lungtang ahi. Amapa khu kisia in gawtmun ah Missionary nna a sep sawm a, ahin, ama ding in a kikhelta hi. Tuanah sang in tui tah khat na ngawn zong a muzou nawn sih hi.

Tualeh, a net pha ding uh zong khu zang-eh (than) –ahi a, a puonsil ding uh zong khu than ahiding uhi (Isai 14:11). Tueleh, mi tamtah umkhawm ding hinanlezong, thawmhauna leh zauthawng in a pum dim ding ua, khat-le khatte kimuda leh kihuotna ngen in zong a pumdim ding uhi.

Tualeh, gawtmun meidil in a tahsa zousie uh a kat sieng sah ding a, ahin, a lei (tongue) uh leh a lungtang (heart)-uh ahileh leitung a damsung ua Pasian thu a zuilounate u’leh a bawlkhielte uh a kisiana ding un a kangsih diing a, ka-le-hagawi in akikou ding uhi.

6). Gawtmun khu a beitheil ngailou mun ahi.

Gawtmun beitheilou ding thu khu Kihilna Bu ah sawm-le-thum (13)-vei a tuong hi. Gawtmun beitheil ngailou ding thu tam bang in gentena a kigen hi. Suong lientah khat kum za (100)-dan in leitung a vasa neupen khat in a muh in vatat henlen, a hun sau sengseng in suongpi khu a tat bei cheing in zong gawtmun khu a kipan pan ahiding a kichi hi. Tuabang deu in ,Tuisuogiet khu kum sang khat (1000)-dan in, nou/hai in khatvei kithalta leh a kum sawt sengseng in a tuiteng a kang kilkel nua in zong Gawtmun pen a kipan pan ding

ahi kichi hi. Tamte khu sil hi thei ahi sih a, tuabang in Gawtmun zong khu a beitheilou ding china ahi.

Tualeh, Gawtmun a meikuong khu Pasian lungthahna ahiding hi. Deut. 32:22 ah–“Ka lungthahna meikuong hing bang van in, Vannuoi a sil um zousie khu kangtum sienhta va. Khum khun mishikhuo haltum peh van, muol-le-tang bulte zong ka tumta va. Sodom leh Gommora-te tung a Pasian thangpaina bangin a um ding hi” chi thu i mu uhi.

7). Ahileh gawtmun koite umna ding?

Awle, gawtmun huoisiet dante i gen zouta ua, tu’n koite umna ding e? chi khu i ngaituo ding uhi. A tomkim in, genlei – Dawimangpa leh a kaizatamte banah, mi piengthaloute umna ding mun diing ahi. Jesu’n mi koizong tui leh Hagau a apienthah sih leh tam mun khu a tang ding uh ahi achi hi. Nang-le-nang kigintat jieh leh hoi kisah jieh a, tammun pumpel maw thei na hisih hi. A lampi umsun khu Jesu’n “Kei lampi leh thutah leh hinna ka hi” ac hi bang in Jesu bou ahi tami i pumpeltheina ding lampi umsun hi.

Tualeh, tuni-a Gawtmun a um tamtahte zong tam leitung a damlai ua nang bang a ngaidan mothuai pipi neite ahi ngei ding uhi. Ahilouleh, nang sang a gilou zaw zong ahi tuomsih ding uhi. Eite zong kingaituo vai! Na pientha sih leh tam mun nang tan ding ahi.

Tuaziehin, nang-le-kei a ding in i hun neisun ahimaithei hi. Pasian thugen ngai in “Hun kipah um ah ka hing na ngaikhie a, Hundamna ni ah ka hing na panpi hi. Ngai un, tukhu hun kipah um ahi a, ngai in tukhu hundamna ni ahi” a chi hi (II Kor. 6:2). .

Dohnate:

- 1). Thuhun Tha a gawtmun thu banzat vei a kigiel ei?
- 2). Gawtmun kigenna ham-kamte bangbange e?
- 3). Tam mun (Gawt mun)- khu Jesu’n bang chi bangin a gen ei?
- 4). Lai-sienghthou in gawtmun sat dingdan bang chi in a gen ei?
- 5). Gawtmun bangchi bang mun ahi diei le?
- 6). Gawt mun a katumlou dingte bange e?
- 7). Gawtmun a meikuong ding khu bang ahie diei?
- 8). Gawtmun koite umna ding a kibawl e?

.....

LAIBU ETTE (BIBLIOGRAPY)

Aizawl Theological College. *Thuthlung Hhui bu zilna*,. Aizawl: Aizawl Theological College, 1985.

Berkhof , Lovis. *Khristian Thurin tlangpui*. Aizawl: Aizawl Theological College, 1985.

Challianngura, Rev. *Kohhran Chawmna*. Aizawl: Synod Literature & Publication Board, 2002.

Chanchinmawia, C.Rev. *Hun Hnunung Chanchin*. Aizawl : F.B.C Publication Board, 191

Chuailova, L.H. *Hun Hnunung Chanchin Hrilh Lawkna Apostlete Pawmdan*. Aizawl: Samaritan Printer, 20113.

Chuaauthuama. *Chawhchawrawi*. Aizawl: K. Llalhluna, 1990.

Ginzalian T. Upa & Thangpu H. Pastor, *Church of Jesus Christ Doctrine Bu*. Imphal: Church of Jesu Christ, 1998

Guite Paukhanmang, Rev. *Saptuam Pawltuamtuumte Thu-sinsak Tomlak*, Churachandpur : Grace Bible College, 1994.

Killuaia H, Rev. *Kohhran Chawmna*, Lunglei: Literature Committee Baptist Church of Mizoram, 1991

Khupkhawthang, Rev. *Lampi- Thutah-Hinna, Doctrine Bu*. Churachandpur: Young Christian Organisation, 1972.

Khristian Thalai Pawl. *Leadership Training Hand Book*. Aizawl: Khristian Thalai Pawl Central Committee, 1989.

Lalchuanliana, Rev. *Sacrament Zilna bu*. Aizawl: Synod Literature & Publication Board, 2002

Lalchungnunga, H. Rev. *Isua Krista Hnathawh leh Zirtirna*. Aizawl: Synod Publication Board, 1990

Lalchungnunga, Evan. *Nunkawng Hruaitu Part I*. Aizawl: Agape Gospel, 1990

Lianthuma. *Miten an buaipui Bible-A Thu khirkkhan*. Aizawl:

Synod Publication Board, 1989.

Lalsawma Rev. *Khristian Thurin Zirna*. Aizawl: Synod Literature and Publication Board, 1999

Lalzawnga, V. Rev. *Zirtirna Him Tawkhlole*. Lunglei: Literature Committee Zoram Baptist, 1989.

Mizoram Presbyterian Kohhran, *Presbyterian Hand Book*. Aizawl: Synod Literature & Publication Board, 1995.

Pazawna, et. al. *Hruaina Eng VIII*, Aizawl: Synod Publication Board, 1986

Pazawna C. & Lalchuanliana, Rev. *Khristian Thurin*. Aizawl: Aizawl Theological College, 1986

Ralte Lalngurawma, Rev. *Nazareth Isua*. Aizawl: Synod Publication Board, 1992

Raltawnga, Rev. *Bible Chanchin*. Lunglei: Baptist Literature Committee, 1990.

Raltawnga, Rev. *Kristian Thugin Tlangpuite*. Lunglei: Literature Committee Zoram Baptist, 1989.

Ramthanga, H. Rev. *Rawngbawltute Thian*. Aizawl: Mizo Theological Literature, 1989.

Saaithanga, Rev. *Thurin Zirna*, Aizawl: Synod Publication Board, 1998.

-----, *Kohhran Enkawlna*, Aizawl: The Mizo Theological Literature Committee, 1998.

Sangzuala C. *Kan Kohhran hi*. Aizawl: Synod Publication Board, 1992

Siamhnuna, Rev. *Khristian Sakhua Lungphum*. Aizawl: Synod Publication Board, 1982.

Taithul, Lianchinkhup Rev. *India Malsuolam Presbyterian Hattuom Danbu*. Churachandpur: Manipur Gam Presbytery, 1984

Periodicals:

Kipgen Limkhongam (Editor), Khohui Mothly Magazine, Vol.1V, Issue.Saikul.

Neihsial Tualchin, “Aprocrypha laibute” Krist Pallai Vol.10 (May - 1998 No.5) 18-19

Lamka District Head Quarter Church Khanglai 2011 Special Issue, Khanglai Aw,Lamka: PYF, 2011.

Vanlalauba, H. “Presbyterian Thurin” Dedakhe Vol. XXVII No.2 (March-April, 1998) 21-22

.....